

# Ion Gagalo euda Iesu Keriso umanawa Ion girumalena

*Iesu Keriso ipa aia ita sapa*

<sup>1</sup> Bumpeido tawo segasia walamawe ipa aia, tane aia sa ipa God mampe wandie ita me ipa Godida. <sup>2</sup> Me bumpeido God nata awodea wanwanlala <sup>3</sup> ita me bedewe nitu uduudu segantontuwan. Ita nitu segantone tauma wineia mai da di segalepona, diaida, me bedewe nitu uduudu segantontuwan. <sup>4</sup> **Me ipa inaida bumpa ita ina sa ipa apava uduudu sapau.** <sup>5</sup> Ita sapa sa dubawa bedewe sapa wade, tane dubawa sapa sa mai kerausapie bosapia rua, dia.

<sup>6</sup> <sup>✡</sup>Inaida sapawa muriwa wisen, tane bauta God me gagalowa benemalawa wanaubeno wisen, me ebowa ipa Ion. <sup>7-8</sup> Me mebaida ipa mai sapa, tane me wisena inaida sapawa benemawalepia baiwa. Me wisena sapa sa umanawa benemalepio apava etapue me bedewe inaida sapawa me umanawa wadia bedewe sumaintopua baiwa. <sup>9</sup> Tane me mida Ion benemawalena, me ipa sapaida tawo osowe wisene apava uduudu sapamode.

<sup>10</sup> Me tawo osowe wisene apava bedeuwo wandie. Me bedewe tawo segalen, tane tawo

---

<sup>✡</sup> **1:6:** Matiu 3.1; Mak 1.4; Luk 3.1,2

me mai ewape atensapona me apa Keriso Inawamba. <sup>11</sup> Me bolaweido wisen, tane me meba apanawaida me mai wadape mamposapona, dia. <sup>12</sup> Tane mo bedeuwo isiwa mai me dabuasape epona, tane mo me ebowe sumanaintone wadane mamposaiena. **Ita mo mida me bedewe insaisau itune sumanaiwantona me mukau wanamone dewamona God obampaipa wanantopu.** <sup>13</sup> Mo mida me sumanaiwantone God obampa wanantona, mo mai apapa osinawa mampe ba apapa mona insaisawa rua segantopona. Sa ipa mai apanaida muntoia rua muntopona, dia, **tane God me meba dewamono me obampaipa segantone waimoi.**

<sup>14</sup> Tane aia God mampe wandia tawo osowe wisene apapa etembaida wadene no rumbalene bedembo wanwan bolawa dewasane wain. **Me no do wainite bedewe God meba sapawaida sabamosadio eweite. Me ipa God nuawadawadawa Otopa deaida, me sapawa sa ipa me Mamba waneno bedewe winedie sapaleide.** Me bedewe ulaipa ita God nuaparewa no baimba nopeidolene debamaidalen.

<sup>15</sup> Ion me umanawa benemalene ka wane wanase, “Me ipa sa mida umanawa ne wadine wadinase, ‘Mida ne wanawo ando wisepia, me ipa debamawaida, mai ne ruana, ipawa me bauta wandio muriwa ne munten.’ ”

<sup>16</sup> Me nuaparewa debamaia no baimba bedewe me sauwa amonawa euda osowesane ituno wadate wainitana. <sup>17</sup> Sa ipa God Moses bedewe me anaana nenen, **tane Iesu Keriso bedewe God nuaparewa no baimba ita do ulaipa intawa no mainimbo wisene sabamolen.** <sup>18</sup> Mai mida

da bumpe ita tauma emawe God ibuwa ewapona, diaida. Tane me Otopa, me ipa Godida ita Mambamba nata wanwanlala, me God sabamosano ewate ateten.

*Ion Babatutu Iesu gagalowaleide  
(Matiu 3.1-12; Mak 1.1-8; Luk 3.1-18)*

**19** Ion esa Ioadan bedewe apana babatutu-modio Iuswa eiau me umanawa etane inseienase me dauwa Keriso mida God sauawalena wisepona tauma wisen, ba? Sa baiwa mo pirisi ita God duwa nolawa dewalala apanawa waaubamoienna me waitarasapua baiwa. Mo Ierusalemwae nomone antone Ion mampe wimone waitarasane waienase, “E mida, dianewo etato!”

**20** Mo epe waitarasaiio etene me mai gagalou sipoa nuanepona, tane me dodomana meba wasabamolene wanase, “Ne mai Keriso Inawamba, dia!”

**21** <sup>◊</sup>Mo aia ema etane tane osowe waitarasane waienase, “Naita e mai Keriso, tauma e wawo etato e mida? E ipa peroweta Elaia mida no onioniawantite wainitana wien, ba?” Ion osowe sipoamone wanase, “Dia, ne mai Elaia.” Tauma mo waitarasane waienase, “E ipa peroweta mida God sauawalena walama ompa osowe wapiaubepio wisepia wien, ba?” Me osowe sipoamone wanase, “Sa dia!”

**22** Mo Ion waitarasane lewantone ompa osowe diane waienase, “E no waitaramba uduudu wasusaana, sa baiwa tauma e eba umanaa waade-waitawo etato e mida? No winena e waade-waitawo etate ruawa ane mida no waaubaneiena benemamoto etapu.”

---

<sup>◊</sup> **1:21:** Diutor 18.15,18

**23** <sup>✡</sup>Mo me epe waitarasaieno etene Ion peroweta Aisaia bukawa bedewe girumalena rua wane wanase,

“Ne ipa apanaida sala makowa bedewe nolantedine aiana mukama mampe wadinase,  
**‘Inta dodomanasana Tatamba wimpia baiwa!’**

**24-25** Tauma mida mo waaubalala Ierusalemwae wimona bedeuwo isiwa mo mida Parisi sosou Ion waitarasane waienase, “Naita e mai Keriso, ba Elaia, ba peroweta umanawa wawala e dima baiwa apata babatutumoiiana? E muka na wadee dewa ema dewasaiana?”

**26** Ion mo gagalou sipoasane wanase, “Ne ipa mai debamawaida ita esa mampe apata babatutumodina. Tane e sawanalawo apata dea enedia mida e mai atensapona. **27** Me ipa sa ne wanawo ando wisepia umanawa wana tauma wisen. Me ipa debamawaida, ne mai rua me sausape sendorowa otawiantape nambemopa, dia.”

**28** Dowa ema uduudu bola Betaniwa Ioadan waiwa dawo seganton naepe Ion apata babatutumonawo.

**29** Ema aupe imonemba Ion nolaleidio bedewe Iesu iedio ewene asisulala diamone wanase, **“Ewana, me ipa God Sipsipwa sanaa, me tawo kadiwa saiwa awanepiaubepi!”** **30** Me ipa sa mida umanawa ne wane wanase, ‘**Ne wanawo ando apata dea wisepia me ipa debamawaida, mai ne ruana, ipawa me bauta wadio muriwa ne munten.**’ **31** Bauta ne mai me atensapona me apa Keriso mida God wanaubena,

---

<sup>✡</sup> **1:23:** Aisaia 40.3

tane ne winene esa mampe babatutumodine inta imaa sadina meida Israel apanawa mampo sabamolepia baiwa.”

<sup>32</sup> Ita Ion Iesu umanawa benemalene wanase, “Aleu kakaiwa nene bunebune rua uboe iene me osowe waino ne ewana. <sup>33</sup> Ne mai me atensapona rua, dia, tane mida ne apana esa mampe babatutumopina baiwa waaubanena me dianene wanase, ‘E Aleu kakaiwa ewono iepie ita apana dea osowe wampia, me ipa sa mida Aleu kakaiwa mampe mo babatutumopio ita Aleu kakaiwa apana bedeuwolepi.’ <sup>34</sup> Ita God ne dianena rua Aleu kakaiwa Iesu osowe iene waino ewane tauma me atensane ita me umanawa benemawantedine wadinase, **‘Me ipa God Otopa.’** ”

*Ion wawe alala me ene Iesu wawe antoi*

<sup>35-36</sup> Ion epe gagalolene aupe imonemba me wawe alala nata do esa Ioadan tampe eneie ita Ion Iesu aleidio ewene wanase, **“Ewana, me ipa God Sipsipwa sanaa!”**

<sup>37</sup> Mo nata Ion gagalowa ema etane me ene Iesu wawe antoiena. <sup>38</sup> Iesu leulene wawe odeio ewamone wanase, “E dima menaledio ne wanawo odeilana?” Mo sipoasane waienase, “Rabi, e na wainiana?” Aia ema ipawaida ipa Debamamba. <sup>39</sup> Tauma Iesu sipoa leusane wanase, “Winlene ita naepe ne wainedina bolawa ewana!” Tauma mo Iesu do antone me wandia bolawa ewei ena ita aitamana rawilena baiwa me do wankasanton. <sup>40</sup> Mo nata Iesu do wankasantona dea ebowa ipa Endru, Saimon Pita wamba. <sup>41</sup> Endru Iesu donsane dauwa etene atenlene baiwa me tauwadea alene tatawa Saimon banusadie donsane diene wanase, **“No Mesaia Inawamba donsatana!”**

Ebo waia Mesaia, sa ipa Ibru aiawa mampe, tane Girik aiawa mampe sa ipa Keriso. <sup>42</sup> Endru Saimon banlene Iesu mampe wiseno ita Iesu me ewene wanase, “E ipa Saimon, Ion otopa, tane tauma e eboa ipa Kipas.” Ebowa ema Girik aiawa mampe Pita, ita ebo ema ipawaida ipa seu.

### *Iesu Pilip ita Nataniel apamode*

<sup>43</sup> Imonemba Iesu Galili awa insene aleidie intasino Pilip donsane diene wanase, **“Ne wanawo winea!”** <sup>44</sup> Tane Pilip Betisaida apanawa, bola sa ipa Endru Pita nata bolau dea. <sup>45</sup> Ita Pilip Nataniel donsane diene wanase, **“No Keriso mida umanawa Moses anaanawa ita peroweta bukau bedeuwo girumalena tauma donsatana, me ipa Nasaret Iesuwa, Iosep otopa.”** <sup>46</sup> Tane Nataniel Pilip diene wanase, “Dima euda bola kerauda Nasaret bedewe wine-dia wimpia umanawa waiana?” Ita Pilip sipoasane wanase, “Wine e eba emaawo ewaa!” <sup>47</sup> Nataniel Pilip aiawa ruawalene me nata antone Iesu mampentoio me Nataniel ewene umanawa wane wanase, “Ewana, Israel apanawa ema ipa ulaipa os wawala ita me bedewe mai laga da wineipona, dia.” <sup>48</sup> Tane Nataniel Iesu aiawa ema etene memesalene wanase, “E tauma os ne eweene nata gagalontitana, tane ambi e ne ateineana?” Iesu me sipoasane wanase, “E ia karakai bumpe wainiano ne eweena, muriwa Pilip e apaen.” <sup>49</sup> Tane Nataniel Iesu epe wano insendewalene wanase, **“Debamana, e ipa God Otopa, Israelwa warereu.”**

**50** Iesu leusane wanase, “E ia karakai bumpe wainiano eweena umanawa dieeno baiwa sumanaiten, ba? Dowa sa ipa mai debama, dia, tane e dewa debamauida ando ewamoia, mai ema rua.” **51** <sup>◊</sup>Ita Iesu me diene wanase, “Ne e uduudu ulaipa dialedina, e uba wadaaubala ita God enseliwa Apana Otopa osowe odompe ita iompo ewana.”

## 2

### *Iesu nainai odawa bedewe ginasawa uwaaida dewasade*

**1** Ema aupe walama natadeawo bola Kana Galili bedewe nainai odawa segalen. Iesu inawa oda sa bedewe alen. **2** Tane Iesu ita me wawe alala do nainai odawa bedewe nisomoieno wimoiena. **3** Tane oda bedewe wain dialeno baiwa Iesu inawa epe ewene nuawa pola wano me diene wanase, “Nainai odawa andomana aleide, tane wain amuwa dialen! E manawo sau da winede, ba dia?” **4** Tane Iesu inawa aiawa etendabue diene wanase, “Inana, e dima ne mainawo ewaano kadileno baiwa ne wasurakauneiana, ne walamanaida tauma mai wisepona, dia.” **5** Tane me Iesu aiawa etene nola dewalala diamone wanase, **“Me dima umanawa wampa e ideita me aiawa ruawaitane de-wasana!”**

**6** Ius apanawa ete mitamitawa dewawa baiwa sape esa dugiwa **6** endomoieno eneia, saibu debamaia, apana nataitanata dugi dea awanepua rua. **7** Iesu dugi sa ewamone nola dewalala diamone

---

<sup>◊</sup> **1:51:** Bumpai 28.12

wanase, “Aitane esa utamone dugi sa bedewe memamone nopemona!”

<sup>8</sup> Mo Iesu wana rua dewasane esa utane dugi nopemoiena. Ema aupe Iesu mo diamone wanase, “Tauma esa dugi bedewe utane aitane nainai odawa taupakawa wanano napie etepi.” Mo esa utane antone <sup>9</sup> oda taupakawa waneieno nane dauwa etene atenlen esaida leulene wainida segalen. Tane me wain ema nane etene insakoalene wanase, “Wain ema nainta wisen?” Tane oda nolawa dewalala apanawa mida esa uteiena mo os atenton. Tauma oda tau-pakawa nainai apanawa apasane, nata nambe antone <sup>10</sup> diaidasane wanase, “No dewamba ipa ema epe: Wain daudaua apana bauta memeie wanamoio nai, tane apna wain sa naio dialeidio aupe mo wain dasia wanamoi. Tane e wain euda daudaua ompa osowe apna wanamoiana!”

<sup>11</sup> Ginasa ema uwaaida Iesu bola Kana Galili bedewe dewasan. Dewa mukamukaua ema bedewe Iesu me sapawaida sabamosano ita me wawe alala ewane sumanaiwanton. <sup>12</sup> <sup>✡</sup>Ema aupe Iesu, me inawa, wanwamba ita wawe alala do bola sa ene Kapeanaumwa iane antone walama nata os sape waimoiena.

*God duwa bedewe kadisaio Iesu ewedie nuawa pola wadio eusade*

*(Matiu 21.12-13; Mak 11.15-17; Luk 19.45-46)*

<sup>13</sup> <sup>✡</sup>Iuswa odau Pasowa walamawa kampaleidio Iesu odene alen Ierusalemwa. <sup>14</sup> Me sape wisene God duwa bedewe moawa da osowe apna mo pue kau, sipsip ita nene bunebune

---

<sup>✡</sup> **2:12:** Matiu 4.13    <sup>✡</sup> **2:13:** Ekisod 12.1-27

pulontompaa baiwa gimaramoie laia, ita mane leusaia apanawa watau tampe waimoio ewamon. <sup>15</sup> Me dewa inainamba ema God duwa kadisadio ewene nuawa kadileno me tai dewasane mampe pue uduudu, sipsip ita kau do God duwa bedewe tanamono nomone antoiena. Me mane leusaia apanawa maneu nepa daberaramone ita mo watau epakokomon. <sup>16</sup> Tane me nene gimaralala apanawa tanamone wanase, “Nene otamone bola ema ene nolene aitana! **Ne Mamana duwa mai maket bolawa wanasa, diaida!**” <sup>17</sup> Wawe alala dewa ema ewane dima buka bedewe girumalena inseiena. Buka bedewe ema epe wadi wadiase, “Ne nuana polaida wadie ia rua ide e dua baiwa!”

<sup>18</sup> Tane Iuswa eiau dima Iesu dewasana ewane me bumpawa atendewantopua baiwa mampe wimone diane waienase, “Ginasa da dewasawo no ewate atentata e ulaipa God mampe muka wadee dewa ema dewasaiana!” <sup>19</sup> <sup>✡</sup>Iesu mo sipoamone wanase, “E God duwa ema kadisanatuwapi, tane ne du ema sanaasape walama natadea bedewe osowe wadapa.” <sup>20</sup> Ius apanawa eiau Iesu aiawa ema etane sipoasane waienase, “Du ema no ena 46 bedewe nolawa pokaidaneno diasatana, tane ambi e waianase, ‘Ne du ema walama natadea bedewe wadapatuwapi.’ ”

<sup>21</sup> Tane Iesu God duwa umanawa wana, sa ipa me meba etepa umanawa wan. <sup>22</sup> Iesu God duwa umanawa wana ipawaida me wawe alala walama sawo mai atentopona, dia. Tane Iesu bo bedewe enenwiseno tauma mo Iesu dima bauta

---

<sup>✡</sup> **2:19:** Matiu 26.61; 27.40; Mak 14.58; 15.29

wana insene atentoiena. Do dima buka bedewe girumalena ita dima Iesu wana sumanaiwanton.

*Iesu apana nuau bedewa atemba*

<sup>23</sup> Iesu oda Pasowa bedewe Ierusalemwa leidio apala uara me ginasawa dewamodio eweie asowa waie baiwa me ebowa sumanainton. <sup>24</sup> Tane Iesu mo uduudu insaisau atenlene baiwa mai sumanaibulepona, dia. <sup>25</sup> Me mai apala da enepie sosowa benemau wapia insaisawaleipona, dia, ipawa me meba mo nuau bedewa ewedia atembaida.

### 3

*Iesu Nikodimas inaida gagalowa waeuwasade*

<sup>1</sup> Ius apalawa eiau bedeuwo dea ebowa Nikodimas, me ipa Parisi apalawa sou dea. <sup>2</sup> Me tadino dea gagalo baiwa Iesu mampe wisene diene wanase, “Debamamba, no ateten e ipa God sauwa euda wade mampe apala waeuwamoiana, ipawa e ginasa mukamukaua dewamoiana. Apalaida mai epe dewasapia rua, dia, tane naita me God mampe mukawa wadepia, me epe dewasapia rua.”

<sup>3</sup> Iesu me aiawa etene sipoasane diene wanase, “**Ne ulaipa dieedina, mai mida da God gonaawa bedewe di odepia rua, diaida!** Tane inta dea os, sa ipa apala mida osowe mulepie ina sanaa wadepia me ipa God gonaawa bedewe odepia.” <sup>4</sup> Nikodimas Iesu epe wano etene insakoalene waitarasane wanase, “E epe waiana ambi segalepi? Apala mulene debamalena tane keraulepie inawa bupa bedewe odepie ita osowe mulepi, ba?”

<sup>5</sup> Iesu leusane wanase, “Ne ulaipa dieedina, mai insakoaitaa! Mai mida da God gonaawa bedewe di odepia rua, diaida! Tane inta dea os, sa ipa apama mida esa ita Aleu kakaiwa mampe muleidie ina sanaa wadedia, me ipa God gonaawa bedewe odepia rua. <sup>6</sup> Ema wapo inse: Apama ipa osina gombau mampo wadeie muntoie ete mampe inawaa waimoi, tane Aleu kakaiwa apama ina sanaa wanamodia, sa ipa mo aleu bedewe ina sanaa God mampe wadane waimoi. <sup>7</sup> Sa baiwa ne e ideita osowe muitana umanawa dialeno etalana mampe mai insakoaitana.

<sup>8</sup> Waeuwa ema wapo inse: Lanunu nainta weuwadia rua weuwade, e moinawa eteiana tane mai ateitipona naepe inta iedie ita aleide. Epe rua deawaa apama mida Aleu bedewe muleidie ina sanaa wadedia me bedewe God Aleupa kakaiwa mukawa nolaleidie banlaitusadio leide.”

<sup>9</sup> Sape Nikodimas Iesu osowe waitarasane wanase, “Ambi ema epe segalepi?” <sup>10</sup> Ita Iesu me diaidasane wanase, “E ipa Israel waeuwau apama debamawaida, tane ambi ipa epe e dewa ema mai ateitapona? <sup>11</sup> Ne ulaipa dieedina, no dima atentena umanawa waitana, ita do dima no ewatana benemawantitana, tane no benemamba e mai etape ruawaitapona, dia. <sup>12</sup> Ne e manlawo tawo nituwa wineia umanawa gagalowantedine, ita e mai sumanaitapona, dia. E epe dewaitilana bedewe ne uba nituwa gagalowanteapo ambi e sumanaitana? <sup>13</sup> Mai mida da uboo odape alepe uba nituwa ewamopona ita gagaloulepi, dia. **Tane Apama Otopa mida uboe iene wisena me os uba ewena baiwa**

### **gagalowalepia rua.**

**14** <sup>◊</sup>Moses sala makowa bedewe mota wadenposie ia eindoe osowe seuno mida mota sa eweienna inanton. Epe rua deawaa ando God insaisawa rua Apana Otopa wadapuposidepio odepipalepi. **15** Ita apana mida me bedewe sumanaileidia inawinakasala dongsapi.”

**16** **God tawo nuawadawadaidasana baiwa me Otopa deaida amonalene nenen.** Ita mida me bedewe sumanaileidia mai kadiwa donsapie rebalepi, dia, tane inawinakasala wadepi. **17** Ipawa God me Otopa mai tawo kotusapia baiwa wapaaubepona, dia. Tane me tawo inasapia baiwa Otopa wanauben ita tawo me bedewe inalepi. **18** Ita mida God Otopa bedewe sumanaileidia me mai kotula, dia, tane mida mai sumanaileipona me aitamana kotusano wande, ipawa me mai God Otopa deaida ebewe sumanailepona. **19** **Dewa ema baiwa kotu winede: Sapa tawo osowe wisene sapa wan, tane apana sapa sa dabuasane ene dubawa nuawadawadasaiena, ipawa mo dewau kadiwaida.** **20** Apana mida kadiwa dewasadie me sapa nibuasade ita sapa sa bedewe mai odepipalepi, dia, me dewawa kadiwa sabamolepio malawalepia sawa. **21** Tane mida ulaipa mampe wandie dodomana dewasadie me sapa bedewe wisede, ita me sapa bedewe wisena eueuwa sabamosadie dewa euda dewamodia. Sa ipa God mukawa me bedewe nolaleidie dewasadie, mai me meba dewasaipona, dia.

***Ion Babatutu Iesu umanawa benemaleide***

---

<sup>◊</sup> **3:14:** Nambas 21.9

**22-24** <sup>✧</sup>Ema aupe Iesu me wawe alala do Ierusalem ene nomone bola Iudia bedewe antone sape waimoie laie ita Iesu apana isiwa babatutumodie. Tane walama sa bedewe Ion do apana babatutumodie bola Einon bedewe Salim tampe. Me bola sa bedewe babatutuleidie, ipawa sape esa eubu uara nomoie ita apana babatutu baiwa me mampe wimoie. Dewa ema ipa Ion mai diburalepona walamawe segalen.

**25** Ion apana babatutumodio me wawe alala isiwa Iuswa dea do wawanton mo etemitamitau dewawa osowe. **26** Ion wawe alala apana sa ene Ion mampe wimone waienase, “Debamamba, dewa dea os no eweite nuamba polaida wade. Apa mida e do esa Ioadan waiwa dawo eneile me umanawa e benemaitena, me do tauma babatutu nolawa dewasadio apana uduudu e eene me mampe antoi.”

**27** Ion mo ingugurau gagalowa etene diamone wanase, “God apana deadea nolauwonolauwo wanamode, mai apana da di epe nolalepia rua. **28** <sup>✧</sup>E eba asilawo eteilano ne wane wanase, ‘Ne ipa mai Keriso, tane God ne bautanene waaubaneno winen.’ **29** Eueuwa ema wapo insena: Apa mida i sanaa onedia me sowa i sa naisepia baiwa walama kerauda os baiwa me i sa oniedie wande. Tane nainai walamawaida wisepio apana sa nuaeu do i sa epio me badawaida onioniawaleidia mampelepi. Epe rua deawaa **ne nuana nuaeu nopeidoleide, ipawa apana ne eneiane Iesu mampe antoia baiwa.** **30** God

---

<sup>✧</sup> **3:22-24:** Matiu 14.3; Mak 6.17; Luk 3.19,20    <sup>✧</sup> **3:28:** Ion 1.20

**insaisawa rua me ebowa debamaidalepi tane ne me atowenteapa.”**

<sup>31</sup> Me mida uboe iene wisena me debamawaida ita dewa uduudu me atowe. Tane apanaida tawo osowe wandia, me ipa tawo mampea ita tawo insaisawa gagalowaleide. Tane me mida uboe iene wisena, me ipa debamawaida ita dewa uduudu me atowe. <sup>32</sup> Me dima ewene ita etena umanawa benemaleide, tane mai mida da me benemawa eteipe ruawaleipona, dia. <sup>33</sup> Tane apana mida me benemawa etedie ruawaleidia me eueuwa mampe sabamosade God me ipa ulaipaida, <sup>34</sup> ipawa me mida God wanaubeno wisena God aiawa ruaida wade. God me Aleupa kakaiwa me mampe mai wadapaitudepona tane me wanedie nopeidosadio God aiawa benemaleide.

<sup>35</sup> <sup>☆</sup>Mamamba Otopa nuawadawadasane ita dewa uduudu me witapesano oniede. <sup>36</sup> **Tauma me mida God Otopa sumanaiwaleidia inawinakasala donsane waden.** Tane mida me Otopa aiawa mai eteipe ruawaleipona me inaida mai donsapie wadepi, dia, tane God nuakadiwa matangelawa me osowe winakasalepi.

## 4

*Iesu Samaria iwa inaida gagalowa diede*

<sup>1-3</sup> Apana uaraia Iesu baiwantoie antoie me asisusaio ita me babatutumodie. Iesu me mebaida mai dewa ema dewasaipe, dia, tane me wawe alala mo os apana babatutumoie. Tane

---

<sup>☆</sup> **3:35:** Matiu 11.27; Luk 10.22

Ion mampe mai apana uara wimoipe ita me nolawa oauaraleidie. Tane Iesu atenlen Parisi apanawa dewa ema segaleidia umanawa eteiena, sa baiwa me mai Iudia bedewe wankasalepona,<sup>4</sup> tane me bola sa ene Galiliwa aleidia Samaria tawowa bedewainta alepi. <sup>5</sup> Me aleidie Samaria bolawa ebowa Sika bedewe wisen. Bola sa ipa maida naepe Iuswa nosiu Iakob dogo waiwa me otopa Iosep wanena. <sup>6</sup> Sape Iakob maneuba sagala, ita Iesu enauta pouwe awa nowe omo ino etepa garigarileno baiwa nosene esa sagala tampe wandie.

<sup>7-8</sup> Me wawe alala bola debama bedewe anton nana gimarantopua baiwa. Tane Iesu sape wandio Samaria iwa esa utepia baiwa wisen. Iesu me diene wanase, “Rua ba dia, esa neawo napa?” <sup>9</sup> Samaria iwa Iesu epe wano etene memesalene baiwa diene wanase, “E ambi esa baiwa ne iririneiana? E ipa Ius apanawa, tane ne Samaria iwa.” I ema epe wana, ipawa Iuswa ita Samaria apanawa do wanwambu nambenambe, mai dea.

<sup>10</sup> Tauma Iesu i sipoasane wanase, “E God amonawa euda enepia menasadia mai ateitapona, tane do apana mida e esa baiwa iririedia e mai atensapona. E dewa ema ateitapono e me iririsapono esa akasalala eneepona.”

<sup>11</sup> Tauma i me diene wanase, “Sona, esa sagala didiweido ita e manawo mai dima wineipona esa ute teineapos, tauma esa akasalala naepe utee neaa? <sup>12</sup> No atanosisimba Iakob esa sagala ema domba tone pokawaida eteno segalen. Tane me

meba, obampa do ita puewa uduudu esa ema naie ita eieno tauma no naitana. E inseiana e ipa mukamukaua, mai Iakob rua, esa mai nolawaitaama tane di segalepio utaa rua, ba?”

<sup>13</sup> Iesu sipoasane wanase, “**Apana mida esa sagala ema nadia me osowe nuawa makolempa.** <sup>14</sup> Tane mida esa ne wanapo napia me tauma ita ando nuawa mai osowe makolepi, diaida. **Esa sa ne wanapo napia me nuawa bedewe maneulempa ita esa sa me inawinakasala wanepi.**”

<sup>15</sup> I sa Iesu epe wano etene esa sa menaidasano baiwa me diene wanase, “Sona, esa sa ne neawo nape ita nuana mai osowe makolempa, tane do esa utautaa baiwa mai mape iepine poka etepina.” <sup>16</sup> Tauma Iesu i sa diene wanase, “E esa ema nanawa meneempa aitee apava e naiseana banle nata winlena!” <sup>17</sup> Me sipoasane wanase, “Ne mai apava da naisepe nata wainipona, dia.” Tane Iesu me diene wanase, “E waadewaiten wae waanase, ‘Ne mai apava da naisepe nata wainipona, dia.’ <sup>18</sup> E ulaipa waana, bauta e apava 5 naimoana, tane apava tauma wade wainiana mai e badaaida, di nata wainilana.” <sup>19</sup> Iesu i ema dewawa weregalala benemawaleno me insendewalene wanase, “Tauma ne eweene atenten e ipa God perowetawa. <sup>20</sup> Sa baiwa ne insaisana emanta osowe God ebowa wadaposisaie, tane e Ius apava wailanase, ‘Bola Ierusalem bedewe os no God ebowa wadaposisanta.’ ”

<sup>21</sup> Iesu i aiawa sipoasane wanase, “E ne gagalona wapo sumanaiwaitaa, walama iedia

wisepio apava mai wadi emante osowe, ba Ierusalem bedewe Mamamba ebowa wadaposisapu, dia. <sup>22</sup> E Samaria apanawa mai ateitipona mida ebowa wadaposisailana, tane no ipa God atentena ebowa wadaposisaitana, ipawa inaida intawa no Ius apanawa bedembo wisepi. <sup>23</sup> **Walama iedia wisepi tane aitamana wisen ita mo mida ulaipa sumanailala Aleu kakaiwa mukawa bedeuwo nolaleidia ita do ulaipa intawa asiisi Mamamba ebowa wadaposisapu, ipawa Mamamba wadapos ema menaidasade.** <sup>24</sup> God ipa aleu, ita mida me wadaposisadia me ideita aleupa bedewe inawaa waimpe ita do ulaipa mampe me ebowa wadaposisampa.” <sup>25</sup> Mape i Iesu diene wanase, “Ne atenten Mesaia no inanepia iede, me wisepie dewa uduudu waeuwadewasanepi.” <sup>26</sup> Iesu me diene wanase, “**Ne ipa sa me mida e umanawa waiana tauma e manawo gagalontedina.**”

### *Iesu nanawaida umanawa waeuwaleide*

<sup>27</sup> Iesu gagaloleidio me wawe alala nana gimarawa awa antona leuntone wimone ita Iesu Samaria iwa nata gagalontoio ewamone memesanton. Tane mo bedeuwo mai mida Iesu waitarasape waponase, “E dima baiwaitiana?” ba waponase, “E dima baiwa i nata gagaloitilana?”

<sup>28</sup> Mape i Iesu gagalowa pokawaa etena baiwa diniwalene esa dugiwa ene leulene bolawe alene ita apava diamone wanase, <sup>29</sup> “Noleno ane apava sa ewana me mida, ne dewana mai atemba, tane ambi me atenlene umanawa dianena. **Me dauwa Keriso, ba?**” <sup>30</sup> Mo i aiawa etane apava sa me umanawa wadia ewapona menamono

baiwa bolau ene nomone Iesu mampe antoie.  
**31** Samaria iwa aleidiomawa Iesu wawe alala me iririsane waienase, “Debamamba, nana da naa.”  
**32** Tane me sipoamone wanase, “Ne mainawo nana winedia napona, nana ipa e mai atenla.”  
**33** Wawe alala aia ema etane muba gagalontone waienase, “Dauwa apana da no emamba mowe nana waneieno nan, ba?”

**34** Tauma Iesu mo diamone wane wanase, “**Ne nananaida ipa ema: Mida ne waaubanena insaisawa dewasape ita me nolawa ideita di-asapatuwapi.**” **35** E wailanase, ‘No nana ante etana uaboa nataitanata dialepio aupe uwauwa walamawa wisepi.’ Tane ne dialedina emala lotone deaitopa irai ewana! Nana ipawa itun tauma asiwa mena wan totowa baiwa. **36** Mida uwauwaleidia God me ideita malesawa wanepi, ipawa me tauma nana ipawa uwauwaleidie auwede inawinakasala baiwa. Me mida lawuru naumba andia ita mida uwauwaleidia mo nata nolau ipuipua segaleidia baiwa awodea nu-aeuwantompa. **37** Aia ne wadina bedewe dima apana waia ulaipaleide. Mo waie waiase, ‘Apana dea lawuru naumba ande, tane apana da uwauwaleide.’ **38** Ne e waaubalena naepe e mai iraitaponawo sape uwauwaitana. Apana da iraintoiena tane e bopawa irai sa bedewe uwauwaitana.”

**39** Samaria apanawa uara bola Sika bedewe waimoia i gagalowa etane Iesu mampe sumanainton, ipawa i me benemawalene wanase, “Ne dewana me mai atemba, tane ambi me atenlene umanawa dianen.” **40** Sa baiwa Samaria apanawa Iesu mampe wimone iririsane

waienase, “Winewo no do ane wainenta!” Tauma Iesu mo do antone walama nata sape waimoie ulaipa intawa waeuwamodie. <sup>41</sup> Me gagalowa baiwa apana uaraia sumanainton. <sup>42</sup> Mo i diane waienase, “No mai dima e waana os baiwa sumanaintipona, dia, **tane tauma no asimbo me gagalowa etate atenten me ipa ulaipaida apana uduudu Inawamba.**”

### *Iesu gabeman otopa inasade*

<sup>43-45</sup> ☲ Iesu walama nata sape wandie ene Galiliwa alen. Me sape wiseno Galili apanawa me nuaeu mampe auwasane banlene mamposaiena. Mo uara Pasowa odawa baiwa Ierusalemwa antoiena ita Iesu sape dewa mukamukaua dewamona ewamone sumanainton. Tane mai ulaipa mampe sumanaintopona, dia. Ema bedewe Iesu dima bauta wana ulaipawanalen. Me bauta meba umanawa wane wanase, “Peroweta meba bolawa apanawa mai onieipadewantoipe aiawa ruawantoipona, dia.”

<sup>46</sup> ☲ Iesu Galili bedewainta leidie me osowe bola Kana bedewe wisen, naepe me bauta esaida dewasano wain segalenawo. Iesu nolaleidie leidio sape gabeman dea wisen. Me otopa kero wadeno nawinawilena Kapeanaumwa ituleidie. <sup>47</sup> Me Iesu Iudia ene Galili bedewe wisena umanawa etene ita Iesu mampe wisene iririsane wanase, “E ne nata ane Kapeanaum bedewe ita otona bo baiwaleidia inasaa.”

✡ 4:43-45: Matiu 13.57; Mak 6.4; Luk 4.24      ✡ 4:43-45: Ion 2.23

✡ 4:46: Ion 2.1-11

<sup>48</sup> Iesu me dima iririwaleidia etene diene wanase, “Ne ginasa dewasapo e ewane sumanaitana baiwaitilana, tane ginasa dia, e mai di sumanaitana rua.” <sup>49</sup> Gabeman dima Iesu wadia etendabue wane wanase, “Debamana, tauwadea winewo nata ana, ne otona bo baiwaleide!” <sup>50</sup> Iesu sipoasane wanase, **“Aitaa, e otoa inawaa wande.”** Ita Iesu me diena aiawa sumanaiwalene leulene alen. <sup>51</sup> Me into aleidio nolawa dewalala mampe wimone me benemasane waienase, “No nuaeu gagalowa wadate e aa winen, sa ipa e otoa inalene inawaa wande!” <sup>52</sup> Mape gabeman me nolawa dewalala auwadewasamone aupe waitaramone wanase, “Dianeno etapo omo dinea ne otona inalen?” Mo sipoasane waienase, “Imana omo kekeraleidio etepa polawa wadia dialeno inalen.” <sup>53</sup> Tane oto mamba insene atenlen omo ema rua Iesu me diene wanase, “Aitaa, e otoa inawaa wande.” Dewa mukamukaua ema Iesu dewasana baiwa gabeman ita apama uduudu me do waimoia Iesu sumanaiwanton.

<sup>54</sup> Iesu Iudia ene Galili bedewe iene nolaleidia walama we me ginasawa ema natawa dewasan.

## 5

### *Sabat walama we Iesu apama kerolala inasade*

<sup>1</sup> Iesu Galili bedewe wandie ene Iuswa odau baiwa Ierusalemwa odene alen. <sup>2</sup> Ierusalem gonaawa moawa ebowa Sipsip gonaawa moawa tampe doa ebowa Ibru aiawa mampe waia Betesda. Ita esa sa tampe du uduudu 5 enei kerolala bedeuwo waimompaa baiwa. <sup>3</sup> Bola sa bedewe kerolala uaraia waimoie, isiwa emau

potau, isiwa tampu bobopa ita isiwa witapu ba wau nukunukulala. <sup>4-5</sup> Apana dea sape kero wadeno wandio enawa 38 dianton. <sup>6</sup> Iesu bola sawo wisene apapa kerola sa ituleidio ewene ita atenlen me kero wadeno waina walama daumaidalen. Sa baiwa Iesu me waitarasane wanase, “E inaitaa meneede, ba dia?”

<sup>7</sup> Ita kerolala me sipoasane wanase, “Oa sona, ne inanteapaa menanede! Ne doa morereleidio ewedina walamawe doa bedewe iape inanteapona menaidanede, tane mai mida ne sauneipe esa bedewe ituneipona, dia. Ita ne ina baiwa esa bedewe iaia rubusadine tane apapa da bautaleidie esa bedewe iedie aleide.”

<sup>8</sup> Iesu me diene wanase, “**Enawie, nogia wade aitaa!**” <sup>9</sup> Apana kerolala tauwadea os inalene ita nogiwa wadene nosene alen. Tane dewa ema Iuswa bubuau walamawa Sabat bedewe segalen. Ita Ius apanawa eiau dewa ema ewane nuau surakauidalen. <sup>10</sup> Sa baiwa mo apapa inalena diane waienase, “E ateiten ba dia, ande ipa Sabat walamawa, no anaanamba wadia e Sabat walamawe mai nogi awanene leuna, dia!”

<sup>11</sup> Mo epe badowa dieio etene me sipoamone wanase, “Apapa mida ne inanena me wana rua ne dewasadina. Me dianene wanase, ‘E nogia wade ita aitaa!’ ” <sup>12</sup> Mape mo waitarasane waienase, “Me mida, epe dieene wanase, ‘Nogia wade ita aitaa?’ ” <sup>13</sup> Tane apapa inalena mai atenlepona mida me inasan, ipawa Iesu apapa uara sape eneio bedeuwointa nosene aleno me mai ewape atensapona, dia.

<sup>14</sup> Ema aupe Iesu apana inalena God duwa bedewe donsane diene wanase, “**Ewaa, e inaiten, tauma kadi dewawa eidasa poka rebare-baida donsaa sawa, mai bauta kero wadeeno poka etaana rua.**” <sup>15</sup> Ita apana ema mida me inasana apanawaida donsane atenlene me leulene alene Iuswa mo mida eiau diamone wanase, “Apama ebowa Iesu ne inanen.”

### *God Otopa inaida apana wanamode*

<sup>16</sup> Tane Ius apanawa eiau Iesu emalawoasane amboitusae, ipawa me dewa ema Sabat walamawe dewamodie. <sup>17</sup> Sa baiwa Iesu mo diamone wanase, “**Ne Mamana bumpe ita tauma nolaleidie wande, ita ne do deawaa dewasadina.**” <sup>18</sup> Ius apanawa eiau bauta inta banusaie Iesu bosapona baiwa. Tauma Iesu aia ema wane bopawa ensimono badowaida inta banusaiena me bosapu. Mo epe dewantoie, ipawa mo inseienase, “Me Sabat anaanawa ainpunden, tane mai sa os, dia. Do me God umanawa wadi wadiase, ‘Ne Mamana.’ Me epe wadia ewaewawa abo me God nata deawaa.”

<sup>19</sup> Iesu mo siopoamone wanase, “Ne ulaipa dialedina, God Otopa mai dima da meba insaisawa rua Mamba dima menasadia ampiboe dewasapia rua, dia. Tane dima Mamamba dewasadio ewedia rua deawaa dewasade, **ipawa Mamamba Otopa nata nolau deawaa os de-wasai.** <sup>20</sup> Ne epe wadina, ipawa Mamamba me Otopa nuawadawadasade ita dima uduudu dewasadia me Otopa euwasade. Tane do Mamamba me Otopa ando dewa debamaia euwasapio dewasapi, mai dima tauma apama tampa

bobopa mampe segalena rua. Ita e ewane memesaitana. <sup>21</sup> E ando memesaitana, **ipawa Mamamba God apapa bolala wadaposimodie inaida wanamodia rua deawaa Otopa muka waden apapa dainea me menasadia rua inaida wanamode.** <sup>22</sup> Ita Mamamba me mebaida mai mida da kotusapi, dia. Tane kotu mukawa uduudu me Otopa witapesana dewasapi. <sup>23</sup> God no Mamamba epe dewasana apapa uduudu me wadaposisaia rua deawaa Otopa wadaposisampaai baiwa. Me mida mai Otopa ebowa wadaposisaipe debamasaipona, sa ipa me mai Mamamba mida me wanaubena wadaposisaipona.

<sup>24</sup> **Ne ulaipa dialedina, mida ne aiana ete-die ruawaleidie ita mida ne waaubanena sumanaiwaleidia, me inawinakasala donsan.** Me mai kotulepie kadiwa donsapi, dia, me aitamana bo ene inaida bedewe wisen. <sup>25</sup> Ne ulaipa dialedina, walama iedia wisepi tane aitamana wisen ita bolala God Otopa aiawa etapu. Tane mida aia sa eteia inaida bedewe wampu. <sup>26</sup> Ne epe wadina, ipawa Mamamba, me ipa inaida bumpawa, sa baiwa me insaisawa rua Otopa do muka waneno inaida bumpa segalene wande. <sup>27</sup> Me ipa Apapa Otopa mida God wanaubeno wisene tawo osowe God sapawaida sabamosan. Sa baiwa Mamamba kotu mukawa uduudu me wanen.

<sup>28</sup> Mai aia ema baiwa memesaitana, **ipawa walama iedia wisepio bolala uduudu Apapa Otopa aiawa etapue** <sup>29</sup> <sup>⊛</sup>**bo bedewe enapuwimopu. Mo mida euda dewasaiena ena-**

---

<sup>⊛</sup> 5:29: Daniel 12.2

**puwimopue inaida bedewe wampu. Tane mo mida kadiwa dewasaiena enapuwimopue kotuntopu.** <sup>30</sup> Ne ulaipa dialedina, God Otopa mai dima da meba insaisawa rua Mamba dima menasadia ampiboe dewasapia rua, dia. Tane Mamamba dianedia rua kotumodina. Kotu ne dewasadina ipa dodomana os, ipawa mai neba insaisana rua kotumoipona, dia. Tane mida ne waaubanena insaisawa rua kotumodina.”

*Iesu meba umanawa benemawaleide*

<sup>31</sup> “Naita ne neba os umanana benemanteipono ne benemana ipasia. <sup>32</sup> Tane apala da ne adinawoleidie benemana wade, ita ne ateten ne Mamana benemawa ne baina wadia ipa ulaipaida.

<sup>33</sup> <sup>34</sup> Do Ion Babatutu ne umanana ulaipa mampe benemaleidio e apala isiwa waaubamolano me mampe antone benema ema etane wimone e dialeieno etalana. <sup>34</sup> Ne mai apalaida ne umanana benemantoia insaisawa wadeipona, dia, tane Ion ne umanana benemalena umanawa wadina e sumanaiwaitane inaida donsana baiwa. <sup>35</sup> Ion ipa siwa iilala rua sapa wan, ita e walama kampaida os insaisawaiile me sapawa bedewe nuaeuaten.

<sup>36</sup> Dima Ion ne umanana benemalena ipa ulaipaida. Tane dewa mukamukauaida ne dewamopatuwapia baiwa Mamamba witanawomono tauma dewamodina ipa pokawaauida, mai Ion ne umanana benemalena rua. Ita dewa mukamukaua ema mampe sabamosade Mamamba ne waaubaneno winen.

---

<sup>33</sup> <sup>34</sup> <sup>35</sup> <sup>36</sup> 5:33: Ion 1.19-27; 3.27-30

**37** <sup>氐</sup>**Ita Mamamba mida ne waaubanena do ne umanana benemalen. Tane e bumpe ita tauma me aiawa mai etapona ba me dauwa etape atensapona, dia.** <sup>38</sup> Ita do me aiawa e etalana bedelawo mai wineipona, dia, ipawa e ne mai sumanainaitipona, tane ne ipa sa mida me wanaubena!

**39** E buka kakaiwa bedewe aia banuidasaille inseilana buka mampe inaida donsana, tane sa mai inta da wineipona, dia. **Buka kakaiwa sa e wisiaitile eweilana ipa ne umanana bene-maleide.** <sup>40</sup> Tane e ne mainawo inaida wadapona baiwa winwimba dabuaitilana.

**41** Ne mai apanaida asona wanuna insaisawa wadeipona, dia. <sup>42</sup> Tane ne ateten e apava asola wampaa insaisawaiatile wainilana ita God mai nuawadawadasaipona. <sup>43</sup> Ne ipa Mamana ebowe winen ita e ne mai wadaneipe manlawosaipona, dia. Tane apava da meba mukawe wisedie wadi wadiase, ‘Ne ipa Keriso, inalepaa awa winen!’ apava sa e tauwadea banleile manlawosailana. **44 E mai sumanaitana rua, ipawa apanaida e asola wampaa baiwaitilana, tane Godida e asola waipona mai inseipona, diaida.**

**45** Mai insenase kotu walamawe ne Mamamba danawe enape e wawulepa, dia. E anaanala Moses enalana bedewe insaisala ituile inseilanase, “No anaanamba sa asiisi kotu bedewe inaida donsata.” Tane Moses dima girumalena enepie e wawulepio kotuitana, ipawa e mai Moses sumanaiwaitapona, dia. **46** Naita e Moses sumanaiwaitapono e ne do

---

<sup>氐</sup> **5:37:** Matiu 3.17; Mak 1.11; Luk 3.22

sumanainaitapona, ipawa Moses ne umanana girumalen. <sup>47</sup> E mai ne aiana sumanaiwaitana rua, dia, ipawa dima Moses girumalena e mai sumanaiwaitape ruawaitapona, dia.”

## 6

*Iesu apana 5000 nana wanamode  
(Matiu 13.21; Mak 6.30-44; Luk 9.10-17)*

<sup>1</sup> Iesu Ierusalemwa gagaloleidie diasane ene alene doa Galili tampe wisene waa asiasi nawen-pue waiwa dawo alen. Doa Galili ebowa da waia Taiberias. <sup>2</sup> Apana uaraia Iesu me ginasawa kerolala mampo dewasano eweienna baiwa me warorosane antoiena. <sup>3</sup> Tane Iesu menasana me wawe alala do muba nambe wampe bubuanton-pono nuau topona, sa baiwa mo wadiwa odane antone waimoie.

<sup>4</sup> Tane walama sawo Iuswa odaau Pasowa napua walamawa kampaleidie.

<sup>5</sup> Iesu wawe alala do sape waimoie me pisiwane apuna uaraia me mampe ieio ewamone Pilip diene wanase, “No naepe bured gimarantate apuna ema wanamoto napu?” <sup>6</sup> Iesu aia ema wana, sa ipa Pilip sumanaiwa rubusapie ewepia baiwa, tane me meba nuawe insene atenlen me ando dima dewasapi. <sup>7</sup> Pilip sipoasane wanase, “Tatamba, ambi epe dewasato segalepi. Ena dea nolawa malesawa mai rua bured gimarantate apuna uaraia ema nana kampa kerakera wanamoto napu!”

<sup>8-9</sup> Wawe alala da Saimon Pita wamba Endru mo epe gagalontoio etamone Iesu diene wanase, “Oto mape enedia mampe bured uduudu 5 ita

bouri kerakera nata winei, tane sa apana uara mai napuo pokamopia rua, dia!” <sup>10</sup> Tane Iesu wawe alala mampo wane wanase, “Apama diamono nana baiwa aisintopue wampu.” Mo Iesu wana rua apama diamoieno sape bola euda ina osowe uduudu aisintone waimoiena. Sape apama mona os wisiawa 5000 rua waden.

<sup>11</sup> Tauma Iesu bured otamone God auwasano dialeno apama sa uara menamodia rua wamanon. Tane deawaa bouri wadene God auwasane mampo amonaleno nane pokamon. <sup>12</sup> Apama uduudu nana nane pokamono Iesu wawe alala diamone wanase, “Nana moawa winakasalena auwena, mai da eno kadilepi, dia.” <sup>13</sup> Ita mo uduudu bured 5 Iesu dewasano uaraleno apama naie eiena moawa auwene posawa 12 aimoieno nopemoiena.

<sup>14</sup> Apama sape wimoiena Iesu ginasawa ema dewasano ewane waienase, **“Ulaipa, me ipa peroweta tawo osowe wisepona umanawa waia tauma wisen.”** <sup>15</sup> Mo epe waio Iesu atenlen apama me ginasawa eweienia baiwa mo insaisau rua wareresapua baiwantoi. Sa baiwa me osowe apama emone meba os wadi sa osowe bola dainalawo odene alene wandie.

*Iesu wawe alala mampo esa osowainta aleidie  
(Matiu 14.22-33; Mak 6.45-52)*

<sup>16</sup> Rawileidio Iesu wawe alala os wadiwae iane anton esa tampe. <sup>17</sup> Sape mo waa bedewe odane nawane Kapeanaumwa antoio tadinalen, tane Iesu mai tauwadea mo mampo wisepona, dia. <sup>18</sup> Mo muba nawane antoio lawara badowa wiseno esa tepaidaleidio a babiidasaie. <sup>19</sup> Wawe

alala wolentone doa Galili sawanawentoio Iesu esa osowainta enene iedie waa mampeleidio mo ewane saidantone uwauwanton. <sup>20</sup> Tane Iesu mo saidantoio ewamone diamone wanase, “**Mai saitana, ne iedina!**” <sup>21</sup> Tauma mo nuau badoleno menaidamodia Iesu waa bedewe odepe wampona. Ita me odene waino waa tauwadea doa waiwa naepe antoiawo nomoiena.

<sup>22</sup> Imonemba apama uaraia doa waiwa dawo emoiema insene atenton Iesu wawe alala do waa dea asiasi wimon ita waa sa deawaa osowe nawane leuntone anton. Tane Iesu mai me wawe alala do antopona. Sa baiwa mo insakoantone inseienase, “Iesu naepe alen?”

<sup>23</sup> Waa isiwa bola Taiberias ene doa waiwa dawo naepe bauta Tatamba Iesu bured wadene auwalene apama wanamono naienawo wimone eneie. <sup>24</sup> Apama waiwa sawo wankasantona Iesu banusanalewantone tauma atentoiena Iesu ita wawe alala do mai sape, dia. Sa baiwa mo waa sape eneia bedeuwo odane nawane Kappeanaumwa antone Iesu banusaie.

### *Iesu me ipa buredida apama inaida wanamode*

<sup>25</sup> Apama doa waiwa dawo Iesu donsane di-anne waienase, “Debamamba, walama dainea e mape wien?” <sup>26</sup> Iesu sipoamone wanase, “Ne ulaipa dialedina, e ne banuneilana, ipawa e bured nale pokalen, mai ginasa ewape ipawaida ateitape baiwa ne banuneipona, dia! <sup>27</sup> **Mai nana kadilepie dialeapia baiwa insenune nolawaitonuna, dia. Tane nanaida winakasalala Apama Otopa e enalepia insenune nolawaitonuna! Ita nana ipa sa mampe e inawinakasala**

**wadana. Ne epe wadina, ipawa Apana Otopa Mamamba mampe muka waden nanaida winakasalala apava wanamopia baiwa.”**

<sup>28</sup> Apana sape eneia Iesu epe wano etane insakoantone me waitarasane waienase, “No ambi dewantate God nolawa ruawantate dewasata?”  
<sup>29</sup> Iesu sipoamone wanase, “God nolawaida e dewasana menasadia ipa ema epe: **E sumanaitana mida me wanaubena mampe!”**

<sup>30</sup> Tane mo Iesu waitarasane waienase, “E ginasa da dewasawo no ewate sumanaintata! E dewa inainamba dainea dewasawo no atentata God e waaubaeno wien? <sup>31</sup> <sup>◊</sup>E nana winakasalala apava wanamoa umanawa waana. Tane no nosinosimba sala makowa bedewe nana ebowa waia Manna naiena. Ita buka bedewe girumalena wadi wadiase, ‘Me bured uboa wanamon napua baiwa.’”

<sup>32</sup> Iesu mo sipoamone wanase, “Ne ulaipa dialedina, Moses mai bured uboa e nosinosila wanamopona, dia. Tane tauma ne Mamana burredida uboa enalede. <sup>33</sup> Ne epe dialedina, **ipawa buredida God mampea ipa me mida uboe iene wisene ita tawo inaida wanedia.”**

<sup>34</sup> Iesu burredida umanawa wano mo etane me diane waienase, “Tatamba, bured ema walama uduudu nenono nanta!”

<sup>35</sup> Tauma Iesu wasabamosane wanase, “**Ne ipa buredida apava inawinakasala wanamodina. Mida ne mainawo iedia mai omanatopi, diaida, ita mida ne mainawo sumanaileidia mai nuawa makolepi, dia.** <sup>36</sup> Tane ne bauta dialena rua tauma segaleide, e ne ewanele tane

---

<sup>◊</sup> **6:31:** Ekisod 16.4,15

mai sumanaitipona, dia. <sup>37</sup> Mai apana da meba insaisawa rua sumanailepie mainawo wimpia rua, dia! **Tane apana mida Mamana sonabedie ne nedia me ipa mainawo wimpi. Ita mida ne mainawo wisena ne mai tanapo nosepie alepi, diaida.** <sup>38</sup> Ne epe dewanteapa, ipawa ne uboe iane winena mai ne neba insaisana dewasapaa baiwa, dia. Tane mida ne waaubanena insaisawa dewasapaa baiwa winen. <sup>39</sup> Ita ne Mamana waaubanena insaisawa ipa ema epe: **Apana mida Mamana ne nedia mai da ewapakadisapo rebalepi, dia. Tane walama ompa osowe inasapo bo bedewe enepiwisepi.** <sup>40</sup> Ita do ne Mamana waaubanena insaisawa ema epe: **Apana mida me Otopa ewedie me bedewe sumanaileidia inawinakasala wadedie mampesade. Ita ne walama ompa osowe me inasapo bo bedewe enepiwisepi.**”

<sup>41</sup> Ius apanawa gagalo ema etane momoduntoiena, ipawa Iesu wane wanase, “Ne ipa bure-dida uboe iane winen.” <sup>42</sup> Mo waienase, “Apana ema ipa Iesu, Josep otopa. Me mamba ita inawa no ateinimba, tane ambi tauma me wadiase, ‘Ne uboe iane winen?’ ”

<sup>43</sup> Iesu mo momoduntoio etamone diamone wanase, “Mai eba momoduitonuna, eidasa!

<sup>44</sup> Ne epe dialedina, ipawa mai mida da meba mukawe ne mainawo wimpia rua, dia! Tane dea os, mida Mamamba nuawa teinepio ne mainawo wimpi, ita walama ompa osowe me inasapo bo bedewe enepiwisepi. <sup>45</sup> Peroweta bukau bedewe girumalena epe wadi wadiase, ‘God meba mo uduudu waeuwamopio me insaisawa atentopu.’

Sa baiwa mida Mamamba aiawa asisusadie ita me mampe aten wadedia, me ne mainawo wimpi. **46** Mai mida Mamamba ewapona, diaida! Dea os, mida Mamamba mampea me Mamamba ewen ita me inainamba sabamosade. **47** **Ne ulaipa dialedina, mida sumanaileidia me inawinakasala wadedie mampesade.** **48** **Ne ipa buredida apapa inawinakasala wanamodina.** **49** E nosinosila sala makowa bedewe bured ebowa waia Manna naiena tane mai inawinakasala donsapona, dia, uduudu bontontuwan. **50** Tane bured ne umanawa wadina ipa uboe iene wisena ita apapa mida bured ema nadia ando mai bolepi, diaida. **51** Ne ipa bured inawinakasalala uboe iane winena, apapa mida bured ema nadia me inawinakasala wadedie mampesade. **Tane bured ema ipa ne etenaida itudi edina tawo inasapaa baiwa.”**

**52** Iuswa gagalo ema etane nuau kadileno muba wawadiadiantone waienase, “Ambi apapa ema meba etepa nenepio nata?” **53** Iesu mo insakoau gagalowa etene baiwa diamone wanase, “Ne ulaipa dialedina, e mai Apapa Otopa etepa ita me osinawa nana e bedelawo inaida dia. **54** Apapa mida ne etena ita osinana nadia me inawinakasala wadedie mampesade, ita ne walama ompa osowe me inasapo bo bedewe enepiwisepi. **55** **Ne ema epe wadina, ipawa ne etena ipa nanaida apapa ina wanamode, ita ne osinana ipa esaida, mida nadia me inaida esawa wadedie mampesade.**

**56** Apapa mida ne etena ita osinana nadia me ne bedenawo wankasaleide ita ne me be-

dewe wainedina. <sup>57</sup> Mamamba wankasalala ne waaubanen ita me wandia baiwa ne wainedina. Deawaa mida ne etena nadia ne wainedina baiwa me rua os wankasalepi. <sup>58</sup> Mapo e nosinosila bured Manna naie tane bontontuwan. Tane bured winakasala ema ipa uboe iene wisen ita apuna mida bured ema nadia me wankasalepi, mai ando bolepi, dia.” <sup>59</sup> Iesu waeuwa ema gagalo duwe Kapeanaum bedewe wan.

### *Inawinakasala gagalowa*

<sup>60</sup> Iesu meba umanawa epe wano me warorowa etane nuau eino baiwa mo bedeuwo apuna uara wane waienase, “Waeuwa ema badowaia, mida etaeta menasade?” <sup>61</sup> Mo dima momoduwantioia Iesu nuawe atenlene baiwa mo diamone wanase, “Ne aia ema wano e etale nuala surakausano baiwa eneana baiwaitilana, ba? <sup>62</sup> Ne uboe iane winena umanawa e dialeno etale nuala surakaulen. Tane Apuna Otopa bauta wandiawo odepri alempo ewonuna walamawe dewa inainamba dainea segalepi e manlawo? E ne sumanainaitana, ba dia?

<sup>63</sup> God Aleupa inaida apuna wanamode, tane apunaida ete sauwa onapea mai inaida apuna wanamopia rua, dia. **Tane aia ne dialena mampe ne e Aleu kakaiwa ita inaida enaledina.** <sup>64</sup> Tane e bedelawo isiwa mai sumanaintoipona, dia.” Iesu epe wana, ipawa me bumpeido atenlen mida me warorowa bedeuwo mai sumanaintoipona. Ita do atenlen mida ando me dabuasapie nanalepi. <sup>65</sup> Iesu osowesane wanase, “E bedelawo isiwa mai sumanaintoipona baiwa ne bauta dialene wanase, ‘Mai mida da me meba mukawe mainawo wimpia rua, dia.

**Tane me mida ne Mamana sausapie mukawa wanepio mainawo wimpi, mai mida da.’ ”**

<sup>66</sup> Gagalo ema aupe Iesu warorowa uara me wawe awa dabuantone eiena. <sup>67</sup> Mo ene antiomawa Iesu wawe alala 12 me do sape eneia waitaramone wanase, “E do menaledia ne eneane aitana, ba?” <sup>68</sup> <sup>✡</sup>Saimon Pita Iesu sipoasane wanase, **“Tatamba, e epe waiana no mida mampe antata? Inawinakasala aiawa e os manawo winede, no mai na ana rua, diaida! ”** <sup>69</sup> No sumanaintene atenten e ipa kakaiwaida God mampea wien!” <sup>70</sup> Iesu Pita dima wana etene mo uduudu diamone wanase, “E wanawo alala uduudu 12 ne sonabadena, tane apava dea os e bedelawo kadi mamba Seitan bedewelene nolaleide!” <sup>71</sup> Aia ema Iesu Iudas Saimon Iskariot otopa umanawa wan. Me ipa Iesu wawe alala 12 bedeuwo mida ando Iesu dabuasapie laga mampe nanalepia.

## 7

*Iesu me wanwamba do oda bedewe antoi*

<sup>1</sup> Ema aupe Iesu bola Galili bedewainta leidie, me mai menasapona Iudia bedewe alepi, dia, ipawa Iuswa eiau sape waimoia inta banusaia me bosapua baiwa. <sup>2</sup> Me Galili bedewe wandio Iuswa odau ebowa waia Ape odawa walamawa kampalen. <sup>3-4</sup> Sa baiwa Iesu wanwambaida me diane waienase, “Apava mida menasadia ebowa debamalepona, me nolawa mai werego dewasampa, dia. Tane sabamo apava uduudu emauwo dewasampo ewamompa. E ipa ginasa

---

<sup>✡</sup> **6:68:** Matiu 16.16; Mak 8.29; Luk 9.20

dewalala apanawa, sa baiwa mai bola kerakera bedeuwointa wanempa, dia. E bola debama bedewe aite apata uduudu danauwo mukaa sabamosaa. Sa baiwa tauma Galili ee aite Iudia bedewe dewa mukamukaua sape dewamowo e waroroa ewapu!"

<sup>5</sup> Iesu wanwambaida epe waiena, ipawa mo apata isiwa ruau mai me sumanaiwantopona, dia. <sup>6</sup> Mo Iesu epe dieiena baiwa me diamone wanase, "Ne oda ema bedewe anteapa walamaida mai tauma wisepona, dia. Tane e baila walama uduudu wadaaubala winede, mai dima da enabodaleipona. <sup>7</sup> Ne ema epe wadina, ipawa apata tawo ema insaisawa dewasaie waimoia e mai nibualepua rua, dia. Tane mo ne nibuaniei, ipawa mo dewau ne wasabamosadine wadinase, 'E ipa kadiwaida dewasaile wainilana!' " <sup>8</sup> Me epe wano dialeno aupe wanwamba diamone wanase, "E eba oda awa aitana! Ne tauma mai ieipona, ipawa ne walamanaida mai wisepona, dia." <sup>9</sup> Iesu epe wane Galili bedewe wankasalen.

<sup>10</sup> Iesu wanwamba oda osowe antoieno aupe me wandie mamoo wauwo Ierusalemwa odene alen. Tane me mai sabamo alepona, dia, weregainta os odene alen. <sup>11</sup> Tane oda sa bedewe Iuswa eiau Iesu wadapua baiwa onioniawantoie waimoie waitarantoie waiase, "Apata ema naepe, e ibuwa ewalana, ba dia?"

<sup>12</sup> Apata uara oda awa wimoiena bedeuwo Iesu osowe asibenebenema debamaidalen, tane mo insaisau mai dealepona, dia. Mo bedeuwo isiwa Iesu asowa waie waiase, "Me ipa apata euda," tane isiwa sipoamoie waiase, "Dia, me ipa

lagawaa, apama banlakadisamode.” <sup>13</sup> Tane mai mida Iesu umanawa sabamo wapona, ipawa mo Ius apanawa eiau sauntoienaa.

*Iesu God duwe meba waeuwa bumpa bennawaleide*

<sup>14</sup> Iuswa odau sawanawe Iesu do God duwa bedewe odene alene God aiawa waeuwaleidie. <sup>15</sup> Ita Ius apanawa me waeuwawa etane memesantone waienase, “Apama ema aten insaisawa naepe wadene epe gagaloleide? Me mai anaana waeuwalala mampo girumalepe aten wadapona, dia.”

<sup>16</sup> Iesu mo dima waia etene sipoamone wanase, **“Ne waeuwana ema ipa mai ne neba insaisanawo wiseipono waeuwanteipona, dia. Tane ne waeuwana ema ipa mida ne waaubanena mampea waeuwantedina.”** <sup>17</sup> Apama mida God insaisawa dewawa menasapia me ando atenlepi ne waeuwana ide God mampea, ba ne neba mukanawo waeuwantedina. <sup>18</sup> Apama mida meba mukawa mampe waeuwaleidia, sa ipa me meba ebowa ituposisampaa baiwa nolaleide. Tane apama mida me wanaubena ebowa wadopsisampaa baiwa nolaleidia, me ipa ulaipaida, ita me bedewe mai laga da wineipona, dia. <sup>19</sup> Moses God anaanawa e enaleno wadalana, tane mai mida da e bedelawo anaana sa ruawaleipona, dia. E God anaanawa ema wadalana, tane dima baiwa e ne nibuaneile boneana intawa banuitilana?”

<sup>20</sup> Mo uara me sipoasane waienase, “Mai mida da e boepia baiwaleipona, dia. E epe waiana,

ipawa e bedeawo aleu kadiwa wande.” <sup>21-23</sup> ☲Mo Iesu epe wawusaio etene sipoamone wanase, “Ne Sabat walamawe nolantene apana tampa bobopa inasana. Ne ginasa ema Sabat walamawe dewasano e ewale memesaiten. Tane e eba insenadewaitana: Moses e ete nonowa dewawa enalen, tane sa ipa mai Moses meida mampea manlawo wisepona, tane no nosinosimba mampoa manlawo wisen. Moses anaanawa wadia rua oto mona muleidio wiki dea dialeidio aupe etepa noilana. Tane ete nonowa walamaaida Sabat bedewe segaleidio e do nolaitile oto etepa noilana. Ema bedewe e ete nonowa anaanawa ruawaitile mampe Sabat anaanawa aneilapundede. Ita e epe dewaitile mai dima da wawuleipona, dia. Sabat walamawe e ete nonowa dewawa dewasailana. Ne e ruala Sabat walamawe nolantedine apana etepu uduudu inasadina, tauma dima baiwa e nuala kadileide ne mainawo? <sup>24</sup> Mai anaana dima wadia onapea os ewonuna, dia! Tane anaana ipawaida banusanune ewane ateitana dewa dainea kadiwa ita dinea euda.”

### *Iesu dauwa Keriso, ba?*

<sup>25</sup> Iesu epe gagaloleidio Ierusalem apanawa isiwa insaisantone waienase, “Apana ema dauwa mida mo bosapua baiwa banusaia tauma gagaloleidio eweitana, ba? <sup>26</sup> Me ema sabamo enedie gagaloleide, tane mai mida da me amboitusaipona, dia. Sa ipa ambi? No apanamba eiau dauwa ewane atentoiena me ipa Keriso, ba?” <sup>27</sup> Tane mo insenadewantone waienase,

---

✡ 7:21-23: Bumpai 17.10    ✡ 7:21-23: Ion 5.9

“Me ipa mai Keriso, ipawa apama ema bolawaida no ateinimba. Tane Kerisoida ando wisepia me bolawaida mai mida atenlepi, dia.”

<sup>28</sup> Iesu God duwa bedewe waewaleidie dima me umanawa waia etene aiawa mukalene wasabamosane wanase, “Dima e wailana ipa ulaipa, e ne ateinelana ita do ne bolana e ateiten. Tane e ne mai atenidaneapona, dia! Ne mai neba mukanawo wineapona, dia, tane mida ne waaubanena wande, ne me mukawa mampe winene nolantedina. E mai me atensapona, dia, <sup>29</sup> tane ne me atensana, ipawa ne me mampea, ita me ne waaubaneno winen.”

<sup>30</sup> Iesu mo dodomana sipoamono mo etane nuau kadiidaleno baiwa inta banusaie me wadapaitudepona baiwa. Tane mai mida da witapa me osowe itupona, dia, ipawa Iesu walamawaida mai wisepona. <sup>31</sup> Apama uaraia bedeuwo isiwa me mampe sumanaintone waienase, “No ateten Keriso wisepie me ginasa uara dewamopi, ita apama ema ginasa uara dewamodio eweitana. Me dauwa Keriso, ba?”

<sup>32</sup> Apama uaraia oda baiwa auweiena mo Iesu umanawa weregainta epe gagalontoie laio Parisi apanawa etamoienia. Sa baiwa pirisi debamau ita Parisi apanawa God duwa onionialala isiwa waaubamoienna Iesu wadapuitue diburasapua baiwa.

<sup>33</sup> Mo me wadapaitudepona baiwa banusaio Iesu atenlene wane wanase, “Walama kampaida os ne e do wanta, tane ema aupe leunteape anteapa mida ne waaubanena mampe. <sup>34</sup> Walama sawo e ne banuneane tane mai doineana, dia,

ipawa naepe ne wainepinawo e mai aitana rua,  
diaida.”

<sup>35</sup> Ius apanawa eiau Iesu epe wano etane muba wawadiadaintone waienase, “Me naepe alepie waimpo no banusate mai donsataa rua? Me dauwa Girik bolawa isiwa naepe no apanamba Iuswa isiwa deaantone waimoia ita do Girik apanawa mampo alepie waeuwamopia umanawa wade, ba? <sup>36</sup> Tane do me wane wanase, ‘Ne banuneane tane e mai doineana, dia. Ita naepe ne wainepinawo e mai aitana rua, diaida.’ Aia ema me wamodia ipawaida no mai atentipona, me dima umanau wamode?”

### *Iesu inawinakasala esawa gagalowaleide*

<sup>37</sup> Oda ompa osowe, walama sa ipa debamawaida, Iesu gagalo baiwa enene aiawa mukalene wane wanase, “**E mida nuaa makolempa ne mainawo wino esa ne eneepo nae nua topi.** <sup>38</sup> **Ita mida ne mainawo sumanaileidia me nuawa bedewe inaida esawa debama maneulempa,** buka bedewe girumalena rua.”

<sup>39</sup> Iesu gagalo ema wana, sa ipa me Aleu kakaiwa umanawa wan. Apana mida Iesu bedewe sumanaintoia mo ipa Aleu kakaiwa wadapu. Tane walama sawo God Aleupa kakaiwa mai apapa wanamopona, dia, ipawa Iesu mai bolepe enapawisepe me sapawaida bedewe odape alepona.

### *Apapa empuempuntoi Iesu baiwa*

<sup>40</sup> Apapa uara sape eneia aia ema etane osowe empuempuntone, isiwa wane waienase, “Ulaipa, apapa ema ipa perowetamba wisepona tauma

wisen.” <sup>41</sup> Ita mo bedeuwo isiwa insene waienase, “**Me ipa Keriso Inawamba.**” Tane mo bedeuwo sosou isiwa amboitumone waienase, “E ambi epe wailana? Iesu me ipa Galili apanawa, tane Keriso mai Galiliwae wisepi, dia. <sup>42</sup> <sup>◊</sup>E etale ateiten ba dia, buka bedewe girumalene wanase, ‘Keriso warere Dawid damba bedewe wisepie ita Dawid bolawaida Beteliem bedewe mulepi.’” <sup>43</sup> Apana epe wakoantoia baiwa mo Iesu osowe empuempunton. <sup>44</sup> Apana isiwa menamona Iesu wadapaitudepona, tane mai mida da witapa me osowe itupona, dia.

<sup>45</sup> Tane God duwa onionialala Iesu wadapona baiwa antone me gagaloleidio insaisau oauaraleno di leuntone pirisi debamau ita Parisi mida mo waaubamoiena mampo anton. Mo di wimoieno baiwa waitaramone waienase, “Dima baiwa mai Iesu wadapaitue do wilepona?” <sup>46</sup> Tane God duwa onionialala sipoamone waienase, “**Mai apana da epe gagalolepona me gagaloleidia rua,** dia, sa baiwa no mai wadapaitudepona.” <sup>47</sup> Onionialala di leuntone wimona gagallowantoio mo etane diamone waienase, “Iesu e do lagaledie nuala teineno assusaile, sa baiwa e mai wadape do wilepona, ba? <sup>48</sup> Apana eiau ita Parisi bedeuwo mai dea da me sumanaiwantoipona, dia! <sup>49</sup> Tane mo mida me sumanaiwantoia mo ipa apana di wankoalala, Moses anaanawa mai da atentoipona, dia. Mo ideita God insaisawa rua kadiwa donsapu.”

<sup>50</sup> <sup>◊</sup>Ita Parisi bedeuwo apana dea ebowa

---

<sup>◊</sup> **7:42:** 2 Samuel 7.12; Maika 5.2    <sup>◊</sup> **7:50:** Ion 3.1,2

Nikodimas, mida bauta Iesu mampe alena, me sape enedie sosowa diamone wanase,<sup>51</sup> “No anaanamba wadia ipa no bauta apana mida wawusaite Wadeititudedia gagalowa estate ita dima me dewasadria dongsatadewae, tauma kolutusata.”<sup>52</sup> Ita mo sou Nikodimas Iesu adiweleidia dauwa etane atentone me wawusane waienase, “E do Galili apanawa, sa baiwa apana sa adiweitiana, ba? Buka bedewe wisiaite ewee ita ateitaa mai peroweta da Galiliwae wisepi, dia.”<sup>53</sup> Tane apana uduudu sape eneia mai insaisau dealepona baiwa ene bolauwobolauwo antoiena.

## 8

### *I ninala banlene Iesu mampe wimoi*

<sup>1</sup> Ema aupe Iesu Ierusalem ene wadi Olib osowe alene sape wandie. <sup>2</sup> Tane imonemba walama pundedio me leulene God duwa bedewe alen. Me sape wiseno apana uduudu me mampe wimoieno me aisdene waine waeuwamodie. <sup>3</sup> Tane Iesu waeuwaleidioma anaana waeuwalala ita Parisi apanawa i dea ninaleidio dongsane wadanaitue banlene apana uara sape eneia danauwo wi-mon. <sup>4</sup> Ita mo Iesu diane waienase, “Debamamba, no i ema ninaleidio dongsate banlete winen. <sup>5</sup> No anaanamba bedewe Moses dianena i epe dewala seu mampe epapubolepi. Tauma e kadi inainamba ema baiwa ambi inseiana? Waeuwawewo atentata!”

<sup>6</sup> Mo waitara ema mampe lagasaia, me aia da wapikadisapio osowe enapue wawusapua baiwa. Mo epe waio Iesu mai sipoamopona, tane me dunelene witapa uraupa mampe aia isiwa dogo osowe girumalen. <sup>7</sup> Tane mo kainokaino epe

waitarasaio me pisiwane enene diamone wanase, “E mida i ema banlele wilena bedelawo mida kadiwa i ema dewasana rua mai dewasapona, me bauta seu wadepie i osowe umepie ita me bosapua intawa wadepiaubepi.” <sup>8</sup> Ita Iesu osowe dunelene witapa uraupa mampe dogo osowe girumalen.

<sup>9</sup> Mo dima Iesu wana etane apama tontau bautantone ene anton ita wauwo apama uduudu antonatuwaiena, ita Iesu i nata muba sape enakasanton. <sup>10</sup> Tauma Iesu pisiwane i ewene wanase, “Apama mida e banlaene wimoiena tauma naepe anton? Mai mida da e kotuepe matangelaepona, ba?”

<sup>11</sup> Iesu i ema epe waitarasadio me sipoasane wanase, “Mai mida da ne kotuneapona, dia.” Ita Iesu me diene wanase, **“Ne do mai e kotuepa, dia. E aitaa duawo, tane kadiwa dewawa eidasaa, mai osowe dewasaa, dia!”**

*Iesu meba umanawa benemaleidio Parisi  
apanawa me amboitusai*

<sup>12</sup> <sup>◊</sup>Iesu osowe apama mampo gagalolene wanase, **“Ne ipa tawo sapawa. Mida ne wanawo iedia me mai duba bedewainta waimpe leumpa, diaida. Tane me sapa wadepie mampesapio ita sapa sa inaida wanepio wankasalepi.”**

<sup>13</sup> <sup>◊</sup>Mape Parisi apanawa Iesu diane waienase, “E eba umanaa benemaitiana, sa baiwa e benemaa ipasia.” <sup>14</sup> Iesu sipoamone wanase, “Sa ulaipa, ne neba umanana benemantedina. Tane

---

<sup>◊</sup> **8:12:** Matiu 5.14; Ion 9.5    <sup>◊</sup> **8:13:** Ion 5.31

ne benemana ideita ipuipua badowa winede, ipawa ne neba ateatenten ne nainta winen ita ando naepe inta anteapa. Tane e mai ateitapona ne nainta winen, ba naepe inta anteapa. <sup>15</sup> Ne epe wadina, ipawa e apanaida insaisawa mampe sosola ewamoile kotuitilana. Ne mai e dewaitilana rua apana kotumoipona, dia. <sup>16</sup> Tane ne kotunteapa, sa ipa ne ulaipa dodomana os mampe dewasapa. Ipawa mai ne neba mukana mampe dewasapa, dia, tane Mamamba ne waaubanena nata mukamba deawaa mampe apana kotumota. <sup>17</sup> E anaanala bedewe girumalena ema epe Wade: Kotu bedewe apana nata kadiwa benemantompe saisaisapua kotu sa ulaipalepi. <sup>18</sup> Epe rua ne neba umanana benemantedina ita Mamamba waaubanena do ne umanana benemaleide.”

<sup>19</sup> Iesu me Mamba umanawa wano mo etane me waitarasane waienase, “E mamaa naepe wandia umanawa waiana?” Iesu sipoamone wanase, **“E ne mai ateineapona do Mamana mai atensapona, dia. Naita e ne ateineapono e ne Mamana do atensapona.”** <sup>20</sup> Iesu aia ema God duwa bedewe naepe pulo itutulawo waeuwamodie epe wan. Tane mai mida da me wadapaitudepona, dia, ipawa me walamaawida God insaisawa rua ituna mai wisepona.

### *Iesu awa intawa*

<sup>21</sup> Ema aupe Iesu apana mida God duwe auweiena osowe diamone wanase, “Ne ando bonteape elepe naepe winenawo anteapa. Ita ne e elepo e Keriso inawala da banusanune tane mai donsane inaitana rua, dia. Ita e kadi dewasailana bedewe boitana. Naepe ne antedinawo e ando

mai winlena rua, dia.” <sup>22</sup> Ius apanawa aia ema etane insakoantone waitarantone waienase, “Me meba insaisawa rua epaepabobolepi, ba? Dauwa ema baiwa me wadi wadiase, ‘Ne naepe antedinawo e mai winlena rua.’ ”

<sup>23</sup> Tane Iesu gagaloleidie wane wanase, “E tawo osowe wanwanlala, tane ne uboe winen. **E ipa tawo ema mampea, tane ne mai tawo ema mampea, dia.** <sup>24</sup> Sa baiwa ne e dialene wanase, ‘E kadila bedewe boitana.’ Naita e mai sumanaitana ne ipa me, e ideita kadila bedewe wanlempemboitana.”

<sup>25</sup> Iesu aia ema wano mo etane nuau enidasano diane waienase, “E mida, dima awa wien?” Tane Iesu leusane wanase, “E ateiten ne mida, ne umanana ne nolana uwaantena walamawe ita tauma dialeno etalana, sa ipa sa.”

<sup>26</sup> Ne e dewa uara baiwa wawulepe kotulepona, tane mai tauma dewasaipona, dia. Me mida ne waaubanena ipa ulaipa ita dodomana os. Ita dima me ne dianedio etedina rua ne tawo ema apanawa diamodina, mai neba insaisana rua, dia.

<sup>27</sup> Tane Iesu me mida wanaubena umanawa wadio mo eteie mai atentopona me apa Mamamba umanawa wadie. <sup>28</sup> Sa baiwa Iesu mo diamone wanase, “Tauma e mai ateitapona ne mida, dia. Tane e Apapa Otopa koros osowe wadanaposie seuno bolepie enepiwisepie uboo odepialepio tauma e ateitana ne ipa sa mida Mamamba wanaubena. Do walama sawo e ateitana ne mai neba mukanawo wineape nolanteipona, dia, tane Mamamba waeuwanena rua ne gagalontedina. <sup>29</sup> **Mida ne waaubanena mai ne**

**eneapona, dia. Me ipa ne do, ipawa ne walama uduudu dima me menasadia ruaida dewasadina.”**

<sup>30</sup> Apana aia ema Iesu wadio eteie mo bedeuwo uara me sumanaiwanton. <sup>31</sup> Ita apana mida me mampe sumanaintona me diamone wanase, “**E ne sumanainaiten, tane e ne aiana ruawaitonune bedewe wanlempa e ulaipa ne wanawo alala segaitana.** <sup>32</sup> **E epe dewaitonuna e ulaipa intawa ateitena, ita ulaipa sa kadi taiwa e tau-doledia lotopiaubepio inaitana.**” <sup>33</sup> <sup>✡</sup>Tane mo Iesu sipoasane waienase, “No Abraam obampa wainitana, dima God Abraam sauasana, sa ipa no nubaamba. Ita mai dima da no taudoneipona, dia. E ambi waiana no lotonepono inantepona?” <sup>34</sup> Iesu leusane wanase, “Ne ulaipa dialedina, apana mida kadiwa dewasadia, kadi me taudido-dedio ita kadi nolawa dewala wanaleidie wande. <sup>35</sup> Waeuwa ema wapo insena: Nola dewala taudola mai du apanawa do wankasantopu, dia, tane du apanawa otopaida me nata wankasantopu. <sup>36</sup> **Tane du apanawa otopaida, sa ipa ne God Otopa umanawa wadina, me e kadila taiwa lotopia e ideita inaitene euiten ita mai dima da e taudoleipona.** <sup>37</sup> Ne ateina e ipa Abraam obampa, tane ambi ipa epe e ne boneana bai-waitilana? E ne boneana baiwaitilana, ipawa ne aiana e bedelawo mai bolawa da wineipona, dia. <sup>38</sup> Ne Mamana mampe dima ewana rua dialedina, tane e eba mamala mampe dima etalana ruawaitile dewasailana.”

<sup>39</sup> Mo Iesu gagalowa etane amboitusane waien-

---

<sup>✡</sup> **8:33:** Matiu 3.9; Luk 3.8

ase, “Abraam ipa no mamamba, mai mida da.” Tane Iesu sipoamone wanase, “Naita e Abraam obampaidaewo Abraam dima dewasana rua e dewasaipona. <sup>40</sup> Ne ulaipa gagalowa God mampe etana rua e dialena, tane e ne boneana bai-waitilana. Abraam mai epe dewalepona, dia. <sup>41</sup> E ipa dima mamala dewasadia rua dewasailana.” Mape mo Iesu aiawa etanadabue waienase, “God meba os no Mamamba, no mai into mula wainipona, dia.”

<sup>42</sup> Iesu mo sipoamone wanase, “E wailanase, ‘God os no Mamamba,’ tane God e Mamalaewo e ne nuawadawadaneipona, ipawa ne God mampee winen. Ne mai neba nuanawo wineapona, tane mida ne waaubanena insaisawa rua winen. <sup>43</sup> E dima baiwa ne aiana eteile tane ipawaida mai ateitipona? Ne aiana e manlawo saiwaida wan, sa baiwa e mai etane ruawaitana rua. <sup>44</sup> E ipa kadi mamba Seitan mampea, me ipa e mamala ita dima me menasadia rua e dewasailana. Kadi mamba ipa bumpeido ita tauma apana epaepabobola, ita me bedewe ulaipa dia, laga os. Ita me mai ulaipa mampe wainipona. Me lagalempa, sa ipa me mebaida gagalowa wade, ipawa me lagawaa ita laga mambaida wande. <sup>45</sup> Tane ne e ulaipa dialedina baiwa ne mai sumanainaitipona, dia! <sup>46</sup> Mida e bedelawo ne kadi dewasano ewena wawuwanelapia rua? Mai mida da, dia! Ne ulaipa gagalowa dialedina, tane dima baiwa e mai ne sumanainaitapona? <sup>47</sup> **Me mida God mampea dima God wadia etede. Tane e mai God mampea, dia. Sa baiwa dima me wadia e mai eteipona.**”

**48** Mape mo Iesu wawusane waienase, “E epe waiana baiwa no dodomana waite waitanase, ‘E ipa Samaria apanawa mida no dabualeitana wainiana ita e bedeawo aleu kadiwa wande.’” **49** Iesu sipoamone wanase, “Ne bedenawo mai aleu kadiwa wainipona, dia. Ne dima dewamodina mampe ne Mamana ebowa wadaposisadina, tane e ne ituaisineilana. **50** Ne mai neba ebona sapaidalepia baiwa nolawantipona, dia. Tane mida ne ebona wadaposiwa menasadia wande, ita me ando ne nolana ewepie umanawa wapi-dewalepi. **51** **Ne ulaipa dialedina, mida ne aiana oniempe ruawalempa, me tauma ita ando mai bolepi, dia.**”

**52** Tane mo Iesu diane waienase, “Tauma no atendewanten e bedeawo ipa aleu kadiwa wande! Abraam ita peroweta uduudu bontoiena, tane e waianase, ‘Mida ne aiana oniempe ruawalempa me tauma ita ando mai bolepi, diaida.’ **53** E apama inainaa dainea epe waiana? E inseiana e ipa debamawaida, mai Abraam rua, ba? Me bolen, ita deawaa peroweta uduudu bontontuwan!”

**54** Mo Iesu ituaisisaio sipoa diamone wanase, “Naita ne neba wadaposinteipono, wadapos sa ipa ipasia. Tane me mida e umanawa wailana ‘No Godimba,’ me meba ne wadaposinede. **55** E mai me atensapona, dia, tane ne me ateinaida. Naita ne waponase, ‘Ne me mai atensapona,’ ne ipa lagawaa e ruala. Tane ne Mamamba ateinaida ita me aiawa do ruawantedine dewasadina. **56** E mala Abraam ne wiwisana walamawa baiwa nu-aeu do onioniawaleidi wandie. Ita ne wiwisana walamawa tauma ipawanalena me ewene nuaeu

nuawa nopesan.” <sup>57</sup> Iesu epe wano mo etane Iesu wanadabue waienase, “È mai ena 50 tauma wainipe epe waipona, dia. Abraam mapoido bolen, tane e waianase, ‘Ne Abraam ewana!’ E ambi epe waiana!” <sup>58</sup> Iesu mo wakoau gagalowa etene wane wanase, **“Ne ipa wanwankasalala, ne wainedino Abraam mulen!”**

<sup>59</sup> Me epe wana etaetawa abo me God wakadis-asapona. Sa baiwa mo seu otene me epapona, tane Iesu weregainta God duwa ene nosene alen.

## 9

### *Iesu apava emawa potawa do muwalena inasade*

<sup>1</sup> Iesu wawe alala do antoie into apava emawa potawa do muwalena wandio eweirena. <sup>2</sup> Sape wawe alala Iesu waitarasane waienase, “Debamamba, apava ema mida kadiwa saiwa wadene emawa potawa do muwalene wande? Me meba kadiwa saiwa ba gombawa kadiu saiwa waden?”

<sup>3</sup> Iesu mo waitarausipoasane wanase, “Kero sa ipa mai me meba kadiwa ba gombawa kadiu baiwa segalepona, dia. Tane God insaisawa rua me emawa potawa do muwalena wande. **Me kerowa sa mampee God ina mukawa sabamosapio apava atentopua baiwa.**” <sup>4</sup> Iesu epe wane aupe gagalo da diamone wanase, **“Walama sapa wadiawo mida ne waaubanena nolawa dewamonte wainenta, mai ete di wankoantata, ipawa tadina baiwaleidia dubalepio mai mida da nolalepia rua, dia.**

<sup>5</sup> <sup>◊</sup>Ne tawo ema osowe winene wainedinawo ne

---

<sup>◊</sup> **9:5:** Matiu 5.14; Ion 8.12

ipa tawo sapawa wainedina. Tane epe antepino tadina taupibodepi.”

<sup>6</sup> Iesu epe wane aupe dogo osowe sesei tone witapa mampe sesei sa einsisideno topa wanaleno apava sa emawa potalena emawa osowe itun. <sup>7</sup> Ita diene wanase, “Aitee, doa Siloam bedewe nana mitaa.” Doa Siloam ebowa ipawaida ipa waaubalala. Me Iesu diena rua alene doa sa bedewe namba miteno emawa lotone sala ewene aupe ene bolawe alene wandie. <sup>8</sup> Me sosowa tampe duntoie waimoia me inaleno ewane memesantone wakoantoe. Ita do sosowa isiwa me kainokaino iriri tounawe wandio eweia atemba ewane wakoantone waienase, “Apava iririlala inaleno eweitana, ba apava da?” <sup>9</sup> Mo wakoalala bedeuwo isiwa me ewane atensane waienase, “Me ipa sa inalene wande.” Tane mo isiwa waienase, “Dia, sa mai me mida no umanawa waitana, sa apava da eweitana.” Mo epe wakoasaio me etamone meba wasabamowa wane wanase, “Ne e sola emana potawa wainedino ewaneilana tauma inanten.”

<sup>10</sup> Mo me wakoasaie waitarasane waienase, “Somba, dianewo etato, e ambi dewaitene emaa eulen?”

<sup>11</sup> Me mo sipoamone wanase, “Apava ebowa waia Iesu sesei dogo osowe tone witapa mampe sesei sa einsisideno topa wanaleno emanawo itune dianene wanase, ‘Aitee, doa Siloam bedewe nana mitaa!’ Me dianena rua antene naina doa sa bedewe mitano emana euleno sala ewana.” <sup>12</sup> Mo me inalena benemawa diamono etane waitartone waienase, “Apava sa e inaena naepe?” Tane me sipoamone wanase, “Ne mai atenteapona me naepe.”

*Parisi apanawa ina bumpaida banusaia gagalowa*

<sup>13-14</sup> Apana emawa eulena ema epe diamono etane me inalena bumpawa banusapue atentopua baiwa banlene Parisi mampo wimone me inalena benemawantone waienase, “Ande Sabat walamawe Iesu sesei dogo osowe tone witapa mampe sesei sa einsisideno topa wanaleno somba emawa potawa osowe ituno inalen.” <sup>15</sup> Parisi benema ema etane apana inalena waitarasane waienase, “E ambi dewaitene emaa eulen?” Ita me mo diamone wanase, “Me topa wadene emana osowe itune waaubaneno antene doa bedewe naina mitano emana euleno sala ewana.” <sup>16</sup> Parisi apanawa me inalena umanawa etanadewantone muba empuempuntone mo isiwa Iesu amboituwa gagalowa wane waienase, “Apama sa mida inasana Sabat anaanawa mai onieipadewaleipona, andipundede. Me dewawa kadiwa no atentene wainitana, me mai God wapaaubepono nolaleipona, dia.” Tane mo isiwa Iesu adiwentoia waienase, **“Naita me mai God mampea wisepe nolalepono me mai ginasa pokawaau dewamopono ewapona, dia!”**

<sup>17</sup> Parisi apanawa muba wakoantone baiwa apama inalena osowesane waitarasane waienase, “Apama e emaa eusana no wakoasaitana. E me umanawa ateitena wawo etata.” Ita me mo sipoamone wanase, **“Ne dauna etane atentena me ipa God perowetawa wisene nolaleide.”**

<sup>18</sup> Parisi apanawa apama sa inalena gagalowa uduudu etanatue atentoiena, tane mai sumanaintoipona, dia. Ita mo atendewantopua baiwa me

gombawaida gagalou wanaaubeiena wimopue wapudewantopuo etapu.

<sup>19</sup> Tane me gombawa wimoieno Parisi apanawa waitaramone waienase, “Wanadewaitano etata, apana ema e otola wailana emawa potawa do muwalena, ba? Tane ambi tauma me emawa lotone sala ewede?” <sup>20</sup> Me gombawa mo sipoamone waienase, “Oa, me no otombaida, emawa potawa do muwalena e gagalowa wailana. <sup>21</sup> Me emawa euleno sala ewede. Tane mida me emawa eusana ba ambiambia inalena no mai atentepona, dia. Me apana debama, waitarasano dialepio etana.”

<sup>22-23</sup> Me gombawa Parisi apanawa sauntone baiwa diamone waienase, “No otomba apana debama, me meba waitarasano dialepi.” Mo Parisi apanawa sauntona, ipawa mo bauta insaisau itune waienase, “Apala mida Iesu sumanaiwantoie waiase, ‘Tesu ipa Keriso God sauawalena wisen,’ apala sa mai no gagalomba duwa bedewe odapuo do deantata, dia.”

<sup>24</sup> Apala inalena gombawa Parisi apanawa diamoieno otopu waitarasapue atentopua baiwa mo me osowe apasane badowaida diane waienase, “No menanedia e ulaipaida waie God nuawa eusaa, mai gagalo da weregasaa, dia! No ateten apala e inaena mai God mampea wisepe nolaleipona, dia, me ipa kadi dewalala.” <sup>25</sup> Mo epe waio me sipoamone wanase, “Me kadi dewalala ba apala euda, sa ne mai atenteapona. Tane dea os ne atentena, sa ipa debamawaida ne baina, ne emana potawa do muwantena euleno sala ewedina.”

<sup>26</sup> Mape mo waitara da diane waienase, “Me

e manawo ambi dewalen? Dima dewasano emaa euleno sala eweiana?” <sup>27</sup> Me leusane diamone wanase, “Ne inantena benemawa aita dilenatuwano etalana. Dima baiwa osoweosowe waitaraneilana? E mo isiwa ruau me warorowa wanaitana menaledio baiwa epe kainokaino waitaraneilana, ba?” <sup>28</sup> Me mo epe diamono etane nuau kadileno wadabuasane waienase, “E ipa soa sa warorowa wainiana! No Moses warorowa apanawa wainitana, mai da menaneipona, dia! <sup>29</sup> No Moses bumpawa atenidanten. God me mampe gagaloleno no banlanedie. Tane e soa sa umanawa waiana no bumpawa mai atentepona, me nainta wisene nolaleide.”

<sup>30</sup> Apana inalena mo sipoamone wanase, **“Me ginasa pokawaaida dewasane ne emana potawa do muwantena inaneno wainedina.** Tane e mampe me wakoawa wailana me nainta wisene nolaleide, sa ambi epe wakoaitilana? <sup>31</sup> No ateinimba apana kadi dewalala raupariu God mai eteipe sipoamoipona, dia! **Tane God apana dodomana kakaiwa me insaisawa dewasadia raupariwa etedie sipoasade.** <sup>32</sup> Mapo ita tauma mai mida da apana emawa potawa do muwalena inalepona, diaida, tauma os eweitana. <sup>33</sup> Naita apana ne inanena mai God mampea wisepe nolaleipono me ginasa pokawaaida ema mai dewasapona rua, dia.” <sup>34</sup> Tane me Iesu adiwelene gagaloleidio Parisi apanawa etane nuau kadileno onawaida wane waienase, “E kadi muwaitena emaa potawa os do wankasaiten, tane meneedia God waeuwawa no dianewo sumanaimba dodomanalepi, ba?” Ita mo me taneieno nosene

alen. <sup>35</sup> Tane dewa ema umanawa Iesu etene me banusane alene donsane diene wanase, “**E Apana Otopa sumanaiwaitiana, ba dia?**”

<sup>36</sup> Me Iesu sipoasane wanase, “Apana Otopa e umanawa waiana ne mai atenteapona me mida, e me ebowa waadewaitawo ne atenteape sumanaiwanteapa.” <sup>37</sup> Ita Iesu leusane diene wanase, “Apana ipa sa e tauma eweiana, meida nata gagaloitile eneilana.” <sup>38</sup> Apana sa inalena aia ema etene Iesu danawe itulene diene wanase, “**Tatamba, ne sumanaiantedina!**”

*Iesu kotu awa tawo ema osowe wisena gagalowa*

<sup>39</sup> Me Iesu sumanaiwalena wano aupe Iesu wanase, “Ne apana kotumopaa baiwa tawo ema osowe winen. Ita kotuna ema epe: **Mo mida emau potawa waimoie ewapona menamodia ne saumopo emau ewapudewantopu.** Tane mo mida muba insakadisantoie inseiase, ‘No emamba euda eweite wainitana,’ ne mo de-wamopo emau potawa wineia do wankasan-topu.” <sup>40</sup> Ita Parisi isiwa sape Iesu do eneia me gagalowa sa etane waitarasane waienase, “E mida emau potawa do waimoio umanau waiana? Dauwa e no ewane waiana, ba?” <sup>41</sup> Mape Iesu mo diaidamone wanase, “Naita e eba daula etape inseponase, ‘No emamba potawa wainitana.’ Epe insepono ne saulepono emala ewapona intawa wadapaaubepono emala eulepona, ita e kadila dia baiwa kotula epona. Tane e emala potawa di wainile eba insakadisaitile inseilanase, ‘No emamba euda eweite wainitana.’ E epe inseilana

mampe ewapona intawa bodeilana ita kadila winakasaleidio wainilana kotuwaitana.”

## 10

*Me mida gamo oniadewasamodie banladewasamodia gagalowa*

<sup>1-2</sup> Ema aupe Iesu apala me asisusaie laia diamone wanase, “Ne ulaipa dialedina, me mida sipsip wanwambu bolawa gonaala wine-dia moawainta ruawaleidie odedia me gamo onionialala apanawaida wande. Tane mo udu-udu mida nambeinta kawantoie odeia mai gamo oniadewasamompaa baiwa odeipona, dia, mo gamo poisamompe kadimompaa baiwa odee.

<sup>3</sup> Sipsip nauelamodie wandia apanawa sipsip apanawaida odaoda baiwalempo ewepie gonaa moawa wadepiaubepio odepia. Ita sipsipwa sa me anuwa waimoia mampo odompo aiawa dauwa etapue atensapu, mai dia. Me sipsipwa mam-polepie deadea ebouida wapie banladewasamopio nana awa gonaa adiwe nomopue antopu. <sup>4</sup> Ita mo nomopue me bautalepio sipsipwa aiawa atensaia baiwa warorosapu do antopue bola euda bedewe nana napu. <sup>5</sup> Tane apala nambea aiawa wampe banlamompo mo mai warorosapu, dia. Sipsip apala sa aiawa etane koasaiena baiwa sawo epue nambe antoputuwapi.” <sup>6</sup> Iesu gamo apanawaida gagalowa babawa mampe apala waeuwamodio etane ipawaida mai atentopona, dia.

<sup>7</sup> Sa baiwa Iesu diadewasamone wanase, “**Ne ulaipa dialedina, ne ipa sipsipna wanwambu bolawa gonaawa moawa wainedina.**” <sup>8</sup> Ne

muriwantene odana, tane mo uduudu mida bautantone odeiena mo ipa poiwaa ita baulakadisalala. Ita sipsip mo aiau etane koasane baiwa mai ruawantopona, dia. <sup>9</sup> Ne sipsipna wanwambu bolawa gonaawa moawa wainedina. **Apana mida ne bedenawoleidie odedia me inaida donsapie waimpa. Me inalepie waimpadewalempe ita do nana pokasampo os waimpa.** <sup>10</sup> Mo poiwaau sipsip kadimompaa awa mampo wimoie menamodia sipsip poisamompe ita epaboiamompa. **Tane ne mai mo ruau, ne winena mo inaida donsapue wadapue nuau nopesapue euda os waimompa.**

<sup>11</sup> Ne gamo apanawaida euda dodomana, **gamo oniadewasau apanawa wainedina.** Gamo apanawaida euda dodomana meba insaisawa mai wadeipona, dia, me sipsipwa nuawadawadamodie mo inamopio **wampudewantopua baiwa inawawa itupi epi.**

<sup>12</sup> Sau apanawa sipsip apanawaida sipsipwa bopawa oniamodie wandio elo kadiwa wisiedie sipsip kadimopia baiwaleidio apana sa sipsip emodie sawe weuwadie nambe aleide. Ita elo kadiwa sipsip mampoleidie adamodio sauwo deaantoi.

<sup>13</sup> Me mai sipsip umanau waipe oniadewasamoipona, dia. Elo kadiwa wisiedio ewedie me sipsip emodie sawe weuwadie nambe aleidia ipawa me mai sipsip apanawaida, me sau apanawa os manewa nolawaleidie wande.

<sup>14-15</sup> <sup>☆</sup>**Ne gamo apanawaida euda dodomana, gamo oniadewasau apanawa wainedina.**

---

<sup>☆</sup> **10:14-15:** Matiu 11.27; Luk 10.22

Ne Mamana atenidanedio wainedina ita ne me atenidasadina. **Epe rua deawaa ne sipsipna atenidamodino waimoi ita mo ne atenidanei. Ita ne inawana mo inamopino waimompadewantompa baiwa itupe epa.** <sup>16</sup> Tane ne sipsipna da nambe waimoia banlamopo sipsip wanwambu bolawa imaala winediawo odapue sipsipna bauta odeiena bedeuwontopu. Ita mo muriwa odaodalala sosou bautalala ruau ne aiana etompe atenidasampe ruawantompe waimompa. Ita sipsipna muriwa odaodalala sosou bauta odeiena do deantompe sipsip apanawaida dea os oniadewasamompe waimompa. <sup>17</sup> **Ne God insaisawa rua inawana itupe epe bonteapaa baiwa ne Mamana nuawadawadanede. Tane ne inawana itupe epo God ina leusapi nepia bowanteapa.** <sup>18</sup> Mai mida da ne dianepio inawana itupe epa, dia. Ita mai mida da mukawa wineipona inawana wadepiaubepi, diaida! **Ne neba menaidanedia God insaisawa ruawanteape inawana itupe epa. Ita inawana itupe epe leusape wadapaa mukawa ne mainawo winede. Ita ne inawana itupe epe leusape wadapa, Mamana dianena rua.**" <sup>19</sup> Iesu epe gagaloleidio Iuswa etane bauta dewantoiена rua empuempuntone, mo bedeuwo isiwa Iesu wadabuawa waiena, tane isiwa Iesu adiwentoienan. <sup>20</sup> Mo uara mida Iesu wadabualala wane waienase, "Me bedewe aleu kadiwa wandie insaisa wanedio oolene uwawa koakoalen. Dima baiwa asisusante wainenta, ete ana!" <sup>21</sup> Tane mo isiwa mida Iesu adiwentoia wane waienase, "Apama bedewe aleu kadiwa wandie insaisa wanedia mai epe gagaloleipona,

dia! E inseilana apana bedewe aleu kadiwa wandia apana emawa potawa inasapona rua, ba? Sa dia, e walakadisalana.”

*Iuswa eiau mai Iesu sumanaiwantoipona gagalowa*

<sup>22</sup> Obasa walamawa wiseno Iuswa Ierusalem bedewe God duwa odawa odantoie waimoie. <sup>23</sup> Ita Iesu oda sawo odene God duwa bedewe alene bola empuempulala wineia dea mo warereu ebowa Solomon wane bola sa ebowa ituienawo leidie. <sup>24</sup> Sape me leidio Iuswa eiau wimone Iesu enane tonusane waienase, “No walama dau-mawa e insakoaeite wainite. No epe enewo insakoantate wankasantataa meneede, ba? Naita e Keriso God sauawalena wiene wainiana bemedanewo atentata.”

<sup>25</sup> Ita Iesu mo sipoamone wanase, “Ne e dialedine os wainedine, ita do ginasa uara ne Mamana ebowe dewamodina mampe sabamoniedie ne mida. <sup>26</sup> Tane e mai ne sumanainaitapona, ipawa e mai ne sipsipna wanleipona, dia. <sup>27</sup> **Tane mo mida ne sipsipnaida waimoia ne aiana eteie atensaie ruawantoi. Ita ne mo atenidmono waroroneie os waimoi.** <sup>28</sup> Ne sipsipnaida inawinakasala wanamope oniadewasamopino mai kadiwa bedewe antopue kadikadintopua rua, diaida. **Mo ne witawo euda os waimompadewantompa, ita mai mida mukawa wineipona wisepie ne witawo otaaubamopi, diaida.** <sup>29</sup> Ne Mamana debamawaida wande, mai mida da ruau. **Mida me sonabamono witape waimoia mai mida da me witape otaaubamopie kadimopi, diaida.**

**30 Ne Mamana nata deaida, mukamba deawaa wainitana.”**

<sup>31</sup> Iesu epe badowa gagaloleidio Iuswa eiau etane nuau kadiidaleno seu otamone me epaepabolepona baiwantoie. <sup>32</sup> Tane Iesu mo diamone wanase, “Ne ginasa uara pokawaauida Mamana dianena rua me mukawa mampe dewamono ewalana. Ginasa dainea dewasanakadisana onawa epaneanabolepia baiwaitilana?”

<sup>33</sup> Mo sipoasane waienase, “No mai e ginasa da dewamoana kotuwa matangelawa epeeta, sa dia. E apanaida os wainie eba umanaa waie waianase, ‘**Ne Mamana nata ipa deawaaida wainitana.**’ Epe waiana, sa ipa e eba itupositie Godida ruawaite God wakadisasaiana.”

<sup>34</sup> Mape Iesu leusane diadewasamone wanase, “E anaanalala bedewe girumalena ema epe wade, ‘Ne e ebola itune wana God.’ <sup>35-36</sup> Dima God buka bedewe wana winakasalala, mai watad-abuasataa rua, diaida. Apana mida God aiawa mampolenko wadeiena me mo ebou itune wana God. Tane ne mai mo ruau, dia. Mamamba God ne sonabanene mebaawaida awoanene itunene tawo osowe waaubanena me insaisawa dewamopine wainepina. Sa baiwa ne umanana wane wanase, ‘**Ne God Otopa wainedina.**’ Ne epe wana mampe abo ne God wakadisaspuna wawuneilana. <sup>37</sup> Ne dima dewamodina ewamone ateitana ne mida nolantedine wainedina. Naita ne Mamamba insaisawa nolawa epe, tane nola ewaewawa da nambea nolantepino ewana e mai ne sumananaitana, eneana. <sup>38</sup> **Tane naita ne Mamana God nolawa dewamopino**

**ewaneane sumanaitana ne ipa God Otopa.**

Naita e ne umanana dima dialena insakoawaitane mai sumanaiwaitana ginasa ne dewamodino e eweilana mampe sumanaitane ateitana Mambamba ne bedenawo ita ne me bedewe wainedina.”<sup>39</sup> Iesu gagalo badowa sa wadio mo etane nuau kadiidaleno mo bauta dewantoienna rua Iesu wadapaitudepona baiwantoie, tane mo wadapona baiwa rubusailewantoio me emone alen.

<sup>40</sup> <sup>✳</sup>Ita me leulene Ioadan waiwa dawo Ion bauta nolawa uwaalene apapa babatutumodawo alene wandie. <sup>41</sup> Iesu sape wadio apapa uara me ewapua baiwa mampe wimone asisusai. Ita mo asisuntoie waimoie bedewe dima Ion bauta Iesu umanawa benemalena insene waienase, “No Ion mai ginasa pokawaau da dewamopono ewamopona. Tane me bauta Iesu umanawa benemaleidio eteitana segaleidituwadio eweitana.”<sup>42</sup> Ita bola sa apanawa uaraia Iesu bedewe sumanaintoiena.

## 11

*Lasares bowa gagalowa*

<sup>1</sup> <sup>✳</sup>Apapa ebowa Lasares Betaniwa wanwanlala kero wadeno wandie. Me weaweanapa Meri ita Mata do sape waimoie. <sup>2</sup> <sup>✳</sup>Ita me weanapa Meri, me ipa mida ando ia asiwa esapa bonabonaua Tatamba wawa osowe memepi-aubepie uwawa imba mampe wawa siniamopia iwa. <sup>3</sup> Mo nopus Lasares kero wadeno sau baiwa gagalo wanaaubeieno Iesu mampe alena

---

<sup>✳</sup> **10:40:** Ion 1.28    <sup>✳</sup> **11:1:** Luk 10.38,39    <sup>✳</sup> **11:2:** Ion 12.3

wane wanase, “Tatamba, e soa nuawadawadasiana kero wadaidasano ituleide.” <sup>4</sup> Iesu nuawadawadawa sowaida kero wadeno umanawa etene wanase, “Lasares kerowa ompa ipa mai bo, dia. **Tane kero sa segalena God mukawa sabamolepio apava ewapue wadaposisapue ionoidosapu. Ita ema bedewe mo God Otopa do wadaposisapue sapaidasapu.**” <sup>5</sup> Iesu Mata, me wamba Meri ita Lasares nuawadawadamode. <sup>6</sup> Tane Iesu Lasares kerowa umanawa etene mai tauwadea mampe awa insepona, dia. Me naepe wandiawo walama nata sape wankasalen.

<sup>7</sup> Ita walama nata sa diantono aupe Iesu a insaisawaleidie wawe alala diamone wanase, “Tauma leuntate ana Iudia bedewe.” <sup>8</sup> Iesu epe diamodio wawe alala me waitusane waienase, “Debamamba, imanaida Iudiawo Ius apanawa eiau e onaa enane seu mampe epapabolepona baiwantoie ita e dima baiwa sape leuite aitaa waiana?” <sup>9</sup> Tane Iesu me dima dewasapia baiwaleidia umanawa diamone wanase, **“Walamo omo sapawa bedewe nolawa wineede. Me mida walamo leidia mai dima wawa bagorepio omepi, dia, ipawa me walama sapawa ewedie leide.**” <sup>10</sup> Tane apava tadino dubawa bedewe leidia wawa dima bagorepio omepi.”

<sup>11</sup> Iesu aia ema wane aupe mo diamone wanase, “Somba Lasares me duwa bedewe ituawawalen. Ne me mampe anteape wadapamesapo enepiwisepi.” <sup>12-13</sup> Iesu Lasares ituawawalena wadia, sa ipa me boidalena umanawa wadie. Tane wawe alala gagalowa sa etane ipawaida mai atentopona, dia. Mo inseia abo Lasares di ituleidia umanawa me

waipona, sa baiwa mo Iesu diane waienase, “No me ituleidia umanawa etate nuamba eulen, me mamooolepie inalepia rua.” <sup>14</sup> Mo epe insakadisantone waio Iesu benemaidamone wanase, “Lasares boidalen, mai di ituleipona, dia. <sup>15</sup> Tane e baila ne nuana eulen, ipawa ne mai tauwadea me mampe wineape sausapona, epe segalena mampee e ando ne mukana ewane sumanainaitana. Tauma leuntate me mampe Iudiawo ana.” <sup>16</sup> Iesu a wadio Tomas, ebowa da waia Ragaraga, wawe alala sosowa isiwa diamone wanase, “Sa ide, Debamamba a wadia do leuntate Iudiawo ano me do awodea epaboiانepu.”

*Iesu Mata Meri nata ewamopia baiwa mampo aleide*

<sup>17</sup> Ita Iesu wawe alala do antone bola Betani mampentoio Lasares boleno ituieno walama nataitanata diantona umanawa me benemasaieno eten. <sup>18</sup> Bola Betani Ierusalem tampeido, intawa awa kampaida. <sup>19</sup> Sa baiwa Iuswa uara Betaniwa wimone Mata Meri nata nopus bolena osowe mo wasaumoie wabadomoie waimoie. <sup>20</sup> Mata Iesu iedio umanawa etene tauwadea nosene me donsapie auwasapia awa aleidie. Tane Meri duwa wankasalen.

<sup>21</sup> Mata Iesu into donsane diene wanase, “Tatamba, Lasares kerolene wandia walamawe e wiepono ne nona mai bolepona, dia. <sup>22</sup> Tane ne atentene sumanaintedina tauma wiena dima uduudu God mampe iririwaitaa eneepituwapi, mai dia.” <sup>23</sup> Me epe wadio Iesu diene wanase, “E noa bolena bo bedewe inalepia enepiwisepi.” <sup>24</sup> Iesu Mata epe diedio etene leusane wanase, “Ne

ateina ne nona walama ompa osowe bolala udu-udu enawisau walamawe me bo bedewe inalepie enepiwisepi.”

<sup>25</sup> Mape Iesu Mata diadewasasane wanase, “**Ne ipa ina bumpa wainedina. Apana bo bedewe inantopue enapuwimopua mukawa ne mainawo winede.** Me mida ne bedenawo sumanaileidia, me ideita bo bedewe enepiwisepie inawinakasala wadepi, mai dia. <sup>26</sup> Ita me mida inaida donsane ne sumanainaleidia tauma ita ando wankasalepi, mai bolepi, **dia. E ema sumanaiwaitiana, ba dia?**”

<sup>27</sup> Mata Iesu sipoasane wanase, “Oa Tatamba, ne sumanaintedina e ipa Keriso, God Otopaida, mida God sauawaleno no inta ewaewantitana wisepona tawo emawo tauma wien.” <sup>28</sup> Me epe wane aupe ene leulene wamba Meri duwa wandio awa alene enenke apana kako awa wimone waimoia emonaiane awoantone waine me diene wanase, “Debamamba wisene e umanaa wade.” <sup>29</sup> Iesu Meri waitarawa wana umanawa etene tauwadea os enenwisene Iesu into donsapia baiwa nosene alen. <sup>30</sup> Tane Iesu mai Bettaniwa odapona, dia, me Mata bauta donsanawo enedio Meri awa aleidie donsan. <sup>31</sup> Ita Iuswa Meri onieie du bedewe waimoia Meri tauwadea os enenwisene nosene aleidio ewane warorosane antoie, inseia me nopa ituienawo bo nagawa moape aleidia ke wampaa baiwa aleide.

<sup>32</sup> Meri alene Iesu me anuwa wandiawo wisene me ewene wawa bumpe itulene ke mampe diene wanase, “Tatamba, Lasares kerolene wandia walamawe e wiepono ne nona mai bolepona, dia.” <sup>33</sup> Tane Iesu Meri ita me sosowa isiwa warorosane antoiena ke waie nuapareidantoio ewa-

mone nuawa kadiidaleno waitaramone wanase,  
 34 “E Lasares naepe itulana?” Mo me sipoasane waienase, “Tatamba, winewo antate euwaeto ewaa.” 35 Ita Iesu do ke wan. 36 Tane Iuswa Iesu ke wadio ewane waienase, “Ewane, Iesu Lasares nuawadawadawaida bolena baiwa kewa wadie nuapareleide.” 37 Tane mo bedeuwo isiwa Iesu momoduwa wane waienase, “Me apana emawa potawa inasana atnten. Me sowaida Lasares inasapona, tane eno bolen. Dima baiwa me epe dewalen?”

*Iesu Lasares bo bedewe inasadio enediwisidede*

38-39 Iesu wisene Lasares bo gubawa imala winediawo itune seu debama mampe enanabodeiena euwasaieno ewen. Ita me bo gubawa sa ewedie me bauta dewalena rua nuawa pokakadileno diamone wanase, “Seu bo nagawa itunbodae winedia koirewasano nambe alepi!” Tane apana bolena weanapa Mata Iesu diene wanase, “Tatamba, dima e no dianeiana mai dewasataa rua, dia. Bo imanamalene walama nataitanata winene etepa kadilena boawa wisepi.” 40 Mata Iesu epe diedio me badowa diene wanase, **“Ne dieena naita e sumanaitapono e God sapawaida debamaia sabamosapono ewapona.** Ne dima dieena etasaitene baiwa e ne enabodaneiana, ba?”

41 Me Mata epe diaidasano aupe me apana dima diamona ruawantone seu bo itunbodae winedia koirewasaieno nambe alen. Ita Iesu raupari baiwalene pisiwane emawa iono odeno wanase, “Mako, ne Lasares raupariwantedino etee sipoasaa baiwaitiana baiwa auwaedina.  
**42 Ne atnten dima uduudu raupari mampe**

**dieedina e sipoasaiana, mai rauparina da eteipe eipona, diaida.** Tane ne sabamo epe wane auwaena apapa mape eneia e ne waaubaneana sumanaiwantopua baiwa.”

<sup>43</sup> Iesu Mamamba mampe epe wane aupe aiawa mukama wane wanase, “**Lasares, noeaaubea!**” <sup>44</sup> **Ita apapa bolena Iesu wana rua bo nagawa bedewe nosen.** Me etepa gara euda mampe lomantone ituiena do mo mampo nosene enedie. Ita Iesu Lasares apanawa diamone wanase, “Me etepa lomaitena garawa ampe otaaubaitano alepi!”

*Iuswa onioniau apanawa Iesu bosapua insaisawa wadei*

(Matiu 26.1-5; Mak 14.1-2; Luk 22.1-2)

<sup>45</sup> Ius apanawa uara Meri wasausaie wabadowa awa mampe wimone waimoia Iesu ginasa pokawaaida Lasares mampe dewasana ewane sumanaibu me bedewe ituiena. <sup>46</sup> Tane mo bedeuwo isiwa ginasa sa ewane antone Iesu dima dewasana umanawa kutun mampe Parisi apanawa benemamoienna. <sup>47</sup> Ita mo me benemawa sa etane pirisi ionoidoa ita Parisi apanawa Iuswa eiau uduudu boru baiwa diamoieno auweiena. Tane mo auwenatue muba gagalontone inta banusaie waiase, “Apapa sa no bodeitalewantitano ginasa uara pokawaau dewamodie wande! No mukamba diama epe dewaleide. <sup>48</sup> Naita no ewate eto epe nolakasalempa no apanamba uduudu me sumanaiwantopu. Ita Rom gabemaniwa no onianeia epe ewapue insepuase, Iesu warerelepio no Iuswa uduudu onamba enapuo God duwa kakaiwa ita wanwan-

imba kadisapue, tane do no apava eiau nolantitana mukamba wadapuaubepuo oauarantato.”

**49** Mo epe gagalontoio bedeuwo apava ebowa Kaiapas ena sawo pirisi ionoidoalene wandia wane wanase, “E insakoa apanawa wainilana, mai dima ateitipe osowe waipona, dia! **50** Insenadewaitana, eulena no apava dea tottaubeto no apanamba gudubu wadepie bolepio ita no inantate wainenta.”

**51-53** Kaiapas mai meba insaisawe gagalo ema wapona, dia. Me ena sa bedewe pirisi ionoidoalene wandia baiwa God insaisawa waneno apava dea Iuswa baibu bolepie wan. Ita me epe wadia walamawe mo insaisau deasaia Iesu bolepie waie waimoie. Tane God insaisawa sa Kaiapas wanena Iesu apava baibu bolepie, mai Iuswa os baibu bolepi, dia. **God insaisawa ituno wine-dia asiisi me obampaida sonabalala Iuswa bedeuwo waimoia ita do sonabalala bola daitadawo waimoia baibu bolepi.** Ita Iesu God sonabamodia uduudu baibu bolepie inamopio sumanaibu me bedewe itumpe deaidantompe waimompa. **54** Iuswa eiau insaisau deasaia Iesu bolepi, sa baiwa mo muba epe gagalontoia walamaue Iesu mo bedeuwointa leidia ene awoa wawe alala os do bola Eparaim sala makowa tampe antone waimoie.

**55** Tane Iuswa Pasowa odawantopua walamaue kampaleidio apava uaraia bolauwo waimoia oda awa Ierusalemwa wimonatuwaiena. Ita mo anaanau wadia mo mai kadi do Pasowa odawa odantopu, dia. Sa baiwa mo bauta kadiu mitawia baiwa duadintopue

euntopue muriwa odantopu. <sup>56</sup> Ita God duwa enedia moape etemitamita bolawa winediawo apana uaraia duadintoie euntoie Iesu wabanuwa waie banusaie muba eda waitarantoie waiase, “E ambi inseilana, Iesu oda bedewe wisepio ewata, ba dia?” <sup>57</sup> Tane pirisi debamau ita Parisi apanawa bauta Iesu wadapuitudepia umanawa badowaida waieno apana oda awa wimoia eteiena. Mo benemantone waienase, “Mida Iesu naepe wandi leidia atenleapia tauwadea mainimbo wimpie benemanepio ane wadataitudoepi.”

## 12

*Meri ia asiwa esapa bonabonaua Iesu wawa osowe memediaubede*

*(Matiu 26.6-13; Mak 14.3-9)*

<sup>1</sup> Iesu bola Eparaimwa wandie ene osowe Lasares imanaida bo bedewe enenwisene wanda bolawe Betaniwa alen. Ita sape me wisene wandio walama 6 nambanepe winedia Iuswa Pasowa odawa odantopu. <sup>2</sup> Iesu sosowa isiwa sape wanwanlala me baiwa rawi nanawa debamawa dewasane wadane mamposaiena. Rawi sawo Mata nana epeleidio me nopa Lasares Iesu ita nisolala isiwa do nana baiwa waimoie. <sup>3</sup> <sup>◊</sup>Mo nana bolawe waimoio Meri ia asiwa esapa bonabonaua dugiwa malesawa debamaia wadene Iesu wawa osowe memen. Ita uwawa imba mampe Iesu wawa siniamodie makomodie. Me epe dewaleno du sa bedewa bonawa uduudulen. <sup>4</sup> Tane Iesu wawe alala dea, Iudas Iskariot,

---

<sup>◊</sup> **12:3:** Luk 7.37,38

mida ando Iesu dabuasapie nanalepia Meri epe dewaleidio ewene wandabuasane wanase,<sup>5</sup> “Ia asiwa esapa me memenaubena malesawa debamaia, ena dea bedewe nolawa malesawa rua. Me ia asiwa esapa sa eudida no nenapono gimaran-tape mane wadape nuaparelala wanamopona.”<sup>6</sup> Judas mai apuna nuaparelala saubuida insepe wapona, dia, tane me meba baiwalene wadie. Me wawe alala maneu oniedi wandia, ita apuna mane mampe mo saumoia me kainokaino mane sa moawa poileidie.

<sup>7</sup> Iudas Meri wandabuasano Iesu etene diene wanase, “E Meri mai waadabuasae nuawa kadisaa, ea! Me esa bonabonaua ne etena bon-topuo eunepia baiwa me mampe winompa.<sup>8</sup> E apuna nuaparelala walama uduudu do wainilana saumonune wanlempaa rua. Tane ne mai walamana da wineipona sauneana, dia.”

<sup>9</sup> Iesu sosowa do Betaniwa nana naie waimoio Iuswa uaraia me sape wandia umanawa etane du wandiawo mampe wimoiena. Mo mai Iesu os ewapua baiwa wimopona, dia, tane do mo Lasares mida Iesu bo bedewe inasano enen-wisena ewapua awa wimoiena.<sup>10-11</sup> Iuswa bedeuwo apuna uara Lasares inalena baiwa Iuswa waeuwau bedewe waimoia enaiane sumanaibu Iesu bedewe ituiena. Tane Pirisi debamau epe ewane mo bauta Iesu osowe dewantona rua insaisau deasaia Lasares do bosapu.

*Iesu Ierusalemwa odedio apuna nuaeū do  
mamposai  
(Matiu 21.1-11; Mak 11.1-11; Luk 19.28-40)*

**12** Imonemba Iesu Ierusalemwa aleidie. Ita apana uaraia oda awa sape wimone waimoia Iesu Ierusalemwa odepia baiwaleidio umanawa etane nuaeuntoie. **13** Ita me auwadewasasapua baiwa mo notonkela asiwa tomone awanamone me donsapua awa antoiena. Mo inta ewae-wawantoie antoie Iesu odedio eweie nuae do me wadaposisaie mukantoie waie waiase,

**“Osana, God wadaposisaitana! God sauwa euda Israelwa wareremba Tatamba God ebowe iedia osowe itupi!”**

**14** Iesu donki sanaa osowe waine Ierusalemwa odedio. Ema mampe dima buka bedewe girumalena ulaipalen. Buka bedewe ema epe girumalena wadi wadiase,

**15** <sup>◊</sup>“Ierusalem apanawa mai saitane inguguraitana! Ewane, e warerela donki sanaa osowe waine wanwan euwa obasa wadene iede.”

**16** Iesu donki asiasi Ierusalemwa odedio apuna uaraia me wadaposisaio wawe alala dewa ema ewane ipawaida mai atentopona, dia, muriwa os atentoiena. Iesu uboo odene alene Mamba tampe sapawaida do wandia walama dewa sa ewamoiena insaisawa uwauwo odendewaleno tauma atentoiena. Ita do walama sawo mo atentoiena dewa sa uduudu segantono eweienna, sa ipa dima bauta buka bedewe girumalena ulaipalen. **17** Tane apuna uara mida Iesu Lasares bo nagawa bedewe apasano inalene enenwiseno eweienna bola uduudu bedewainta ginasa sa benemawantoie antoie, mai epona, dia. **18** Ita apuna uara Iesu ginasa sa pokawaaida dewasana

---

<sup>◊</sup> **12:15:** Sakaria 9.9

umanawa etane Iesu Ierusalemwa odedio bai-wantone me ewapua awa antoiena. <sup>19</sup> Tane Iesu Ierusalem bedewe odedio mo uaraia me wadaposisane wadane mamposaio Parisi apanawa ewamone nuau kadileno muba wane waienase, “Apana sa no bodeitalewantitana, tauma ambi dewasate wadataititudepi? Bola uduudu apanawa me wawentoio eweitana.”

*Iesu warorowa awa gagalowaleide*

<sup>20</sup> Apana uaraia Pasowa odawa baiwa wimone waimoia bedeuwo Girik apanawa isiwa taparoro awa wimone do waimoie. <sup>21</sup> Ita Girik apanawa sa iririu wadane Pilip mampe antone diane waienase, “Somba, no Iesu ewate do gagalon-tataa menaidanede. Banlanewo ane ewata!” <sup>22</sup> Pilip mo iririu etene sowa Endru diene nata Iesu diapua baiwa antone Girikiwa me ewapua menamodia umanawa dieieno eten. <sup>23</sup> Ita Iesu epe etene diamone wanase, **“God insaisawa rua Apana Otopa bolepie bo bedewe enepiwisepie uboo odepie alepie Mamba tampe sapaidalepie wampia walamawa tauma wisenauben.** <sup>24</sup> Ne ulaipa dialedina, wit naumba dea nosepie dogo bedewe alepi, ewaewawa boleapia rua, tane winompe tepolepie wit naumba uaraia teamopi. Tane naita mai epe segalepia naumba sa dea mai naupie uaralepi, dia. <sup>25</sup> <sup>◊</sup>Apana mida me inawawa nuawadawadasadie wadediitude-dia, me inawawa rebasapie mai inaida donsapipi, diaida. **Tane mida me inawawa tawo emaosowe dabuasadie itudi edia, me inaida donsapie inawinakasalawo odepip.** <sup>26</sup> Apana mida

---

<sup>◊</sup> **12:25:** Matiu 10.39; 16.25; Mak 8.35; Luk 9.24; 17.33

ne simbiana menasampa me ne waroronepie ne dewantedina rua dewalepi. **Ita ne naepe antepina me do waroroneampe inta sape alempa. Mida ne epe simbianepia ne Mamana me ebowa debamasapi.**”

*Iesu boleapia benemawaleide*

<sup>27</sup> Iesu aia ema wane aupe me boleopia maidaleidia insaisawalene nuawa pokakadileno wane wanase, “Ne nuana surakauidleide, ambi wape Mamana diapa? Ne Mamana diape wapaase, ‘Mako, bonteapaa walamawa wisediaubede, saune inaneawo mai bonteapa!’ Tane ne mai epe wape diapaa rua, ipawa ne God insaisawa rua bonteapaa awa tawo ema osowe winen. <sup>28</sup> Ne mai dima da wapaa rua, dia!” Me epe insene rauparilene wanase, **“Mamana, ne menaidanedia e insaisaaida dewasape bonteapo mampe apava e eboa sapaidasapuo ionoidoitaa.”** Me Mamba mampe epe wadio aia uboe segalene wane wanase, **“E nolaa dewamoiana mampe e ne ebona sapaidasaano ionoidontedine wainedina. Tane tauma e boa mampee apava osowe ne ebona sapasapuo ionoidonteapa.”** <sup>29</sup> Apava uaraia me do eneia aia ema etane etakoasane bedeuwo isiwa waienase, “Sa uma aiawa wano etatana.” Ita isiwa waienase, “Sa God enseliwa Iesu mampe gagaloleidio etatana.”

<sup>30</sup> Mo epe waio Iesu diamone wanase, “Aia ema mai ne baina segalepono etapona, dia, tane e sumanaiidaitana baiwa aia sa segaleno etatana. <sup>31</sup> Taumaida ne bonteape ita ando

sapaida bedewe anteapaa mampe God tawo apanawa kotumopia walamawa wisenauben. Ita God mapo walama ituno winedia wisenauben me Seitan tawo ema onedia mukawa wadepiaubepio oauaralepie dialepi. <sup>32</sup> **Tane mo ne wadaposineapue iononeampo bonteape bo bedewe enapawineape uboo anteapaa mampee tawo apanawa uduudu nuau teinepo mainawon-topu.”**

<sup>33</sup> Iesu epe wana me bo inainamba ambi bolepidia umanawa waeuwamode. <sup>34</sup> <sup>✡</sup>Tane me ambi bolepidia waeuwamodio apala uaraia me do sape eneia etane waienase, “No anaanamba estate ateten, Keriso wisepia me ipa wan-wankasalalaida, mai bolepidia eidaneipi, dia. Tane ambi e waie waianase, ‘Apala Otopa wadapuposidepio ionolepie bolepi?’ Mida Apala Otopa e umanawa waiana?”

<sup>35</sup> Mo epe wakoasaio Iesu diamone wanase, “Sapa e bedelawo winedie sapaleidio wainilana, sapa sa walama kerauda os dialepidio sapa ewasi-aitana. Apala mida dubawa bedewe aleidia mai inta eweipe atenleipe alepona, di akoaleide. **E ala leununa bedewe walama sapawe leununa**, tadina taupibolepidio inta koasane nambe aitana sawa. <sup>36</sup> **Sapa sa e bedelawo winedie sapaleidio wainilana bedewe insaisala sapa sa bedewe itunune os wanlempe sapa obampaida wanaitana.**” Iesu gagalowa wano dialeno apala uaraia emone alene meba os nambe wandio ibuwa mai ewapona, dia.

---

<sup>✡</sup> **12:34:** Sam 110.4; Aisaia 9.7; Daniel 7.14

*Iesu ginasa uaraia dewamodio tane mai Iuswa  
uara sumanaintopona*

<sup>37</sup> Iesu ginasa pokawaau uaraia mo bedeuwointa dewamodie leidio ewane tane mai me mampe sumanaintopona, dia. <sup>38</sup> <sup>✧</sup>Epe segalena dima peroweta Aisaia mapo girumalena ulaipalepia baiwa. Me buka bedewe wadi wadiase,

“Tatamba, mida no gagalomba amonantitana sumanaiwantoie waimoi? E apana mampo mukaa sabamosaiano eweia bedeuwo mida e sumanaiantoi?”

<sup>39</sup> God Iuswa osouwo kotu matangelawa itune emau bodene nuau badosana baiwa mo mai sumanaintopua rua. Sa ipa dima peroweta Aisaia bukawa bedewe naepe wana rua ipawanalen. Me epe wane wanase,

<sup>40</sup> “God mo emau bodeno emau potawa waimoi. Do nuau badosane gudusamona nuau insasia waimoia kadi bedewe insai sau mai leusapue ne mainawontopuo inamopa, dia.”

<sup>41</sup> Peroweta Aisaia mapoido aia ema wana, ipawa God Iesu sapawaiida sabamosano me ewene benemawalen. <sup>42</sup> Tane mai Iuswa uduudu Iesu bedewe sumanaisiantopona, dia. Mo bedeuwo uara, ita do mo eiau bedeuwo uara insaisau Iesu bedewe itune sumanaiwanton. Tane Parisi apanawa mo wasanamone waienase, “Apana mida Iesu sumanaiwalempe me gagalowa sabamo wampa, me mai no gagalomba duwa bedewe odepio no do awodeantata.” Sa baiwa mo Parisi apanawa sauntone mai sabamo

---

<sup>✧</sup> **12:38:** Aisaia 53.1

Iesu gagalowa waipe, dia. <sup>43</sup> Mo epe dewantoie, ipawa mo apanaida asou wampe ituposimompaa menaidamodio waimoie. Mo menamodia God mo asou waipona, tane apanaida asou wampa, sa ipa debamawaida mo mampo.

<sup>44</sup> Ita Iesu aiawa mukama wane wanase, **“Apana mida ne bedenawo sumanaileidia me mai ne os sumanainaleipona, dia, tane me mida ne waaubanena do sumanaiwaleidie wande.”** <sup>45</sup> Ita apana mida ne ewanedia mida ne waaubanena ewede. <sup>46</sup> **Ne tawo ema osowe winene tawo apanawa sapau wainedina. Ita ne tawo sapawa winena apana uduudu mida sumanaibu ne bedenawo itumpa mai dubawa bedewe wankasantompa.**

<sup>47</sup> Me mida ne aiana etedie tane mai ruawaleipe dewasaipona, ne mai me kotuwa apanawa enape kotusapa, ipawa **ne mai tawo kotonapaa awa wineapona, dia. Tane ne tawo inasapaa awa winen.** <sup>48</sup> Ne mai me mida ne dabuanedie ita do ne aiana mai wadeipe mampesaipe ruawaleipona kotusapa, tane kotu winedia kotlepi, mai dia. Kotu sa ipa ne aiana amonantedino me dabuasana walama ompa osowe enepie me kotonapio matangelawa wadepi. <sup>49</sup> Ne aiana amonanteno me etene dabualena kotusapi, ipawa ne mai neba insaisanawo gagalonteipe, dia, tane Mamamba ne waaubanena dima wapa dianentuwana rua gagalontedine leidine. <sup>50</sup> **Ita ne atendewaidanten me aiawa ne dianeno gagalontena apana banlamopio inawinakasalawo wimopu.** Dima ne wadina, sa ipa Mamamba dianena rua wadine dialedina.”

# 13

*Iesu wawe alala nuawadawadaidamodie  
atouwoleidie wau mitamode*

<sup>1-2</sup> Imonemba Iuswa uduudu Pasowa odawa odantopu, ita rawi sawo Iesu wawe alala do du dea bedewe auwene nana naie waimoie. Ita Iesu nana sa bedewe wandie God me walama ituna tawo ema epie Mamba mampe alepia atenlene insaisawa wadedie wandie. Mo mida me mebaawaida wanantoiena walama uduudu nuawadawadamodie os wandie. Tane me mebaawaida apanawa sa emopia baiwaleidie. Sa baiwa menaidasana bauta me ambi nuawadawadamodia eueuwa mo mampo dewaspio atendewantopuo muriwa emopie alepi. Mo nana sa epelala naie waimoio Seitan aitamana Iesu wawe alala dea Saimon otopa Iudas Iskariot bedewelene insaisa wanedia Iesu dabuasapie nanalepia baiwa.

<sup>3</sup> **Iesu wandia bedewe atenlen Mamba dewa uduudu me atowemontuwana oniamompaa mukawa wanen.** Ita do atenlen me God mampee tawo osowe iene wandia tane leulepie God mampe alepi. <sup>4</sup> Tane me nana sa bedewe enenwisene garawa onapea wadenaubene itune ita tawero wadene nowe taune wawe alala atouwolene simbiau apanawa wanalen. <sup>5</sup> Ita me esa aboma bedewe memene me wawe alala wau mitamodie gara nowe tauna mampe wau siniamodie makomodie. <sup>6</sup> Me mo wau mitamone aleidie Saimon Pita wandiawo wisene wawa mitamopia baiwaleidio me Iesu wanitue wanase, “Tatamba, ipa ambi e ne wana mitamoia baiwaitiana?”

<sup>7</sup> Tane Iesu me sipoasane wanase, “Ne dima tauma e manawo dewasadina e mai ateitapona, ando os ateitaa.” <sup>8</sup> Iesu epe wadio Pita dabualene wanase, “E mai ne wana mitamoa menaneipona, dia.” Ita Iesu leusane diene wanase, **“Ne e waa mitamopaa baiwantedina, tane naita e dabuaite ea e mai ne mainawoa, diaida.”** <sup>9</sup> Pita gagalo sa etene Iesu badowa iririsane wanase, “E epe waiana baiwa mai ne wana os mitamoa, dia, ne witana ita naina do mitamowo euntopua menanede!”

<sup>10</sup> Tane Iesu me wadewasasane wanase, **“Apana mida duadilene wandia me mai osowe duadilepi, dia. Me etepa uduudu euntono wande, ita me wawa os mitamompe waimpa.** E mape wainilana duaditene euitene wainilana. Tane e bedelawo dea mai duadilepe eulepona, dia.” <sup>11</sup> Iesu atenlen wawe alala bedeuwo mida me dabuasapie nanalepi, sa baiwa me wane wanase, “E uduudu duaditene euitene wainilana, tane bedelawo dea mai duadilepe eulepona, dia.”

<sup>12</sup> <sup>✡</sup>Ita Iesu mo wau mitamone diasane aupe tawero nowe tauno winedia wadenaubene aupe garawaida wadene taune aupawe alene waine mo waitaramone wanase, “Dima ne e baila de-wasana ipawaida ateitene wainilana, ba dia? <sup>13</sup> E ne ebona Tatamba ita Debamamba waile dianeilana, sa ipa sa e wailana, mai waipakadi-saipona, dia. <sup>14</sup> **Ne e Tata la ita Debamala wainedine e atolawontene simbialene wala mitamono eunton.** Ita ne e manlawo de-wasana rua e eba eda sauitonune wala mita-

---

<sup>✡</sup> **13:12:** Luk 22.27

**monune wanlempa.** <sup>15-16</sup> <sup>◊</sup>Ne ulaipa dialedina, nola dewalala uduudu mo onioniau apanawa atowe waimoi, mo mai onioniau apanawa amboiamoipe ionontoipe waimoipona, dia. Ita gagalo wadeie antoia apanawa uduudu mo waaubamoia apanawa atowe waimoie nolantoi. **Ita ne e atolawontene wala mitamone eu-mona, sa ipa ne simbia eueuwawa dewasane euwalena ruawaitonune wanlempaa baiwa.** <sup>17</sup> Dima ne waeuwaleno ateitena mai ene di wankoaitana rua, dia. Tane simbia waeuwa sa waeuwalena dewasanuna e ipa sau euda wadana apanawa.”

*Iesu wawe alala Iudas me dabuasapia benemawamode*

<sup>18</sup> Ita Iesu wawe alala diamone wanase, “**Ne e atenlene sonabalene wanawo alala tealeno wainilana.** Dima ne wapaa baiwantedina ne mai e uduudu umanala wapa, dia. Ne diaimaaledina e bedelawo sola dea ne dabuanepie onana enepi. Sa ipa dima buka bedewe girumaleno winedia ulaipalepia baiwa. Buka wadi wadiase, ‘Me mida ne sonaida walama uduudu do leite buredna nadia, me ipa sa ne onana apanawa.’ <sup>19</sup> Me mida ne dabuanepie onana enepia umanawa diaimaaledine nuala itudina dewa ema segalempo e ewane mai ne insakoana wadana, dia. Tane walama sawo insene sumanaitana ne ipa sa mida Mamamba wanaubena. <sup>20</sup> <sup>◊</sup>**Ne ulaipa dialedina, apana uduudu mo mida ne waaubamodino nomoie**

---

<sup>◊</sup> **13:15-16:** Matiu 10.24; Luk 6.40; Ion 15.20    <sup>◊</sup> **13:20:** Matiu 10.40; Mak 9.37; Luk 9.48; 10.16

**antioia apanawa wadamoie mampomoia mo neida wadaneie mamposai. Ita mo mida neida wadaneie mamposaia mida ne waaubanena Wadeie mamposai.”**

*Iesu mida me nanalepia umanawa wade  
(Matiu 26.20-25; Mak 14.17-21; Luk 22.21-23)*

<sup>21</sup> Iesu epe wano dialeno aupe mida dabuasapia insene nuawa polaida wano mo benemaidamone wanase, “Ne ulaipa dialedina, e bedelawo sola dea ne wadanepie nanalepia baiwaleide.”

<sup>22</sup> Wawe alala epe etane nuau pola wano muba emaewawantone insakoantoie waienase, “Mida no bedembo epe dewalepia umanawa Tatamba wade?” <sup>23</sup> Tane nana sa bedewe wawe alala dea mida Iesu nuawadawadaidasadia me tampe wandie. <sup>24</sup> Ita Saimon Pita sowa sa Iesu tampe wandia emaatesane diene wanase, “Iesu waitarasawo dieepio dianewo etata me mida umanawa wade.”

<sup>25</sup> Pita me sowa sa diena rua rialene Iesu tampeidolene waitarasane wanase, “Tatamba, mida epe dewalepia umanawa waiana?”

<sup>26</sup> Ita Iesu me diadewasasane wanase, “Ne bured kepawa ema wadedina urai bedewe itupe mida wanepino ewaa, me ipa sa!” Ita me wana rua bured kepawa urai bedewe itune Saimon otopa Iudas Iskariot wanen. <sup>27</sup> Tane Iudas Iesu witape bured sa wadeno Seitan me bedewelen. Ita Iesu me diene wanase, “Dima e baiwaitiana tauwadea dewasa!” <sup>28</sup> Mo uduudu mida nana sa bedewe auweia mai atentopona dima baiwa Iesu epe wadie Iudas diede. <sup>29</sup> Mo bedeuwo isiwa Iudas mo maneu onedia insakadisasane

inseienase, “Iesu me diedia alepie Pasowa odawa baiwa nanawa da menanedia gimaramopi, ba alepie nuaparelala mane wanamopi.”

<sup>30</sup> Tane Iudas Iesu witape bured wadene tauwadea mo emone tadino duba bedewe nosene alene.

*Iesu anaana sanaa wawe alala waeuwamode*

<sup>31</sup> Judas mo emone nosene aleno aupe Iesu wawe alala diamone wanase, “**Taumaida Apana Otopa sapawaida me bowa ita enawisawa bedewe Sabamosapio me ionoidolepi. Ita dewa ema bedewee God sapawaida do sabamolepio apana me wadaposisapu.** <sup>32</sup> Tane do Apana Otopa bedewe God sapaidalepio apana me wadaposisapu, edawa God bedewe Apana Otopa sapaidalepie ionoidolepi.

<sup>33</sup> <sup>☆</sup>Obaina, ne e do walama kampaida os wante aupe elepe anteapa. Ita e ne banuneana. Ne Iuswa eiau diamona rua dialedina, ne naepe antepinawo e mai ne wanawo winlena rua, dia. <sup>34</sup> <sup>☆</sup>Tane ne anaana sanaa dialedina ema epe: E sosola do eda nuawadawadaitonune wanlempa. **Ne e nuawadawadaledine do wainite leitana rua eda nuawadawadaitonune wanlempa!** <sup>35</sup> E eda nuawadawadaitonuna mampe apana uduudu ewalepue atentopu e ne wanawo alala wainilana.”

*Pita ando Iesu lagawa wapia umanawa Iesu wade*  
*(Matiu 26.31-35; Mak 14.27-31; Luk 22.31-34)*

---

<sup>☆</sup> **13:33:** Ion 7.34    <sup>☆</sup> **13:34:** Ion 15.12,17; 1 Ion 3.23; 2 Ion 1.5

**36** Mape Saimon Pita Iesu waitarasane wanase, “Tatamba, e no ene naepe aitaa?” Ita Iesu me sipoasane wanase, **“Ne naepe antedinawo e tauma mai ne do antataa rua, dia, tane ando ne warorone wanawo wina.”** **37** Pita epe etene Iesu diene wanase, “Tatamba, dima baiwa tauma ne mai e do antataa rua? Ne inawana e baia itupe epaa rua, mai dia!” **38** Mape Iesu leusane Pita diene wanase, “E ide ruua inawaa itue ee ne baina boitaa, ba? Ne ulaipa dieedina, muriwa kanka aiawa wapi, e bauta walama natadea ne wakoana wae lagaitaa.”

## 14

*Iesu wawe alala emopie alepia wasaubu gagalowa diamode*

**1** Ema aupe Iesu wawe alala diamone wanase, **“Ne e elepe a baiwantedina insenune mai nuala omepi. E sumanaila God mampe ita ne mainawo do itunune wanlempa.** **2** Ne elepe Mamana mampe anteapaa baiwantedina. Ne Mamana duwa bedewe wanwan bolawa uara winei, ita ne Mamana duwe anteape e waina bolawa teadewasamopa. Naita Mamana duwe wanwan bolawa diaewo, ne mai epe dialepona, dia. **3** Ne elepe anteape wanwanla bolawa teadewasamopa. **Ne bola sa e baila imaasapa, sa ipa ne ando leunteape manlawo wineape banlalepo do ane Mamana duwe naepe ne wainepinawo e do wankasantataa baiwa.** **4** Ne bola daineawo antedina intawa e ateitene wainilana, mai dia.”

*Iesu os inta Mamamba mampe gagalowa*

<sup>5</sup> Iesu epe diamodio Tomas me diene wanase, “Tatamba, e bola daineawo aitaa baiwaitiana no mai atentipona, dia. Sa baiwa bola sa intawa no mai atentataa rua, dia.” <sup>6</sup> Ita Iesu me sipoasane wanase, **“Ne nebaida ipa inta, ulaipa ita inawinakasala wainedina. Mai mida Mamamba mampe alepia rua, dia. Tane inta dea os, sa ipa ne bedenawoe Mamamba mampe wisepi.** <sup>7</sup> Ne e diaimaalene wanase, ‘Ne Mamana duwe antedina,’ tane ambi e bola ne anteapa wakoawaida wailana? **E ne ateineapono ne Mamana do atensapona. Bauta e me mai atensapona, dia, tane tauma e me ewale ita atenidasalana.**” <sup>8</sup> Tane Pilip wakoalene Iesu diene wanase, “Tatamba, no Mamamba euwanewo ewate atensataa menaidanede, ita e ene aitono mai nuabolantata, dia!” <sup>9</sup> Mape Iesu Pilip diene wanase, “Pilip, ne walama daumaia e bedelawo wainedine leidine, tane e mai ne ateineipona, ba? Ambi epe Mamamba wakoawa waie waiianase, ‘Mamamba euwanewo atensata.’ **Mida ne ewanedie ateinedia me Mamamba ewedie atensadie wande.**” <sup>10</sup> Mamamba ne bedenawo ita ne me bedewe wainedina sumanaiwaitiana, ba dia? Ne aiana wadino eteilana mai ne mainawoa waipe dialeipona, dia. Tane Mamamba ne bedenawo wandie nolawa dewasadie insaisa nedio gagalontedino eteilana. <sup>11</sup> **Ne Mamamba bedewe ita Mamamba ne bedenawo.** Ema wadina sumanaiwaitana. Naita dima ne wadina mai sumanaiwaitana ne ginasa dewamodine leidina sumanaiwaitana, ne Mamamba bedewe ita Mamamba ne bedenawo.

<sup>12</sup> Ne ulaipa dialedina, mida ne bedenawo

sumanaiwa itudia dima ne dewamodina rua deawaa dewamopi. Tane mai sa os, me nolawa bedewe dewa debamauida dewamopia rua, mai dima ne dewamona rua, ipawa ne Mamamba mampe antedina. <sup>13</sup> **Ne Mamamba mampe wainepino nitu uduudu e ne ebonawo iririwaitonuna ne ideita dewasapina.** Ne epe dewasapino Mamamba me Otopa bedewe sapaida donsampe ionoidolempaa baiwa. <sup>14</sup> Epe segalempo bedewe e dima ne ebonawo iririwaneanuna ne etalepine dewasapina.”

*Iesu wawe alala saubu Aleu kakaiwa gagalowaleide*

<sup>15</sup> Ema aupe Iesu wawe alala diamone wanase, **“Naita e ne nuawadawadaneanuna dima ne dialedina ruawaitonune wanlempa.** <sup>16-17</sup> Ita ne e baila Mamamba diapo me saula da manlawo wapiaubepi. Sa ipa Aleu kakaiwa mida ulaipa gagalowa sabamosampa, me e saulempo do wankasaitana, mai ando elepi, dia. Tawo ema Aleu kakaiwa mai wadapue mamposapua rua, ipawa tawo mai me dauwa etapue atentopua rua, diaida. Tane e ne wanawo alala me dauwa etale ateiten, ipawa tauma me e do wainilana ita ando e bedelawo wankasalepi. <sup>18</sup> **Ne elepe anteapo e mai suweibu rua wanlempa, dia!** Tane manlawo leuntape wineapa. <sup>19</sup> Walama kampaida os bedewe tawo apanawa ewaneapu, tane ema aupe mo mai ne ewaneapu, diaida. Tane e ne ewaneane ateitana ne bo bedewe enanawinene inawaa wainedina. **Ita ne inawaa wainedina baiwa e do inaida bedewe wankasaitana.**

**20** Ita e ne ewaneanuna walamawa osowe ateitana ne Mamana bedewe ita e ne bedenawo ita ne e bedelawo. **21** Apana mida ne aiana etedie wadedie mampesadie ita ruawaleidia, me ipa sa ne nuawadawadaniedie wande. Me mida ne nuawadawadanedia ne Mamana do me nuawadawadasade. Ita ne do me nuawadawadasadine me mampe ne sabamoidondino atenidanedie wande.”

**22** Mape Iudas da, mai Iudas Iskariot, Iesu diene wanase, “Tatamba, dima baiwa e no os mainimbo sabamoitawo eweeta, tane tawo mampe mai sabamoitawo eweepua umanawa waiana?” **23** Ita Iesu me sipoasane wanase, “**Me mida ne nuawadawadaneampa dima ne waeuwasadina ruawalempe waimpa.** Ita ne Mamana **me nuawadawadasampa, ita ne me nata me mampe winte me bedewentate bola wadate wankasantata.** **24** Tane me mida ne mai nuawadawadaneipona ne waeuwana mai eteipe ruawaleipona, dia. Aia ne waeuwantedino eteilana mai ne neba mainawoa, dia, aia sa eteilana Mamamba mida ne waaubanena mampea mainawoleidio gagalontedina.

**25** Ne e do wainite leitana walamawe gagalo sa uduudu ne dialenatuwan ita muriwa elepe anteapa. **26** **Ita Mamamba ne ebonawo e saula Aleu kakaiwa wapiaubepi e manlawo.** Me e dewa uduudu waeuwalepio atendewaitana. Ita do gagalona uduudu dialena nuala itumpo insennuna. **27** Ne elepe antepino mai inguguraitane nuala omaidasapi, dia, ne wanwan euwa obasa e manlawosape epe anteapa. Wanwan obasa ne manlawosapa mai tawo apanawa tawo ema

osowe donsaie waimoia rua, dia. Wanwan euwa obasa ne mainawoa e bedelawosapo euda os wanlempo elepe anteapa.

<sup>28</sup> Ne elepe anteape tane leunteape manlawo wineapa wano etale nuabolaitile wainilana. E epe dewaitile mampe sabamoitilana e ne mai nuawadawadaidaneipona, dia. Naita e ne nuawadawadaneipono ne Mamamba mampe anteapaa baiwantedina e nuaeuewaitipe wanleipona. Ne ana sa nuaeuewaitipona, ipawa Mamamba me ipa debamawaida, mai ne ruana. Ita ne sape me sapawa bedewe wainepina. <sup>29</sup> Ne gagalo sa uduudu tauma diaimaalenatuwan ando segantempo e mai ne insakoaneana, tane dima ne wana sumanaiwaitana. <sup>30</sup> Ne e do wainite gagalontitano walamanu kampaleide, ipawa Seitan mida tawo ema onedia mamba ne kadinepia baiwa iedia maidalen. Tane Seitan me meba mai mukawa da ne osonawo wineipona, dia. Tane dima ne mainawo segalepia, sa ipa ne neba insaisana rua segalepi. <sup>31</sup> **Ne dima dewasadina, sa ipa tawo apanawa atentopua baiwa ne Mamamba nuawadawadasadina ita me dima dianena ruaida dewasadina.** Tauma enano ana!"

*Iesu ipa wain iawaida*

## 15

<sup>1</sup> Ema aupe Iesu wawe alala diamone wanase, "**Wain iraiwa bedewe ne wain iawaida naunautetela enedina, ita Mamana irai sa apanawaida.**" <sup>2</sup> Ne wain iawaida enedina, ragapanu dainea mai naumoipona

irai apanawaida ewamodie ainawo toiamode. Tane ragapa dinea naunaulala ampe seupa isiwa kadintoia topualeidie simbiasadia naumpadewalempaa baiwa. <sup>3</sup> Ne gagalona wane dialeno wadale manlawosalana mampe kadi e bedelawo riamone nambemono euitene ragapana euwa wainilana. <sup>4</sup> **E ne bedenawo wankasaitonuno ita ne e bedelawo wankasantepino deaida wainenta.** Wain iawa ampe ragapa da tewapie nambelepie mai naupia rua, diaida! **Tane wain iawa ragapa ampe inikasaleidia naukasalempe winompa.** Ne ema wadine dialedina e umanala wadina. E ne eneane nambeitana e nausasia di enakasaitana, tane e ne bedenawo wankasaitonuna e naunautetela segaitana.

<sup>5</sup> **Ne ipa wain iawa, ita e ragapa wainilana. Apana mida ne bedenawo wankasaleidia ita ne me bedewe wankasantedina me nauidasampe waimpa, mai dia.** E ne eneane nambeitana mai dima da eba dewamona rua, diaida! <sup>6</sup> Apana mida mai ne bedenawo wankasaleipona me ragapa nausasialeidie di winedio toipune nambe aubeio tonaleidie wine-dia ruawa. Ita ragapa sa tonalala uduudu auwepue ia ilala bedewe aubamopuo imopituwapi. <sup>7</sup> Naita e ne bedenawo wankasaitonuna ita ne aiana e bedelawo winompo ruawaitonuna dima uduudu menaledia God iririsanuno enalempa, mai dia. <sup>8</sup> E nauidasanune wanlempaa bedewe ne Mamana ebowa debamasnune ionoidosanuna. Ita naunaula sa apana ewompe atentompa e ne wanawo alala wainilana. <sup>9</sup> **Mamamba ne nuawadawadanedia rua**

**ne e nuawadawaledino wainilana. Ita e ne nuawadawadana bedewe wankasaitana!**  
<sup>10</sup> E ne nuawadawadana bedewe wankasaitana intawa ema epe: Ne dima dialeno etalana ruawaitonune wanlempa. E epe dewaitonune ne nuawadawadana bedewe wankasaitana ne Mamana nuawadawadawa bedewe wankasantedine me aiawa ruawantedinatue wainedina ruawa.

<sup>11</sup> E epe dewaitonune mampe ne nuaeuna e bedelawo winakasalempa ita e nuaeu debamaia nopelempo wanlempa. Ne menaidanedia e nuaeu debamaia nopelempo wanlempa, sa baiwa dialene wanase, ‘E ne nuawadawadana bedewe wankasaitana.’ <sup>12</sup> <sup>◊</sup>Ita ne anaanana wadine dialedina ema epe: **Ne e nuawadawaledina ruawa eba eda nuawadawadaitonune wanlempa.** <sup>13</sup> Apana mida inawawa dabuasadi edie sosowa baibuleidia me nuawadawada debamaia dewasade, mai mida da ruawa, dia.

**14-15 Naita e ne dima dialepino ruawaitonuna e ipa ne sosonaida wainilana.** Mapo e God insaisawa atensia me nolawa dewalala wainile. Tane tauma ne mai e ebola Nola dewalala wapa, dia. Nola dewalala wandia me debamawa insaisawa atensia di nolaleide. Tane dima uduudu ne Mamana dianena ne e dialeno ateitile wainilana, sa baiwa ne tauma e ebola Sosonaida wapina. <sup>16</sup> **E mai ne sonabaneapona, dia, tane ne e sonabalena e aitane nolana dewamonuna mampe nauidasanuna baiwa.** Ita ipawa sa e dewasano naupia winakasala. Ita dima uduudu menaledia ne ebonawo Mambamba mampe iririwaitonuno me enalempa.

---

<sup>◊</sup> **15:12:** Ion 13.34; 15.17; 1 Ion 3.23; 2 Ion 1.5

Ema baiwa ne e sonabalene ituleno wainilana.  
**17** Ne anaanana ipa ema epe: E eba eda nuawadawadaitonune wanlempa.”

*Iesu wawe alala tawo nibuamompa a umanawa diaimaamodio etei*

**18** “Tawo apanawa e nibualempo mai insaisala oauaralepi, dia! Tane nuala bedewe insena mo bauta ne nibuaneiena rua e manlawo deawaa dewasaio pokawa eteilana. **19** Tawo apanawa sosou dewau deawaa dewamoie waimoia os nuawadawadamoie waimoi. Naita e tawo ema mampeaewo tawo apanawa e nuawadawadaleipona mo mubaauida rua. Tane e mai tawo ema mampea, diaida. E mo bedeuwo wainilano ne sonabalene ne neba baina tealeno wainilana, sa baiwa tawo ema apanawa e nibualei. **20** <sup>✡</sup>Mo e nibualempo pokawa etonune aiana diaimaalena insena: Nola dewalala uduudu mo onioniau apanawa atowe waimoi, mo mai onioniau apanawa amboiamoipe ionontoipe waimoipona, dia. **Ne e Debamala wainedino nibuaneie onana eneio nolantedine leidina, deawaa e ne nolana dewalala wainilana nibualempe onala enompa, mai dia.** Ita apava isiwa ne waeuwana wadeie ruawantoie waimoia rua deawaa e waeuwala mo etompe ruawantompa. **21** Mo mai e di nibuakoalempa, dia. Tane e ne waroroneile ebonawo nolaitle leilana baiwa nibualempe onala enompa. **Me mida ne waaubanena mo atensia waimoi, sa baiwa ne nibuaneia rua e do nibualempe.** **22** Naita ne

---

<sup>✡</sup> **15:20:** Matiu 10.24; Luk 6.40; Ion 13.16

mai mo mampo wineape Gagalo euda diamopono etasasia dubawa bedewe waimoipono kotubu dia. **Tane ne winene Gagalo euda amonanteno etane dabuasane eiena baiwa mo kadiusa kotuwantopu, mai lagantopua intawa da wineipona, diaida.** <sup>23</sup> Tane me mida ne nibuanedia, mai ne os nibuaneipona, dia, me ne Mamana do nibuasadie wande. <sup>24</sup> Naita ne mai mo bedeuwointa nolanteipe ginasa pokawaauida apama dewasasiawaia dewamoipono mo kotubu dia. Tane ne ginasa sa uduudu dewamodine leidino ewane ne wadaneape mamposapona, tane ne ita Mamana nibuaneie onamba enei. <sup>25</sup> Tane ema ipa dima mo anaanau bedewe girumalene winedia ulaipalepia baiwa segaleide. Mo anaanau wadi wadiase,

‘Ne mai dima da dewasapakadisapona, dia, mo di nibuanei.’

<sup>26</sup> Ne e elepe anteape e saula Mamamba mampea wapaaubepa e manlawo, **sa ipa Aleu kakaiwa mida God ulaipawa sabamosampa. Ita saula sa e onialempemuala badosampo wanlempa. Ita me Mamamba mampee iepie ne wasabamoneampa.** <sup>27</sup> Tane do e ne wasabamona wanune wanlempa, ipawa ne nolana uwaantedinawo ita tauma e ne waroroneilano do lakasten.”

## 16

<sup>1</sup> “**Ne aia ema uduudu dialena poka ema manlawo wimompo sumanaila ene omena sawa.** <sup>2</sup> Iuswa eiau e ando anaanalepu mai mo gagalou duwa bedewe odane mo do deaitana.

Tane mai sa os, walama wisepio kadiwa rebarebaida e manlawo dewasapu, ita mida e bolepua mo inseia abo mo God nolawaida dewasaie me wadaposisai.<sup>3</sup> Mo e kadilepua, ipawa mo Mambamba ita ne do mai ateinepona, dia.<sup>4</sup> Ne poka ema umanawa e diaimaaledina ita dewa ema e manlawo ando segalempo dima ne dialedina insene mai inguguraitana, tane badowa enane aitana. Gagalo ema ne e warorona uwaaitilana walamawe mai dialepona, tane tauma os gagalo ema dialedina, ipawa ne e do awodea nolantite wainite.<sup>5-6</sup> Tane tauma ne elepe anteapaa baiwantedina mida ne waaubanena mampe, sa baiwa ne tauma wasauna ema wadina. Tane mai mida e bedelawo ne waitaraneipe waiponase, ‘E naepe aitiana?’ E mai ne epe waitaraneapona, ipawa ne aiana ema wano etale nuala pareidalen.

**7** Ne e elepa umanawa wano etale nuala pareidalen. **Tane ne dialedina, eulena e baila ne elepe anteapa, ipawa ne mai anteapa e saula Aleu kakaiwa mai manlawo wisepie nuala badosapi, dia. Tane naita ne elepe anteapa ne me wapaaubepo e manlawo wisepi.**

**8** Aleu kakaiwa wisepie tawo ema apanawa mo kadi dewasaia sabamosapio atentopu mo kadi do waimoi. Ita do waeuwamopio dodomana intawa atentopu, ita God matangelawa kotuwa mampo segalepia sabamosapio atentopu.<sup>9</sup> Aleu kakaiwa mo kadiu dewasaia sabamosapio atentopu mo kadi do waimoi, ipawa mo mai ne bedenawo sumanaintoipona, dia.<sup>10</sup> Me wisepie dodomana intawa waeuwamopio ewapue atentopu mo inta kadiwa asiasi antoi. Ema epe

segalepia, ipawa ne anteapa Mamamba mampe ita e ne mai ewaneana. Tane Aleu kakaiwa manlawo wisepie saulepi. <sup>11</sup> Do Aleu kakaiwa God kotuwa ipawaida tawo ema apanawa mampo sabamosapio atentopu, ipawa Seitan mida tawo ema onedia kotulepia walamawa maidaleide.

<sup>12</sup> Ne menanede aia uara dialepa, tane e manlawo saiwaida wana baiwa mai dialepaa rua. <sup>13</sup> **Tane walamaipa Aleu kakaiwa mida God ulaipawa sabamosampa me wisepie ulaipaida intawa asiiasi banlalempa.** Me mai meba mukawa mampe gagalolepi, dia, tane dima me etedia rua wampe ita dima ompa osowe iedia dialempa. <sup>14</sup> Aleu kakaiwa ipa ne wadaposinempe sapaidaneampa. <sup>15</sup> Dima uduudu Mamamba mampea ipa ne nebaana, sa baiwa ne wane wanase, ‘Aleu kakaiwa mai meba ebewe nolalepi, dia, tane dima me waeuwalempa, sa ipa ne mainawoa.’ ”

### *Wawe alala nuapareu leusapio nuaeuntopu*

<sup>16</sup> Tane do Iesu me wawe alala diamone wanase, “Walama kampaida os dialepio e ne mai ewaneana, tane ema aupe walama kampaida dialepio osowe ewaneana.”

<sup>17</sup> Wawe alala me aiawa etane mo bedeuwo isiwa muba eda waitarantone waienase, “Me dima umanawa no dianene wanase, ‘Walama kampaida os dialepio e ne mai ewaneana, tane ema aupe walama kampaida dialepio osowe ewaneana.’ Tane do me wane wanase, ‘Ne Mamamba mampe antedina.’ Me epe wana ipawaida dima?” <sup>18</sup> Mo osowe muba wawadiadiantone waienase, “Do me wane

wanase, ‘Walama kampaida os bedewe e mai ne ewaneana?’ Me dima umanawa epe wan, aia ema me wamona ipawaida no mai atentapona, dia.”

**19** Iesu atenlen mo menamodia me waitaras-apu, sa baiwa mo diamone wanase, ‘Ne wane wanase, ‘Walama kampaida os dialepio e mai ne ewaneana, tane ema aupe walama kampaida dialepio osowe ewaneana.’ Ne epe wano e insakoaitile baiwa eba eda waitaraaitilana, ba? **20** **Ne ulaipa dialedina, e ne ewaneanasue ke wane nuapareidaitana, tane tawo ema nuaeulepi. E nuapareidaitana, tane nuapare sa dialepio aupe nuala nuaeu nopesapi.**

**21** Eueuwa ema wapo insena: Oto gamowa walamawe i poka etepie sidalepi, ipawa me walamawaida wisen. Tane oto mulepio aupe me poka etedia mai insepi, dia, ipawa me nuaeulen oto aitamana mulena baiwa. **22** Deawaa e ne wanawo alala manlawo segalepi. **Walama kampaida dialepio aupe e poka etane nuapareidaitana. Tane ema aupe ne osowe ewalepo e nuala nuaeu nopesapi. Ita nuaeula sa e manlawo winakasalepi, mai mida manlawo wadepiaubepi, diaida.** **23-24** Ne e do wainitana walamawe e mai dima da ne ebonawo iririwaitapona, dia. Tane ne e elepe anteapo aupe e mai dima da baiwa ne iririwaneana, dia, tane e ne ebonawo Mamamba mampe iriritonuna. **Ne ulaipa dialedina, dima uduudu e ne ebonawo iririwaitonuna Mamamba ideita enalempa. E ando iriritonune ita donsanuna, ita ema bedewe e nuala nuaeu nopesampa.**

<sup>25</sup> Ne aia ema uduudu mai ipawaida sabamosape wape dialepona, dia, tane walama iedia wisepio ne Mamamba umanawa waeuwadewasalepa ita ne gagalona ipawaida e tauwadea ateitana rua. <sup>26</sup> Walama sawo e raupari bedewe ne ebonawo Mamamba mampe dima menaledia iririwaitana. Ne mai waiponase, ‘Ne Mamamba mampe iririnteapa e baila,’ dia. <sup>27</sup> Tane Mamamba me meba e nuawadawadalede, ipawa e ne nuawadawadanealana ita sumanaiten ne God mampee winen. <sup>28</sup> Ne Mamamba mampee tawo ema osowe winen, ita tauma ne tawo ene leuntene antedina Mamamba mampe.’

<sup>29</sup> Me wawe alala dima me wadia etane sipoasane waienase, “Tauma e gagalo ipawaida sabamosaie waiana, mai sainape saipe waipona, dia. <sup>30</sup> Tauma no atnten e dewa uduudu ipa atena os, sa baiwa ipawaida sabamosaie waiana. Ita mai mida e dima waiana waitarawa da e dieepia rua, dia. Sa baiwa no sumanaintitana e God mampee wiene nolaitiana.”

<sup>31</sup> Iesu wawe alala epe waiena baiwa sipoamone wanase, “Walama daumawa e ne insakoaneilano do wainite, tane tauma e sumanaidaiten! <sup>32</sup> Walama iedia wisepi tane aitamana maidaleide e uduudu saanalepuo deaatantuwapu. Ita ne neba os eneana, tane ne mai nebaida, dia, ipawa Mamamba ne do. <sup>33</sup> Ne gagalona daumawa ema uduudu dialena e ne bedenawo poka saiwa bedewe nuala obasa aiaisiwa do wanlempaa baiwa. **Tawo ema osowe e poka etonune nuapareitonuna. Tane badowa**

**enana mai nuala pola wapi, ipawa ne tawo  
ema saiwa uduudu nanausana.”**

## 17

*Iesu Mamba mampe iririwa odedia sapaidasapi*

<sup>1</sup> Iesu gagalo sa diasane aupe pisiwane emawa uboo odeno rauparilene wanase, “Mako, ne walamanaida tauma wisenauben. Ne iririedina e Otoaida sapaidassaa. Tane ne menanedia bonteape sapaidanteapo ita ema bedewe apava e wadaposiepuo sapaidaitaa. <sup>2</sup> Ne epe iririedina, **ipawa e Otoaida apava uduudu osouwo muka wanaana me apava mida e me witapemoana inawinakasala wanamopia baiwa.** <sup>3</sup> Ita **inawinakasala ipa ema epe: Mo mida e sonabamoana e dea os Godida wainiana atenepe ita do Iesu Keriso mida e waauabeana atensapona.** <sup>4</sup> Ne tawo ema osowe nolana witanawosaana dewamonatuwana mampe apava e wadaposieieno sapaidaitene wainiana. <sup>5</sup> **Mako, ne iririedina tauma manawonee sapaidanea tawo segasia walamaewata wainite sapaidantite wainitana ruawa.”**

*Iesu wawe alala baibu rauparileide*

<sup>6</sup> “Tawo apanawa waimoia bedeuwo mo mida e sonabamoe ne mainawomoana mampo e sabamoeni ateneiena. Mo e ebao waimoio ne mainawomoano e aiaa waeuwamono wadane mamposane ruawantoienna. <sup>7</sup> Ita mo atentoiena dima uduudu ne mainawo wineia e os manawoa ne neutuwan.

<sup>8</sup> E aiaa ne dianeatuwana ne waeuwamono mo wadane mamposane waimoi. <sup>9</sup> Ne tauma

mo os baibu rauparintedina, ipawa mo e ebaa waimoi, ne mai tawo apanawa uduudu baibu iririnteipona, dia. Tane mo mida e sonabamoe ne mainawomoana baibu rauparintedina. <sup>10</sup> Dima uduudu ne mainawo wineituwadia ipa e ebaa. Ita dima uduudu e manawo wineituwadia, sa ipa ne nebaana. Tane mo mida e sonabamoe mainawomoana mampoe ne ebona debamaleno ionoidontene sapaidanten. <sup>11-12</sup> ♫Ne tawo emawo mai wankasanteapa, walama kampaida os wampe epe manawo wineapa. Tane mo mai ne do tawo ete manawo winta, dia, mo tawo emawo waimompa. Sa baiwa ne mo insamone baibu rauparintedina. **Mako, e ipa kakaiwaida wainiana.** **Ne iririntedina mo tawo emawo waimompe poka daitada etompe sumanaibu epuiapua sawa e eboa mukawa mampe ewadewasamono sumanaintompe waimompa.** **Mo empueumpuntopua sawa e mo ewadewasamono deaida waimompa e ne nata deaida wainitana ruawa.** Ita e eboa mukawa ne neaana mampe ne mo do wainite leitanawo ewadewasamodino sumanaibu bedewe waimoidewantoie, mai da rebalepona, dia. Tane dea os rebalena, sa ipa dima buka bedewe girumalena ulaipalepia baiwa. Rebalala sa me mida bola kadiwaida bedewe alepia saiwa osowesana apanawa.

<sup>13</sup> Ne mo keu tawo emawo mo do wainite leitana bedewe manawo iririntedina mo etapue nuau insempembe badowa waimompa. Ita ne mo emope manawo iepino ne rauparina

---

❖ **17:11-12:** Ion 13.18

sa mo insempne ne nuaeuna debamaia nopenompo waimompa. <sup>14</sup> Ne mai tawo ema mampea wainipona rua mo mai tawo ema mampea waimoipona, dia. **Ne e aiaa mo diamonatuwano wadane mamposane tawo dewawa eiena baiwa tawo apanawa mo nibuamoio waimoi.**

<sup>15</sup> Ne mai e dieeipona mo tawo ema epue ne e manawo iedina rua tauma manawo wimopu, dia. **Tane mo tawo ema osowe nolantompe waimompo Seitan mo kadimopia sawa e ewadewasamono sumanaibu bedewe badowa enompaa baiwa.** <sup>16</sup> Ne mai tawo ema mampea wainipona rua mo mai tawo ema mampea, dia. <sup>17</sup> E aiaa ipa ulaipaida winede, mai waeuwa isiwa ruau, dia. Ita ne menanedia e ulaipaa aiawa sa mampe waeuwamono e ulaipaa sa mo atenidantompe mampe wanwambu kakaiwaida segantompe e manawoaida waimompa.

**<sup>18</sup> E tawo emawo ne simbiaepaa baiwa e waaubaneana rua ne tawo emawo mo waaubamodina antopue simbiantompaa baiwa.**

<sup>19</sup> Mo baibu ne etena e insaisaa rua nanantedina mo do etepu ulaipa mampe e os baia nanantopue kakaiwaida segantopua baiwa.”

*Iesu sumailala uduudu baibu rauparileide*

<sup>20</sup> “Mako, ne mai wanawo alala os baibu rauparintipona, dia. Mo nomopu antopue Gagalo euda amonantopuo apna etapue bedeuwo mida ne gagalona wadapue mamposapue ne sumanainantopua baibu do rauparintedina.

**<sup>21</sup> Mako, e ne bedenawo ita ne e bedeawo**

**deaida wainitana ruawa ne menanedia sumanailala uduudu muba deaidantompe waimompa.** Ita ne iririntedina mo no bedemboidontompo deaida wainento tawo apanawa ewompe e ne waaubaneano winena sumanaiwantompa. <sup>22</sup> Sapaida ne neaana mo wanamona mo deaidantompe waimompa baiwa ambi e ne nata deaida wainitana rua. <sup>23</sup> Ne mo bedeuwo ita e ne bedenawo. Sa baiwa ne iririntedina mo sumanailala uduudu e saumono insaisau deaidalempo waimompa. **Ne menanedia mo deaida waimompo apana ewamopue sumanaintopu e ne waaubaneano winen.** Ita mo deaida waimompa mampe apana atentopu e mo nuawadawadamiano waimoi ne nuawadawadaneiana rua.

<sup>24</sup> Mako, tawo segasia walamawe e ne nuawadawadanee sapaidaneano wainitee. Ita ne menanedia mo uduudu mida e sonabamoana ne naepe wainepinawo mo do sape waimompe sapana bedewentompa.

<sup>25</sup> Mako, e ipa dodomanaida. Tawo apanawa e mai ateneipono waneipona, tane ne e atenidaedino wainiana. Ita ne wanawo alala e ne waaubaneano winena atenidantone sumanaintioie waimoi. <sup>26</sup> Ne mo mampo e sabamoidoeno atenei, ita ne osoweosowe mo mampo e sabamoepino atenidaempe waimompa. Tane ne mo mampo e sabamoepino e nuawadawadaa ne bedenawosaana do mo bedeuwolepio wadapu. Ita ne nebaida mo bedeuwonteapo waimompa.”

*Sorodia Iesu wadeiitudede  
(Matiu 26.47-56; Mak 14.43-50; Luk 22.47-53)*

<sup>1</sup> Iesu raupariwa diasane aupe me wawe alala do Ierusalem ene doba Kidron nuawa nawane antone waiwa dawo ia olib iraiwa bedewe wimoiена. <sup>2</sup> Tane Iudas mida ando Iesu nanalepia apanawa bola sa atemba, ipawa Iesu wawe alala do kainokaino irai sa bedewe antoie waimoie. <sup>3</sup> Walamaipa mo irai sa bedewe waimoio pirisi debamau ita Parisi apanawa sorodia uara, ita God duwa onionialala isiwa waaubamoia irai sawo antopue Iesu wadapuitudepi. Mo a baiwantoie onau puraiwawa uara ita siwau otamoiено do Iudas banlamono awodea antoieno. <sup>4</sup> Mo dima awa ieia Iesu atenlentue wandie ita ona apanawa maidantoio me nosene mampo alene waitaramone wanase, “E mida wadanaitudepia awa wilén?”

<sup>5</sup> Sorodia uara, God duwa onionialala ita Iudas mida Iesu nanalepia do Iesu danawe wimone eneie. Ita ona apanawa sa Iesu sipoasane waienase, “No Nasaret Iesuwa awa winen.” Ita Iesu diamone wanase, “Ne ipa ema.” <sup>6</sup> Tane Iesu epe wadio mo me sawaidantone adiuwoadiuwo antone omeieno. <sup>7</sup> Iesu osowe ona apanawa waitaramone wanase, “E mida awa wilén?” Ita mo me sipoasane waienase, “No Nasaret Iesuwa awa winen.” <sup>8</sup> Mape Iesu diamone wanase, “Ne aita dialena ne ipa ema. Naita e ne ana wilena ne sosonaida do mape wainitana emono di antopu.” <sup>9</sup> Iesu dima wana mo ruawantone me sosowa mai wadaitumopona, dia. Ita ema segalena dima Iesu bauta raupari bedewe wana ulaipalepia baiwa. Me Mamba diene wane wanase, ‘Mo

uduudu e mainawomoana ewadewasamodino mai dea da rebalepona, dia.’ <sup>10</sup> Tane mo Iesu wadapuitudepia baiwantoio Saimon Pita isima daumawa tampe andie do leidia teinenaubene pirisi ionoidoa nolawa dewalala ebowa Malkas epene asiwa on tonpunden. <sup>11</sup> <sup>✡</sup>Iesu Pita onaleno ewene badowaida diene wanase, “Ona ee, isimaa aupe ane ea! Ne poka reduwa Mamamba ne baina ituno winedia ne napona, tane e meneedia ne mai napaa baiwa itubodaneiana, ba?”

<sup>12</sup> Iesu Pita epe dieno aupe Rom gabemaniwa sorodiau ita mo oniamodia apanawa ita do God duwa onionialala Iesu wadanaitue witapa taune banlene antoiena. <sup>13</sup> Me kotulepia baiwa mo banlene Annas mampe wimone mampesaieno kadiwa banuleidie. Annas sa Kaiapas nemon-apa, ita Kaiapas ena sawo dewa ema segaleidie walamawe pirisi ionoidoa wandie. <sup>14</sup> <sup>✡</sup>Kaiapas ipa sa Iuswa eiau gagalou bedewe mo gagalomone wanase, “Apana dea totaaubeto no uduudu saimba wadepie bolepio no apanamba inantopu.”

### *Pita Iesu wakoawa wadie lagaleide*

*(Matiu 26.69-70; Mak 14.66-68; Luk 22.55-57)*

<sup>15</sup> Sorodia Iesu banlene antoio Saimon Pita ita wawe alala dea da mo wauwo Iesu warorosane antoie. Tane Pita sowa sa nata antoia pirisi ionoidoa me atensan. Sa baiwa me rua os pirisi ionoidoa kotuwa bolawe Iesu banlene odeio me do odene alen. <sup>16</sup> Tane me sowa Pita odepiae wo wanaitue bodeieno kotu gonaawa moawa adiwe

---

<sup>✡</sup> **18:11:** Matiu 26.39; Mak 14.36; Luk 22.42      <sup>✡</sup> **18:14:** Ion 11.49,50

enakasalen. Pita sowa mida pirisi ionoidoa atensana kotu bolawe odene sowa ewensue leulene awa aleidie. Me gonaa moawa sa iwuleidia iwa dea mampe nosene sowa Pita odepia gagalowa wane diedio i oaleno sowa banleno oden. <sup>17</sup> Ita Pita odedio i sa me waitarasane wanase, “E Iesu wawe alala sou dea eweedina, ba?” Tane Pita lagalene wanase, “Ne mai me wawe alala sou dea, dia!” <sup>18</sup> Pirisi ionoidoa nolawa dewalala ita God duwa onionialala kotu bolawe obasatomodio ia denantone ewamodio tampeinta eneie. Ita Pita do mo bedeuwo ia ewasedio enedie.

*Pirisi ionoidoa Iesu kadiwa banusade  
(Matiu 26.59-66; Mak 14.55-64; Luk 22.66-71)*

<sup>19</sup> Mo peloo ia ewamodio eneio sorodia Iesu banlene pirisi ionoidoa kotuwa duwa bedewe odane mampesaieno me kadiwa banusadie kotsadie. Ita pirisi ionoidoa Annas Iesu ambi wawe alala do nolantoie laia, ita ambi me apana waeuwamodie leidia umanawa waitarasadia wapio etepia baiwa. <sup>20</sup> Ita Iesu me sipoasane wanase, “Ne mai weregainta gagalontipe leipe, dia! Ne Iuswa gagalou dubu bedewainta ita God duwa bedewe mo auweio sabamo waeuwamodino asisuneie. <sup>21</sup> E dima baiwa ne waeuwana waitarawaneiana? Mo mida ne asisuneane waeuwana etane atentone waimoia waitaramowo diepu.”

<sup>22</sup> Iesu pirisi ionoidoa epe dieno baiwa onionialala dea Iesu tampe enedie sainapa epenaubene diaidasane wanase, “E pirisi ionoidoa mampe epe gagalokaditiana, ba?” <sup>23</sup> Ita Iesu leusane me diendewae wanase, “Ne dima wapakadisapaa benemawa ipawaida wamowo

etapa. Ne ulaipa gagalowa wadine, tane e mampe ewaano kadileno onawa di epaneana. Dima baiwa epe dewaiten?”

<sup>24</sup> Iesu epe wadio Annas me waitarasadia ene sorodia diamona me witapa tautaula enedia do banlepue pirisi ionoidoa Kaiapas mampe antopuo kotusapi.

*Pita osowe Iesu wakoawa wadie lagaleide  
(Matiu 26.71-75; Mak 14.69-72; Luk 22.58-62)*

<sup>25</sup> Kaiapas Iesu kadiwa banuleidio Saimon Pita ia ewasedie enaidasadio apana da wisene waitarasane wanase, “E Iesu wawe alala sou dea ia ewedio eneiana, ba?” Ita me lagalene apana sa diene wanase, “Dia, ne mai me wawe alala eneipona.” <sup>26</sup> Tane pirisi ionoidoa nolawa dewalala dea do sape ia tampe enedie Pita eintue diene wanase, “E ambi eba wakoa waie lagaitiana? Ia olib iraiwa bedewe e Iesu do eneilano ne eweena!” Apana ema mida Pita epe diedia baidasowaida Malkas olib iraiwa bedewe me asiwa Pita tonpunden. <sup>27</sup> Tane me Pita eintue diedio me bauta dewalena rua Iesu wakowa wane lagaleidio kanka aiawa wan.

*Iesu Pailat danawe enedio kotusadie kadiwa banuleide*

*(Matiu 27.1-2,11-31; Mak 15.1-20; Luk 23.1-25)*

<sup>28</sup> Kaiapas Iesu kotusane diasano sorodia ita Iuswa eiau isiwa tadina bedewe me banlene Rom gabemaniwa debama Pailat mampe antoiena. Tane mo sape wimone Iuswa mai Pailat kantuwa duwa bedewe odapona, dia. Mo anaanau ampupune Pasowa odawa bedewe odasiantopua

sawa peloo eneie. Ipawa Iuswa anaanau wadia mo uwa da apanawa duwo mai odapu, dia. <sup>29</sup> Mo peloo enakasantoiено baiwa Pailat mo mampo nosene waitaramone wanase, “Apna ema kadiwa dainea dewamono wawusale baiwa banlele ne mainawo wilena ne kotusapa?”

<sup>30</sup> Ita mo leusane Pailat diane waienase, “Me kadiwa dewasasiaewo no mai me banlepe mape winepona, dia. Me ipa kadi dewalalaida ebowa alala, e me kotusaa baiwa manawosaitana.”

<sup>31</sup> Pailat epe etene dabualene mo diamone wanase, “Ne mai me kotusapa, dia! E anaanala manlawo winede, anaanala sa asiа me kotusana.” Ita mo leusane waienase, “Me kadiwa baiwa bolepidia os menanede, tane e atena no Iuswa mai mukamba wineipona me bowa sauawa wata. E Rom gabemaniwa os muka sa manlawo winede.” <sup>32</sup> <sup>33</sup> Mo Iesu mai muba insaisawo banlepe Pailat mampesapona, dia, tane ema segalena dima Iesu bauta me bo inainamba ambi bolepidia umanawa wana ulaipalepidia baiwa.

<sup>33</sup> Mo sai sa Pailat waneieno leulene duwe alene sorodiawa diamona antopue Iesu banlepue mampesapu. Ita me banlene Pailat mampe wimoieno waitarasane wanase, “E Iuswa wareeu, ba?” <sup>34</sup> Iesu Pailat sipoasane wanase, “E eba ne umanana epe insee ne waitaraneana, ba apna da ne umanana dieeieno etee rua waiana?” <sup>35</sup> Ita Pailat leusane wanase, “Ne mai Ius apanawa wainipona ita e umanaa atenteapona, dia! E eba apnaa banlaene wimone witana-woeiena ita Iuswa pirisiu debamau e wawuene

---

<sup>32</sup> <sup>33</sup> **18:32:** Ion 3.14; 12.32

waiena rua ne wana. E dima dewasaakadisaano mo waie wawuei?”

<sup>36</sup> Mape Iesu Pailat diene wanase, “**Ne gonaana bedewe warerentedina mai tawo ema mampea, dia.** Naita ne gonaana tawo ema mampeaewo ne nolana dewalala adinawon-topē Iuswa wadaneiitudedia onau enapono mai wadaneapona rua, diaida. **Tane ne gonaana bola dawo winede, mai tawo emawo, dia.**”

<sup>37</sup> Pailat aia ema etene Iesu mampe wanase, “E warere wainiana, ba?” Ita Iesu me diene wanase, “E waadewaitene waanase, ‘E warere wainiana.’ Ne tawo ema osowe ulaipa benemawantepina awa winen. Benema ipa sa os baiwa tawo emawo muntene wainedina. **Mo mida ulaipa intawe antoia ne asisuneie ulaipa benemawa wadeie mamposaie waimoi.**” <sup>38</sup> Iesu epe wadio Pailat wane wanase, “E ulaipa umanawa waiana, tane ema ipawaida dima?” Me epe insakoalene wane ene nosene Iuswa peloo eneio mampo alene diamone wanase, “E me wawusailana baiwa ne kotusane mai kadiwa da donsapona, dia. <sup>39</sup> Tane e dewala winedia ruawa Pasowa odawa odaitonuno bedewe diburalala dea wadapaaubepo nosepie di alepi. E menaledia me mida ebowa waia Iuswa warereu ne wapaaubepo nosepie di alepi, ba?”

<sup>40</sup> Pailat epe wadio mo etane dabuantone nuau kadiidaleno apana da menamono baiwa mukantone wane waienase, “Me ea, no menanedia Barabas wadaaubewo di nosepi alepi!” Tane Barabas sa mo umanawa waia kadiwaida dewalala, Rom gabemaniwa onau enedia apanawa.

# 19

*Pailat Iesu kotusane ompa osowe wisena koros osowe seupuo bolepi*

<sup>1</sup> Mape Pailat sorodiawa diamona Iesu tai mampe epaepabobosapu. <sup>2</sup> Me diamona rua mo Iesu epaepabobosane ita ituaisisapua baiwa tai gedaragedaraua panane uwawe aneiena. Tane do garawa dubawa ewaewawa warere tauia rua wadane ampe aine mo danauwosaieno eneno <sup>3</sup>wasi mampe auwadewadewasaie waiase, “Iuswa warereu, e auwadewadewaeite ionoeitana!” Mo epe waie ita sainapa epaaubasaie.

<sup>4</sup> Mo Iesu epane ituaisisaieno dialeno Pailat osowe Iuswa peloo eneia au nosene alene diamone wanase, “Ne Iesu banlepe noneape manlawoso danalawo enompo ewane ateitana ne me kotusadine mai me kadiwa da donsapona matangelawa wadepi.” <sup>5</sup> Pailat epe wane sorodiawa diamono Iesu banlene nomone Iuswa danauwo ituieno enen. Me uwawe gedara anala ita garawa dubawa ampe anala do enedio Pailat diamone wanase, “Apana ema e wawusailana enedia ewana!”

<sup>6</sup> Tane pirisi debamau ita me onieia apanawa me enedio ewane dabuaidasane mukantoie waie waiase, “**E me koros osowe seue bosaa! Me koros osowe seue bosaa menanedé!**” Mo Pailat epe badowaida dieio etene me sipoamone wanase, “Ne me kotusane tane mai kadiwa da donsapona bowalepi, dia. E me bowa menalepia eba wadane kotusane koros osowe seune bosana!” <sup>7</sup> Iuswa Pailat aiawa etanadabue badowaida diane waienase, “Me meba umanawa

wadia me ipa God Otopa wande. Aia sa me wana mampe no anaanamba ainpundene God wakadisasan. No anaanamba wadia mida God wakadisasadia bolepi. Sa baiwa me boleapia menanede!”

<sup>8</sup> Mape sorodia Iesu banlene leuntone kotu duwe odeiena. Tane me God Otopa wadia wana wawuwa Iuswa waieno Pailat etene nuawa saidaleno <sup>9</sup> inta banusadia naintasapio inalepi. Sa baiwa me leulene duwe alene Iesu waitarasane wanase, “E mida, nainta wiena umanawa dianeawo etapa!” Tane Iesu me waitarawa sipoasapona dabualen, mai dima da wapona, dia. <sup>10</sup> Ita Pailat Iesu badowa diene wanase, “E ne mainawo gagalo dabuaitene eneiana, ba? E ne mukana atena, ba dia? Ne wapo e noe di aitaa, ba wapo e koros osowe seuepue boepu!”

<sup>11</sup> Pailat me epe badowa diedio Iesu leusane diene wanase, “Ne osonawo e mukaa mai wineipona, dia, tane e tauma mukaa ne osonawo wadaana, ipawa God muka sa e eneen. E koluteiana, sa ipa e kadi dewasaiana God mampe, tane apava mida ne wadanene e witaawosana me God mampe kadi debamaia dewasan, mai e ruua.” <sup>12</sup> Iesu Pailat epe dieno etene Iesu epono di nosepe alepona menasan, tane Iuswa Pailat wasanasane mukantoie waiase, “Naita e apava sa matangelawa ewo di nosepi alepia e Rom warerewa ionoidoa Sisa onawa apanawa segaitaa. Apava sa meba umanawa wana me warere wande. Ita me mida epe wadia Rom warerewa ionoidoa anaanawa andipune me onawa

enede.”

<sup>13</sup> Mo epe mukantoie waio Pailat etene me sorodiawa diamono Iesu kotu duwa bedewee banlene peloo nomone Iuswa danauwo ituieno enen. Me sape enedio Pailat kotu ompa wapiaubepia baiwa kotu bolawa maida winedia ebowa waia Seu ribaribalala mampe alene kotu kolaiwatawa osowe aisdene wain. Tane bola sa ebowa Ibru aiawa mampe waia Gabata. <sup>14</sup> Me sape wandie inta banusadia Iesu epono di nosepe alepona baiwa. Ita Iesu Iuswa danauwo enedio ewene mo diamone wanase, “Warerela sa enedia ibuwa ewana!” <sup>15</sup> Tane mo me dabuaidasaie mukantoie waiase, “No apana sa mai ewaewa menaneipona, Wade nambesae koros osowe seué bosaa!” Mo epe waio Pailat etene waitaramone wanase, “E warerela ne bosapaa menaledio baiwa wailana, ba?” Ita pirisi débamau me gagalowa leusane waienase, “No Sisa os wareremba wandia aten-ten, mai warere da, dia.”

<sup>16</sup> Ita Pailat ompa osowe mo aiau ruawalene Iesu me sorodiawa witaposana koros osowe bospua baiwa. Tane dewa ema Pasowa odawa imaawantompaa walamawe enauto rua segalen.

*Iesu koros osowe seué  
(Matiu 27.32-44; Mak 15.21-32; Luk 23.26-43)*

<sup>17</sup> Pailat sorodiawa diamona ruawa Iesu meba korosiwa waneieno awaneno banlene antoie bola ebowa waia Uwa nepa mampe wimoiena. Bola sa Ibru aiawa mampe waia Golgota. <sup>18</sup> Sape mo Iesu koros osowe seuienia. Ita me tampe apuna nata seumoienna, dea witapa on deneuwe ita sowa da witapa sen deneuwe.

**19-20** Tane Pailat Iesu wawuwa gagalowa girumaleno sorodiawa wadane koros osowe Iesu seudiawo onape tutuntoiena. Pailat wawu gagalowa sa Iuswa aiau Ibru mampe, ita Romwa aiau Latin, ita do Girikiwa aiau mampe girumalene itun. Pailat Iesu wawuwa gagalowa ema epe girumalene wanase, “**Nasaret Iesuwa, me Iuswa warereu.**” Tane bola Golgota naepe Iesu koros osowe seuiena Ierusalem tampeido. Sa baiwa Iuswa uara wimoie Iesu wawuwa gagalowa sa me onape winedia wisiantoie eie antoie. **21** Tane pirisi debamau giruma sa wisiantone ewane Pailat mampe antone momoduntone waienase, “No menanedia e Iuswa warereu wae girumaitena wadaaube nambesaa. Tane wawu gagalowa meba ampesae itue girumaite waase, ‘Ne ipa Iuswa warereu.’” **22** Mo epe waio Pailat etendabue diamone wanase, “Dima ne wane girumantena ideita winakasalepi.”

**23-24** Sorodia nataitanata Iesu koros osowe seuieno dialeno aupe me garawaida odantone oteiena. Me garawa da euda, atowe tautaulala, mai gara kepawa nambenambe auwodeasape popontopona, dia, tane gara dea os ududupa winedia baiwa mai siontope otamopona, dia. Ita mo gara sa euda ewane baiwa muba gagalontone waienase, “Gara ema euda mai siontata, no owa da dewasate somba dainea ainepia me gara ema wadepi.” Mo Iesu garawa osowe epe dewantoiena dima buka bedewe girumalena ulaipalepia baiwa. Buka ema epe wadi wadiase, “Mo ne garana odantone oteiena ita garana da owawantone wadeiena.”

Sa ipa buka bedewe wadia ruawa sorodia dewantoiena.

<sup>25</sup> Tane Iesu seuienawo korosiwa tampeido me inawa enedie. Ita do me inawa wamba, ita Meri Kilopas manainapa, ita do Meri Magdalin sape eneie. <sup>26</sup> Iesu inawa ita do me wawe alala nuawadawadaidamodia me korosiwa tampeido eneio emawa ieno mo ewamone inawa diene wanase, “**Inana, mida tanawo enedia e otoaida, wade manawosaa.**” <sup>27</sup> Ita Iesu wawe alala Meri tampe enedia ewene diene wanase, “**I tanawo enedia e inaaida, wade manawosaa.**” Ita wawe alala sa Iesu wana ruawalene me boleno aupe Meri wadene inawananasano do waimoie.

### *Iesu bowa gagalowa*

(Matiu 27.45-56; Mak 15.33-41; Luk 23.44-49)

<sup>28</sup> Iesu mo nata epe diamono dialeno aupe me nuawa bedewe insene atenlen nolawa uduudu God ituna ruawa dewamontue ompa osowe wisenauben. Ita buka bedewe girumalena winedia ulaipalepia baiwa me wane wanase, “**Ne gadompana makoidaleide.**” <sup>29</sup> Me epe wadio sorodia esa sigasigaua dugiwa enedia mampe alene koina wadene newa osowe gara kepawa taune esa sa sigasigaua bedewe noaneno butalen. Ita gara sa butasana wadenposie Iesu mampesane me moape itudia napona baiwa. <sup>30</sup> Ita me esa sa sigasigaua nane aupe wane wanase, “**Uduudu dewamonatue ompa osowe winenaaubena.**” Me epe wane imumba epente ita bolen.

### *Sorodia Iesu tebipa enei*

<sup>31</sup> Iesu boleno aupe Iuswa eiau Pailat mampe antone wimone diane waienase, “Mo mida koros osowe seumoana bo baiwantoi. E sorodiaa waaubamowo antopue mo wau epateiantopuo tauwadea bontopuo ita etepu wadaaubamopu.” Mo Pasowa odawa teadewasaa walamawe Pailat epe iririsae, ipawa imonemba Sabat walamawa debama Pasowa odawa uwaalepi. Ita Iuswa mai menamoipona mo mida koros osowe bontone wineia Sabat walamawe seukasantopu. <sup>32</sup> Pailat mo iririu ruawalene me sorodiawa waaubamono antone mo nata mida Iesu tampe korosiu osowe seumoiena wau epateianton. <sup>33</sup> Ema aupe mo Iesu mampeido antone wawa epateiantopua baiwantone tane me boidalena ewane eiena, mai wawa epateiantopona, dia. <sup>34</sup> Tane sorodia sou dea ona ewa wadene Iesu tebipa eino osina ita esa memenauben.

<sup>35</sup> Me mida dewa ema sorodia sa Iesu mampe dewasaieno ewena benemawaleidia e do ateitana baiwa. **Apana dewa ema ewena me sumanaiwalaida, dima me benemawalena, sa ipa ulaipaida. Me ema epe benemalena e do sumanaitana baiwa.** <sup>36</sup> <sup>35</sup>Sorodia Iesu wawa epateiawa ene tebipa os eneiena dima buka bedewe girumalena ulaipalepia baiwa. Buka ema umanawa wadi wadiase,

“Mo me etepa nepa mai da epaputewapi, dia.”

<sup>37</sup> <sup>36</sup>Ita buka bedewe do naepe wadi wadiase,

“Mo pisiwapue mida mo tebipa eneiena ewapu.”

*Iesu etepa bo nagawa bedewe itui  
(Matiu 27.57-61; Mak 15.42-47; Luk 23.50-56)*

---

<sup>35</sup> **19:36:** Ekisod 12.46; Sam 34.20    <sup>36</sup> **19:37:** Sakaria 12.10;  
Gagalo 1.7

**38** Iesu warorowa dea Iosep, me Arimatia apanawa, Iuswa eiau sauleidie dainadainaaua me wawe leidia apanawa. Me Iesu bolena atenlene Pailat mampe alene iririsane wanase, “Rua ba dia, ne Iesu etepa wadape bo nagawa imaalawo itupe weregasapa?” Ita Pailat me iririwa etene oaleno me ene leulene Golgotawo alene Iesu etepa winedia wadenaubene awanene anton.

**39** <sup>¶</sup>Ita me sowa Nikodimas mida bauta tadino Iesu mampe gagalolepia awa wisena me sausan. Nikodimas ia asiwa esapa bonabonaaua gadantoiено makolena saiwa debamaia awanene do wisen. **40** Mo nata Iuswa bo itumpe dewantompaа rua ia esapa gadantoiено makolena gara osowe weisane do Iesu etepa lomantone awanene bo nagawa mampe antoiena.

**41** Bo nagawa sa Iesu koros osowe seuiena tampeido irai da bedewe imaala winedie. Ita bo nagawa sa bedewe mai bauta bo da itupona, dia.

**42** Tane Sabat rawi sawo uwaalepia baiwaleidio mo diniwantone Iesu etepa bo nagawa maida winedia bedewe ituiena.

## 20

*Iesu bo bedewe enenwisena aupawa di ewei  
(Matiu 28.1-8; Mak 16.1-8; Luk 24.1-12)*

**1** Sabat walamawa dialeno imonembawa Sande walama pumpu Meri Magdalin Iesu etepa naepe ituienawo alene seu debamaia bo nagawa enenbodae winedia rialene nambe winedio ewen.

**2** Me bo nagawa epe ewene tauwadea ene weuwane Saimon Pita ita wawe alala da mida

---

<sup>¶</sup> **19:39:** Ion 3.1,2

Iesu nuawadawadaidasana mampo wisene dima ewena benemawalene diamone wanase, “No Tatamba etepa mo wadane antoieno aupawa ne ewanasuden, bo nagawa di winakoaleide. Ne mai atentapona me naepe ituiena.”

<sup>3</sup> Pita sowa nata aia ema etane tauwadea bolau waimoia ene bo nagawa ewapua awa weuwane antoie. <sup>4</sup> Ita mo nata antoie Pita sowa weuwaidasana baiwa bautalene bo nagawa mampe wisen. <sup>5</sup> Me mai bo nagawa bedewe odapona, dia. Me tampe enene wirorolene bo nagawa bedewe gara Iesu lomantoienna di winamoio ewamodie. <sup>6</sup> Tane Saimon Pita muriwalene wisene bo nagawa bedewe odene alene gara Iesu lomantoienna di winamoio ewamon. <sup>7</sup> Ita do gara da Iesu uwawa lomantoienna mida nukulene awoa itundewalena ewen. <sup>8</sup> Mape Pita sowa bautalene bo nagawa mampe wisene moape enedia Pita wawe odene alene **bo winena aupawa ewene Iesu bo bedewe enenwisena sumanaiwalen.** <sup>9</sup> Wawe alala mapo ita Iesu bo bedewe enenwisena walamaue me bo bedewe enepiwisepia umanawa buka bedewe girumamono wineia mai atentoipe waimoipe, dia.

*Iesu Meri Magdalin mampe sabamoleidio  
ewede*  
*(Matiu 28.9-10; Mak 16.9-11)*

<sup>10</sup> Ita wawe alala nata sa bo nagawa ene leuntone duwo antoio <sup>11</sup> Meri leulene bo nagawa mampe wisene moape enene ke wadie wiroroleide bo nagawa bedewe ewedie. <sup>12</sup> Ita me ke wadie bo nagawa bedewe ewedie enedio God enseliwa nata garau sapusapuaida tautaulala naepe Iesu

ituienawo aupawe waimoio ewamodie. Tane ensel dea uwawa winenawo wandie ita sowa da wawa wineienawo wandie. <sup>13</sup> Mo nata i ke wadio ewane waitarasane waienase, “E dima kewa waie wainiana?” Ita me sipoamone wanase, “Mo ne Tatana etepa wadane antoiena, ita ne mai atenteapona me naepe ituiena, sa baiwa nuana polaida wano waine ke wadina.”

<sup>14</sup> Me epe wane aupe leulene Iesu enedio ewen. Tane me ewene ewakoasane mai atensapona me mida enedie. <sup>15</sup> Ita sape Iesu Meri waitarasane wanase, “I, e dima kewa waie eneiana? Mida banusaiana?” Meri insenase apuna sa me epe waitarasadia irai sa onedia apanawa, sa baiwa me diene wanase, “Sona, naita e Iesu etepa Wade nambe ituama, ne menanedia benemawa dianeawo anteape wadape leusape bolawé itupadewanteapa.” <sup>16</sup> Meri epe wano Iesu me mampe wane wanase, “Meri!” Ita me Iesu aiawa dauwa etene atenlene me mampelene enene ebowa wane wanase, “Raboni.” Sa ipa muba aiauwo wan, ita ebo sa ipawaida ipa Debamamba. <sup>17</sup> Mape Iesu me diene wanase, “E mainawoitenee eneiana ne walama kerauda os bedewe Mamana mampe leuntape a baiwantedina mai wadaitunea, dia! Tane e ene aite ne sosonaida ne benemana diamowo etapua ne leunteape me mida ne Mamana ita e do Mamala wandia mampe anteapa. Me ipa ne Godna ita do e Godila wande.”

<sup>18</sup> Ita Meri Magdalin Iesu diena ruawalene me benemawa wadene wawe alala mampo alene wisene nuae do diamone wanase, **“Sosona, ne Tatamba ewane me do gagalontite.”** Ita Meri

mo diamone wanase, “Dima uduudu Tatamba dianena rua ne e dialedina.”

*Iesu wawe alala mampo sabamoleidio ewei  
(Matiu 28.16-20; Mak 16.14-18; Luk 24.36-49)*

<sup>19</sup> Ita Sande sa rawiwa wawe alala du dea bedewe auwenatue waimoie. Tane mo Iuswa eiau wadaitumopua sawantone du moawa gudusabodamone waimoie. Ita Iesu mampo wisene enenaubene auwamone wanase, “**Sau euda e manlawo winepi!**” <sup>20</sup> Me epe auwamone witapa tutusamoiena ita do tebipa eneiena pirawa euwamono eweiena. Ita wawe alala Tatamba mampoido enedio ewane nuae debamaia nuau nopesan. <sup>21</sup> Mape Iesu mo osowe auwamone wanase, “**Sau euda e manlawo winepi! Mamamba ne tawo emawo waaubanena rua ne e waaubaledina.**” <sup>22</sup> Iesu mo epe diamone aupe nonaupa mo osouwo sune wanase, “**Aleu kakaiwa e bedelawolepio wadana!**” <sup>23</sup> ✟E nolene aitane nolaitonuno apuna e benemala wadapue mamposapua God mo kadiu insadabuamopi. Tane e aitane nolaitonuno apuna e benemala etapue epua mo kadiu winakasalepi.”

*Iesu Tomas mampe sabamoleidio ewede*

<sup>24</sup> Iesu wawe alala mampo wisene sabamoleno eweiena walamawe wawe alala 12 sou dea Tomas, ebowa da waia Ragaraga, mai mo do, dia, me nambe leidie. <sup>25</sup> Ita mo Tomas ewane nuae do benemasane waienase, “Somba, no Tatamba mainimbo wiseno ewatana!” Mo epe waio Tomas leusane diamone wanase, “E me

---

✟ **20:23:** Matiu 16.19; 18.18

benemawa os dianeilana baiwa mai sumanaintipona, dia. Ne me witapa tutusamoiena pirawa ewape sumanainteapa. Ita do menanedia ne witana uraupa mampe me pirawa sa wirasape ita do me tebipa eneienawo witana itupe tauma sumanainteapa, mai di!”

**26** Ema aupe wiki dea dialeno wawe alala osowe du deawaa bedewe mo auwene du moawa gudusabodamone waimoie, tane Tomas do wisene wawe alala isiwa bedeuwolene wandie. Mo du moawa gudusabodamone waimoio Iesu wisene enenaubene auwamone wanase, “**Sau euda e manlawo winepi!**” **27** Iesu mo auwamone aupe me Tomas diene wanase, “Ne witana tutusamoiena pirawa ewee witaa uraupa mampe wirasaa, do witaa aubee tebina eneiena pirawa osowe itua ita **insakoa dewawa ee sumanaitaa!**”

**28** Iesu epe diedio Tomas sumanaiidalene wanase, “**E ne Tatana ita Godna!**” **29** Tomas sumanailena wano Iesu me diaidasane wanase, “**E ne ewaneana baiwa sumanaitiana, tane mo mida ne mai ewaneapona di sumanaibu ne mainawo ituia mo sau euda Wadeiena apanawa.**”

**30** Iesu ginasa eueuwa pokawaau uara me wawe alala emauwo dewamodio eweiena. Ita ginasa sa uara buka ema bedewe mai girumalepono wineipona, dia. **31** Tane ginasa eueuwa pokawaau isiwa Iesu dewamona buka ema bedewe girumaleno wineia, **sa ipa e sumanaitana Iesu ipa Keriso God Otopaida. Ita e sumanaitana bedewe me ebowe e inaida donsane wadana.**

## 21

*Iesu doa Galili tampe wawe alala mampo sabamoleidio ewei*

<sup>1-2</sup> Ema aupe Iesu osowe wawe alala isiwa doa Galili tampe laio mampo sabamoleno eweiena. Doa sa ebowa da waia Taiberias. Ita wawe alala Saimon Pita, ita Tomas, me ebowa da waia Ragaraga, ita Nataniel, me bola Kana Galili bedewe wanwanlala, ita Sebedi obampa nata, ita do wawe alala nata da doa Galili tampe auwene waimoie. Ita mo dudunau ema epe:

<sup>3</sup>  $\diamond$  Mo sape auweieno sou Pita diamone wanase, “Ne lawai awa antedina.” Tane mo me diane waienase, “No e do ana menanedo.” Ita mo uduudu a wane baiwa waa bedewe odane waine doa bedewe antone tadina sawo lawaintone borounton.

<sup>4</sup> Tane tadinaida omo wisedio Iesu esa sa tampe enedio wawe alala me ewane ewakoasaiena.

<sup>5</sup> Ita mo ewakoasaio Iesu mukalene waitaramone wanase, “Sosona, e moia da wadalana, ba dia?” Mo leusane waienase, “Dia, no borouten.”

<sup>6</sup>  $\diamond$  Mape Iesu mo diamone wanase, “E waa waiwa on deneuve lawaila aubene moia uara lawaimona.” Mo epe etane ruawantone dewasaieno lawaibu bedewe moia uduuduleno mai teinepaposidepona rua, dia.

<sup>7</sup> Tane wawe alala dea mida Iesu nuawadawadadasadia moia uaraia ewamone Pita diene wanase, **“Apana sa Tatambaida enede, mai mida.”** Sowa sa me epe dieno etene tauwadea garawa onape tautaulala nolawa baiwa itune ena wadene taune waa osowe

---

$\diamond$  **21:3:** Luk 5.5    $\diamond$  **21:6:** Luk 5.6

wandia rowolene esa bedewainta waiwe alen.  
<sup>8</sup> Ita me sosowa isiwa waa bedewe waimoia lawaibu moia nopesana teineie do Pita alena wawe waa asiisi waiwe antoie. Tane waa sa alepie waiwe wisepia awa kampaida, apana waiwe enepie aiawa wapio etaetala. <sup>9</sup> Mo esa waiwe wimone ia idia bupa osowe bouri imodio ita ia tampe bured wineio ewamoiena.

<sup>10</sup> Tauma Iesu mo diamone wanase, “E bouri isiwa lawaimolana otene do winlena.” <sup>11</sup> Saimon Pita ema etene waa bedewe kawalene alene lawai moia nopolena doa waiwe teinenauben. Tane lawai sa bedewe bouri debamaquia wisiaawa 153 wineia me teinenauben, tane lawai mai pumpu wapona, dia. <sup>12</sup> Pita nolawa diasano aupe Iesu wawe alala diamone wanase, “Sosona, winleno nana nata.” Wawe alala Iesu do nana sa napua baiwantoio bedeuwo mai mida da me waitarawa insepona me mida, ipawa mo bauta Tatamba atensaiena, tane waitarawa santone di eienia. <sup>13</sup> Ita Iesu alene bured wadene mo wanamone aupe bouri iilala wanamono naiena.

<sup>14</sup> Iesu bo bedewe enenwisene walama nata wawe alala du bedewe auweio mampo wisene sabamoleno eweiena. Ita tauma natadeawa esa tampe mo mampo sabamoleno eweiena.

### *Iesu Pita mampe gagaloleide*

<sup>15</sup> Mo nana naieno dialeno aupe Iesu Saimon Pita waitarasane wanase, “Saimon, Ion otopa, e ide ne nuawadawadaidaneiana, mai sosoemisa isiwa ruau, ba?” Ita Pita me sipoasane wanase, “Oa Tatamba, e atena ne e nuawadawadaine wainedina.” Iesu epe etene me diene wanase, “Ne sipsipna sanaa nana wanamono

nampa.” <sup>16</sup> Iesu Pita epe diene osowe waitarasane wanase, “Saimon, Ion otopa, e ne nuawadawadaidaneiana, ba?” Ita Pita osowe me diene wanase, “Oa Tatamba, e atena ne e nuawadawadaedine wainedina.” Mape Iesu Pita diene wanase, “Ne sipsipna oniadewasamone nana wanamono waimompa.”

<sup>17</sup> Ema aupe Iesu Pita osowe waitarasane wanase, **“Saimon, Ion otopa, e ne dianeawo etapa, nuawadawadaneiana, ba dia?”** Iesu Pita osoweosowe epe waitarasadio me nuawa pareidaleno wanase, **“Tatamba, e dewa uduudu atena, mai da koasapona, dia. E atena ne e nuawadawadaidaedine wainedina.”** Mape Iesu leusane me diene wanase, **“Ne sipsipna nana wanamono nampa.**

<sup>18</sup> Ne ulaipa dieedina, e sanaa wainie benaitie eba insaisaawo aitie. Tane e tontaite gulauite wane witaa aubewo apana da e witaa wadepie banlaepio naepe e a dabuaitanawo aitana.” <sup>19</sup> Iesu gagalo sa wane mampe Pita bo inainamba ambi ando bolepie mampe God ebowa debamasapie ionosapia umanawa wan. Ita mape Iesu Pita diene wanase, **“E ne waroroneana!”**

<sup>20</sup> <sup>✡</sup>Iesu Pita nata epe gagalontoio Pita leulene wawe alala mida Iesu nuawadawadasadia me adiwe enedio ewen. Pita sowa sa Iesu wawe alala do rawi dea bedewe nana naie waimoio bedewe me Iesu tampelene waine Iesu waitarasana apanawa. Me waitaralene wanase, “Tatamba, mida e wadaepie nanaepi?” <sup>21</sup> Ita Pita sowa sa adiwe enedio ewene Iesu waitarasane wanase,

---

<sup>✡</sup> **21:20:** Ion 13.25

“Tatamba, e ne epe diaimaaneano etana, tane diane sona adinawo enedia mampe ando ambi segalepi?” <sup>22</sup> Me epe wadio Iesu etene diaidasane wanase, “Naita ne menaneapono me inawaa wainipono ne leunteape wineapona, ema osowe e mai nuua tauna! **E ne waroroneana!**”

<sup>23</sup> Iesu Pita epe dieno gagalowa me warorowa uduudu etanature insakadisantone inseia wawe alala sa mida Iesu nuawadawadaidasadia mai bolepi, waimpo Iesu leulepie wisepi. Tane Iesu mai waponase wawe alala sa waimpo me leulepie wisepi, dia. Me wanase, “Naita ne menaneapono me inawaa wainipono ne leunteape wineapona ema osowe e mai nuua tauna!”

<sup>24</sup> Tane wawe alala sa mo sou insakadisawa gagalowa waia dewa ema uduudu segantoiena atenlentue benemawaleidie wande. Ita me buka ema bedewe dewa sa uduudu segantoiena benemawa girumalene itun. Ita no atnten dima me benemawaleidia, sa ipa ulaipaida. <sup>25</sup> Iesu mai dewa sa girumalena os dewamopona, dia. Tane me dewa isiwa uaraia dewamon. Naita apana da dewa sa uduudu umanau girumamopatuwapon tawo emawo buka bolawa dia.

**Ina Sanaa Gagalowa**  
**The New Testament in the Kanasi Language of Papua**  
**New Guinea**  
**Nupela Testamen long tokples Kanasi long Niugini**  
copyright © 1996 Wycliffe Bible Translators

Language: Kanasi

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

---

PDF generated using Haiola and XeLaTeX on 11 Nov 2022 from source files  
dated 9 Oct 2020

b27bd40e-e091-5268-bcbf-8232e1d7501a